

सिरि उसहदेवसामिस्स णमो । सिरि गोडी - जिराउला - सव्वोदयपासणाहाणं णमो । नमोऽत्थुणं समणस्स भगवओ महइमहावीर वद्धमाणसामिस्स । सिरि गोयम - सोहम्माइ सव्व गणहराणं मणमो । सिरि सुगुरु - देवाणं णमो । **सूर्यप्रज्ञप्त्युपाङ्गम् ।** नमो अरिहंताणं ॥ तेणं कालेणं० मिथिला नाम नयरी होत्था रिद्धत्थिमियसमिद्धा पमुइतजणजाणवया जाव पासादीया०, तीसे णं मिहिलाए नयरीए बहिया उत्तरपुरच्छिमे दिसिभाए एत्थ णं माणिभद्दे णामं चेइए होत्था वण्णओ, तीसे णं मिहिलाए जितसत्तू राया धारिणी देवी वण्णओ, तेणं कालेणं० तंमि माणिभद्दे चेइए सामी समोसढे परिसा निग्गता धम्मो कहितो पडिगया परिसा जाव राजा जामेव दिसिं पादुब्भूए तामेव दिसिं पडिगते । १। तेणं कालेणं० समणस्स भगवतो महावीरस्स जेट्ठे अंतेवासी इंदभूती णामे अणगारे गोतमे गोत्तेणं सत्तुस्सेहे समचउरंससंठाणसंठिए वज्जरिसहनारायसंघयणे जाव एवं वयासी । २। 'कइ मंडलाइं वच्चइ१, तिरिच्छा किं च गच्छइ २ । ओभासइ केवइयं ३, सेयाइं किं ते संठिई ४॥१॥ कहिं पडिहया लेसा ५, कहिं ते ओयसंठिई ६ । के सूरियं वरयते ७, कहं ते उदयसंठिई ८ ॥२॥ कइकट्ठा पोरिसीच्छाया ९, जोगे किं ते व आहिए १०। किं ते संवच्छराणादी ११, कइ संवच्छराइ य १२ ॥३॥ कहं चंदमसो वुड्ढी १३, कया ते दोसिणा बहु १४। के सिग्घगई वुत्ते १५, कहं दोसिणलक्खणं १६॥४॥ चयणोववाय १७ उच्चत्ते १८, सूरिया कइ आहिया १९। अणुभावे के व संवुत्ते २०, एवमेयाइं वीसई ॥५॥३। वड्ढोवड्ढी मुहुत्ताणमद्धमंडलसंठिई । के ते चिन्नं परियरइ, अंतरं किं चरंति य ॥६॥ उग्गाहइ केवइयं, केवतियं च विकंपइ । मंडलाण य संठाणे, विक्खंभो अट्ठ पाहुडा ॥७॥४। छप्पंच य सत्तेव य अट्ठ तिन्नि य हवंति पडिवत्ती । पढमस्स पाहुडस्स उ हवंति एयाउ पडिवत्ती ॥८॥५। पडिवत्तीओ उदए, तहा अत्थमणेषु य । भियघाए कण्णकला, मुहुत्ताण गतीति य ॥९॥ निक्खममाणे सिग्घगई पविसंते मंदगई इय । चुलसीइसयं पुरिसाणं, तेसिं च पडिवत्तीओ ॥१०॥ उदयम्मि अट्ठ भणिया भेदग्घाए दुवे य पडिवत्ती । चत्तारि मुहुत्तगईए हुंति तइयंमि पडिवत्ती ॥११॥६। आवलिय मुहुत्तग्गे एवंभागा य जोगस्सा । कुलाइं पुन्नमासी य, सन्निवाए य संठिई ॥१२॥ तार (य) णं च नेता य १०, चंदमग्गति यावरे । देवताण य अज्झयणे, मुहुत्ताणं नामया इय ॥१३॥ दिवसा राइ वुत्ता य, तिहि गोत्ता भोंयणाणि य । आइच्चचार मासा य, पंच संवच्छरा इय २०॥१४॥ जोइसस्स य दाराइं, नक्खत्तविजएऽविय २२ । दसमे पाहुडे एए, बावीसं पाहुडपाहुडा ॥१५॥७। ता कहं ते वद्धोवद्धी मुहुत्ताणं आहितेति वदेज्जा ?, ता अट्ठ एकूणवीसे मुहुत्तसते सत्तावीसं च सत्तट्ठिभागे मुहुत्तस्स आहितेति वदेज्जा । ८। ता जया णं सूरिए सव्वब्भंतरातो मंडलातो सव्वबाहिरं मंडलं उवसंकमिता चारं चरति सव्वबाहिरातो य मंडलातो सव्वब्भंतरं मंडलं उवसंकमिता चारं चरति एस णं अब्धाकेवतियं रातिंदियग्गेणं आहितेति वदेज्जा ?, ता तिण्णि छावट्ठे रातिंदियसए रातिंदियग्गेणं आहितेति वदेज्जा । ९। ता एताए अब्धाए सूरिए कति मंडलाइं चरति ?, ता चुलसीयं मंडलसतं चरति, बासीति मंडलसतं दुक्खुत्तो चरति, तं०-णिक्खममाणे चेव पवेसमाणे चेव, दुवे य खलु मंडलाइं सइं चरति, तं०-सव्वब्भंतरं चेव मंडलं सव्वबाहिरं चेव मंडलं । १०। जइ खलु तस्सेव आदिच्चस्स संवच्छरस्स सइं अट्ठारसमुहुत्ते दिवसे भवति सइं अट्ठारसमुहुत्ता राती भवति सइं दुवालसमुहुत्ते दिवसे भवति सइं दुवालसमुहुत्ता राती भवति, पढमे छम्मासे अत्थि अट्ठारसमुहुत्ता राती णत्थि अट्ठारसमुहुत्ते दिवसे अत्थि दुवालसमुहुत्ते दिवसे णत्थि दुवालसमुहुत्ता राती भवति, दोच्चे छम्मासे अत्थि अट्ठारसमुहुत्ते दिवसे णत्थि अट्ठारसमुहुत्ता राती अत्थि दुवालसमुहुत्ता राती णत्थि दुवालसमुहुत्ते दिवसे भवति, पढमे छम्मासे दोच्चे छम्मासे णत्थि पण्णरसमुहुत्ते दिवसे भवति णत्थि पण्णरसमुहुत्ता राती भवति, तत्थ णं कं हेतुं वदेज्जा ?, ता अयणं जंबुदीवे सव्वदीवसमुद्दाणं सव्वब्भंतराए जाव परिक्खेवेणं पं०, ता जता णं सूरिए सव्वब्भंतरमंडलं उवसंकमिता चारं चरति तदा णं उत्तमकट्ठपत्ते उक्कोसए अट्ठारसमुहुत्ते दिवसे भवति जहणिया दुवालसमुहुत्ता राती भवति, से निक्खममाणे सूरिए नवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमिता चारं चरति, ता जया णं सूरिए अब्भितराणंतरं मंडलं

सौजन्य :- श्रीमति लीना मलीलाल शाह परिवार नवापास (कच्छ) प्रेरणा : नीडिशकुमार (रायछा)

उवसंकमिता चारं चरति तदा णं अट्टारसमुहुत्ते दिवसे भवति दोहिं एगट्टिभागमुहुत्तेहिं ऊणे दुवालसमुहुत्ता राती भवति दोहिं एगट्टिभागमुहुत्तेहिं अधिया, से णिक्खममाणे सूरिए दोच्चंसि अहोरत्तंसि अब्भंतरं तच्चं मंडलं उवसंकमिता चारं चरति, ता जया णं सूरिए अब्भितरं तच्चं मंडलं उवसंकमिता चारं चरति तदा णं अट्टारसमुहुत्ते दिवसे भवति चउहिं एगट्टिभागमुहुत्तेहिं ऊणे दुवालसमुहुत्ता राती भवति चउहिं एगट्टिभागमुहुत्तेहिं अहिया, एवं खलु एणं उवाएणं णिक्खममाणे सूरिए तदाणंतरा अणंतरं मंडलातो मंडलं संकममाणे २ दो दो एगट्टिभागमुहुत्ते एगमेगे मंडले दिवसखेत्तस्स णिवुड्ढेमाणे २ रतणिक्खेत्तस्स अभिवुड्ढेमाणे २ सव्वबाहिरमंडलं उवसंकमिता चारं चरति, ता जया णं सूरिए सव्वब्भंतरातो मंडलाओ सव्वबाहिरं मंडलं उवसंकमिता चारं चरति तदा णं सव्वब्भंतरमंडलं पणिधाय एगेणं तेसीतेणं राइंदियसतेणं तिणि छावट्टे एगट्टिभागमुहुत्तसते दिवसखेत्तस्स णिवुड्ढित्ता रतणिक्खेत्तस्स अभिवुड्ढित्ता चारं चरति तदा णं उत्तमकट्टपत्ता उक्कोसिया अट्टारसमुहुत्ता राती भवति जहण्णए बारसमुहुत्ते दिवसे भवति, एस णं पढमे छम्मासे एस णं पढमछम्मासस्स पज्जवसाणे, से पविसमाणे सूरिए दोच्चं छम्मासं अ (आ) यमाणे पढमंसि अहोरत्तंसि बाहिराणंतरं मंडलं उवसंकमेत्ता चारं चरति, ता जया णं सूरिए बाहिराणंतरं मंडलं उवसंकमिता चारं चरति तदा णं अट्टारसमुहुत्ता राती भवति दोहिं एगट्टिभागमुहुत्तेहिं ऊणा दुवालसमुहुत्ते दिवसे भवति दोहिं एगट्टिभागमुहुत्तेहिं अहिए, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिता चारं चरति, ता जया णं सूरिए बाहिरं तच्चं मंडलं उवसंकमिता चारं चरति तदा णं अट्टारसमुहुत्ता राती भवति चउहिं एगट्टिभागमुहुत्तेहिं ऊणा दुवालसमुहुत्ते दिवसे भवति चउहिं एगट्टिभागमुहुत्तेहिं अहिए, एवं खलु एतेणुवाएणं पविसमाणे सूरिए तदाणंतरातो मंडलातो तयाणंतरं मंडलं संकममाणे २ दो दो एगट्टिभागमुहुत्ते एगमेगे मंडले रतणिक्खेत्तस्स णिवुड्ढेमाणे दिवसखेत्तस्स अभिवुड्ढेमाणे २ सव्वब्भंतरं मंडलं उवसंकमिता चारं चरति, ता जया णं सूरिए सव्वबाहिराओ मंडलाओ सव्वब्भंतरं मंडलं उवसंकमिता चारं चरति तदा णं सव्वबाहिरं मंडलं पणिधाय एगेणं तेसीएणं राइंदियसतेणं तिन्नि छावट्टे एगट्टिभागमुहुत्तसते रयणिक्खेत्तस्स निवुड्ढित्ता दिवसखेत्तस्स अभिवुड्ढित्ता चारं चरति तया णं उत्तमकट्टपत्ते उक्कोसए अट्टारसमुहुत्ते दिवसे भवति जहण्णिया दुवालसमुहुत्ता राती भवति, एस णं दोच्चे छम्मासे एस णं दुच्चस्स छम्मासस्स पज्जवसाणे, एस णं आदिच्चे संवच्छरे एस णं आदिच्चस्स संवच्छरस्स पज्जवसाणे, इति खलु तस्सेवं आदिच्चस्स संवच्छरस्स सइं अट्टारसमुहुत्ते दिवसे भवति सइं अट्टारसमुहुत्ता राती भवति सइं दुवालसमुहुत्ते दिवसे भवति सइं दुवालसमुहुत्ता राती भवति, पढमे छम्मासे अत्थि अट्टारसमुहुत्ता राई नत्थि अट्टारसमुहुत्ते दिवसे अत्थि दुवालसमुहुत्ते दिवसे नत्थि दुवालसमुहुत्ता राई, दोच्चे वा छम्मासे अत्थि अट्टारसमुहुत्ते दिवसे भवति णत्थि अट्टारसमुहुत्ता राई अत्थि दुवालसमुहुत्ता राई नत्थि दुवालसमुहुत्ते दिवसे भवति, पढमे वा छम्मासे दोच्चे वा छम्मासे णत्थि पण्णरसमुहुत्ते दिवसे भवति णत्थि पण्णरसमुहुत्ता राई भवति, नत्तत्थ रातिंदियाणं वड्ढोवड्ढीए मुहुत्ताण वा चयोवचएणं णण्णत्थ वा अणुवायगईए, 'पुव्वेण दुन्नि भागा० गाधाओ भाणितव्वाओ ।☆☆☆

११॥ पढमस्स पाहुडस्स पढमं पाहुडपाहुडं १-१ ☆☆☆ ॥ ता कहां ते अब्भमंडलसंठिती आहिताति वदेज्जा ?, तत्थ खलु इमे दुवे अब्भमंडलसंठिती पं० तं०-दाहिणा चेव अब्भमंडलसंठिती उत्तरा चेव अब्भमंडलसंठिती, ता कहां ते दाहिणाब्भमंडलसंठिती आहिताति वदेज्जा ?, ता अयणं जंबुद्वीवं दीवे सव्वदीवसमुद्दाणं जाव परिकखेवेणं, ता जया णं सूरिए सव्वब्भंतरं दाहिणं अब्भमंडलसंठितिं उवसंकमिता चारं चरति तदा णं उत्तमकट्टपत्ते उक्कोसए अट्टारसमुहुत्ते दिवसे भवति जहण्णिया दुवालसमुहुत्ता राती भवति, से णिक्खममाणे सूरिए णवं संवच्छरं अयमाणे पढमंसि अहोरत्तंसि दाहिणाए अंतराए भागाते तस्सादिपदेसाते अब्भितराणंतरं उत्तरं अब्भमंडलसंठितिं उवसंकमिता चारं चरति, ता जया णं सूरिए अब्भितराणंतरं उत्तरं अब्भमंडलसंठितिं उवसंकमिता चारं चरति तदा णं अट्टारसमुहुत्ते दिवसे भवति दोहिं एगट्टिभागमुहुत्तेहिं ऊणे दुवालसमुहुत्ता राती भवइ दोहिं एगट्टिभागमुहुत्तेहिं अधिया, से णिक्खममाणे सूरिए दोच्चंसि अहोरत्तंसि उत्तराए अंतराए भागाते तस्सादियपदेसाए अब्भितरं तच्चं दाहिणं अब्भमंडलसंठितिं उवसंकमिता चारं चरति, ता जया णं सूरिए अब्भितरं तच्चं दाहिणं अब्भमंडलसंठितिं उवसंकमिता

चारं चरति तदा णं अट्टारसमुहुत्ते दिवसे भवति चउहिं एगट्टिभागमुहुत्तेहिं ऊणे दुवालसमुहुत्ता राई भवति चउहिं एगट्टिभागमुहुत्तेहिं अधिया, एवं खलु एणं उवाएणं णिक्खममाणे सूरिए तदाणंतरातो तदाणंतरं० तंसि २ देसंमि तं तं अब्भमंडलसंठितिं संकममाणे २ दाहिणाए २ अंतराए भागाते तस्सादिपदेसाते सव्वबाहिरं उत्तरं अब्भमंडलसंठितिं उवसंकमिता चारं चरति, ता जया णं सूरिए सव्वबाहिरं उत्तरं अब्भमंडलसंठितिं उवसंकमिता चारं चरति तदा णं उत्तमकट्टपत्ता उक्को० अट्टारसमुहुत्ता राई भवति जह० दुवालसमुहुत्ते दिवसे, एस णं पढमे छम्मासे एस णं पढमछम्मासस्स पज्जवसाणे, से पविसमाणे सूरिए दोच्चं छम्मासं अयमीणे पढमंसि अहोरत्तंसि उत्तराते अंतरभागाते तस्सादिपदेसाते बाहिराणंतरं दाहिणं अब्भमंडलसंठितिं उवसंकमिता चारं चरति, ता जया णं सूरिए बाहिराणंतरं अब्भमंडलसंठितिं उवसंकमिता चारं चरति तदा णं अट्टारसमुहुत्ता राई भवति दोहिं एगट्टिभागमुहुत्तेहिं ऊणा दुवालसमुहुत्ते दिवसे भवति दोहिं एगट्टिभागमुहुत्तेहिं अहिए, से पविसमाणे सूरिए दोच्चंसि अहोरत्तंसि दाहिणाते अंतराए भागाते तस्सादिपदेसाए बाहिरं तच्चं उत्तरं अब्भमंडलसंठितिं उवसंकमिता चारं चरति, ता जया णं सूरिए बाहिरं तच्चं उत्तरं अब्भमंडलसंठितिं उवसंकमिता चारं चरति तदा णं अट्टारसमुहुत्ता राई भवति चउहिं एगट्टिभागमुहुत्तेहिं ऊणा दुवालसमुहुत्ते दिवसे भवति चउहिं एगट्टिभागमुहुत्तेहिं अधिये, एवं खलु एतेणं उवाएणं पविसमाणे सूरिए तदाणंतराउ तदाणंतरं० तंसि २ देसंसि तं २ अब्भमंडलसंठितिं संकममाणे २ उत्तराए तयांतरभागाते तस्सादिपदेसाए सव्वभंतरं दाहिणं अब्भमंडलसंठितिं उवसंकमिता चारं चरति, ता जया णं सूरिए सव्वभंतरं दाहिणं अब्भमंडलसंठितिं उवसंकमिता चारं चरति तदा णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चसंवच्छरस्स पज्जवसाणे । १२। ता कहं ते उत्तरा अब्भमंडलसंठिती आहिताति वदेज्जा ?, ता अयं णं जंबुदीवे दीवे सव्वदीव जाव परिक्खेवेणं, ता जता णं सूरिए सव्वभंतरं उत्तरं अब्भमंडलसंठितिं उवसंकमिता चारं चरति तदा णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति जहा दाहिणा तहा चेव णवरं उत्तरट्टिओ अब्भितराणंतरं दाहिणं उवसंकमइ दाहिणातो अब्भितरं तच्चं उत्तरं उवसंकमति, एवं खलु एणं उवाएणं जाव सव्वबाहिरं दाहिणं उवसंकमति सव्वबाहिरातो बाहिराणंतरं उत्तरं उवसंकमति उत्तरातो बाहिरं तच्चं दाहिणं तच्चातो दाहिणातो संकममाणे २ जाव सव्वभंतरं उवसंकमति तहेव एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे, गाहाओ । १३॥

☆☆☆ पढमे बीयं पाहुडपाहुड १-२ ॥ ☆☆☆ ता के ते चित्रं पडिचरति आहितेति वदेज्जा ?, तत्थ खलु इमे दुवे सूरिया पं० तं०-भारहे चेव सूरिए एरवए चेव सूरिए, ता एते णं दुवे सूरिया पत्तेयं २ तीसाए २ मुहुत्तेहिं एगमेगं अब्भमंडलं चरंति, सट्टीए २ मुहुत्तेहिं एगमेगं मंडलं संघातंति, ता णिक्खममाणे खलु एते दुवे सूरिया णो अण्णमण्णस्स चिण्णं पडिचरंति, पविसमाणा खलु एते दुवे सूरिया अण्णमण्णस्स चिण्णं पडिचरंति, तं सतमेगं चोतालं, तत्थ को हेऊ वदेज्जा ?, ता अयण्णं जंबुदीवे दीवे जाव परिक्खेवेणं, तत्थ णं अयं भारहए चेव सूरिए जंबुदीवस्स० पाईणपडीणायतउदीणदाहिणायताए जीवाए मंडलं चउवीसएणं सतेणं छेत्ता दाहिणपुरत्थिमिल्लंसि चउभागमंडलंसि बाणउतियसूरियगताइं जाइं सूरिए अप्पणा चेव चिण्णाइं पडिचरति उत्तरपच्चत्थिमिल्लंसि चउभागमंडलंसि एक्काणउतिं सूरियगताइं जाइं सूरिए अप्पणा चेव चिण्णाइं पडिचरति तत्थ अयं भारहे सूरिए एरवतस्स सूरियस्स जंबुदीवस्स पाईणपडीणायताए उदीणदाहिणायताए जीवाए मंडलं चउवीसएणं सतेणं छेत्ता उत्तरपुरच्छिमिल्लंसि चउभागमंडलंसि बाणउतिं सूरियगताइं जाइं सूरिए परस्स चिण्णाइं पडिचरति दाहिणपच्चच्छिमिल्लंसि चउभागमंडलंसि एकूणणउतिं सूरियगताइं जाइं सूरिए परस्स चेव चिण्णाइं पडिचरति, तत्थ अयं एरवए सूरिए० जंबुदीवस्स पाईणपडीणायताए उदीणदाहिणायताए जीवाए मंडलं चउवीसएणं सतेणं छेत्ता उत्तरपुरत्थिमिल्लंसि चउभागमंडलंसि बाणउतिं सूरियगताइं जाइं सूरिए अप्पणा चेव चिण्णाइं पडियरति दाहिणपुरत्थिमिल्लंसि चउभागमंडलंसि एक्काणउतिं सूरियगताइं जाइं सूरिए अप्पणा चेव चिण्णाइं पडिचरति, तत्थ णं एयं एरवतिए सूरिए (१९५) भारहस्स

सूरियस्स जंबुद्वीवस्स पाईणपडीणायताए उदीणदाहिणाताए जीवाए मंडलं चउवीसएणं सतेणं छित्ता दाहिणपच्चत्थिमिल्लंसि चउभागमंडलंसि बाणउतिं सूरियगताइं जाइं सूरिए परस्स चिण्णाइं पडिचरति उत्तरपुरत्थिमिल्लंसि चउभागमंडलंसि एक्काणउतिं सूरियगताइं जाइं सूरिए परस्स चेव चिण्णाइं पडिचरति, ता निक्खममाणा खलु एते दुवे सूरिया णो अण्णमण्णस्स चिण्णं पडिचरंति, पविसमाणा खलु एते दुवे सूरिया अण्णमण्णस्स चिण्णं पडिचरंति, तं० 'सतमेगं चोतालं० गाहाओ ।१४॥

☆☆☆ पढमे तइयं पाहुडपाहुडं १.३ ☆☆☆ ॥ ता केवइयं एए दुवे सूरिया अण्णमण्णस्स अंतरं कट्ठु चारं चरंति आहिताति वदेज्जा ?, तत्थ खलु इमातो छ पडिवत्तीओ पं०, तत्थ एगे एवमाहंसु- ता एगं जोयणसहस्सं एगं च तेत्तीसं जोयणसतं अण्णमण्णस्स अंतरं कट्ठुसूरिया चारं चरंति आहिताति वदेज्जा एगे एवमाहंसु, एगे पुण एवमाहंसु- ता एगं जोयणसहस्सं एगं चउतीसं जोयणसयं अन्नमन्नस्स अंतरं कट्ठु सूरिया चारं चरंति आहियत्ति वइज्जा एगे एव०, एगे पुण०- ता एगं जोयणसहस्सं एगं च पणतीसं जोयणसयं अण्णमण्णस्स अंतरं कट्ठु सूरिया चारं चरंति आहिताति वदेज्जा एगे एव०, एगे० एगं दीवं एगं समुदं अण्णमण्णस्स अंतरं कट्ठु०, एगे० दो दीवे दो समुदे०, एगे० तिणि दीवे तिणि समुदे०, वयं पुण एवं वयामो- ता पंच २ जोयणाइं पणतीसं च एगट्ठिभागे जोयणस्स अण्णमण्णस्स अंतरं अभिवहेमाणा वा निवहेमाणा वा सूरिया चारं चरंति आहि०, तत्थ णं को हेऊ आहिताति वदेज्जा ?, ता अयणं जंबुद्वीवे जाव परिकखेवेणं पं०, ता जया णं एते दुवे सूरिया सव्वब्भंतरं मंडलं उवसंकमिता चारं चरंति तदा णं णवणउतिजोयणसहस्साइं छच्च चत्ताले जोयणसते अण्णमण्णस्स अंतरं कट्ठु चारं चरंति आहिताति वदेज्जा, तता णं उवमकट्ठपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, ते निक्खममाणा सूरिया णवं संवच्छरं अयमाणा पढमंसि अहोरत्तंसि अब्भितराणंतरं मंडलं उवसंकमिता चारं चरंति, ता जता णं एते दुवे सूरिया जाव चारं चरंति तदा णं नवनवतिं जोयणसहस्साइं छच्च पणताले जोयणसते पणतीसं च एगट्ठिभागे जोयणस्स अंतरं कट्ठु चारं चरंति आहिताति वदेज्जा, तता णं अट्टारसमुहुत्ते दिवसे भवति दोहिं एगट्ठिभागमुहुत्तेहिं ऊणे दुवालसमुहुत्ता राती भवति दोहिं एगट्ठिभागमुहुत्तेहिं अधिया, ते णिक्खममाणा सूरिया दोच्चंसि अहोरत्तंसि अब्भितरं तच्चं मंडलं उवसंकमिता चारं चरंति, ता जता एते दुवे सूरिया अब्भितरं तच्चं मंडलं जाव चारं चरंति तया णं नवनवइं जोयणसहस्साइं छच्च इक्कावण्णे जोयणसए नव य एगट्ठिभागे जोयणस्स अण्णमण्णस्स अंतरं कट्ठु चारं चरंति०, तदा णं अट्टारसमुहुत्ते दिवसे भवइ चउहिं एगट्ठिभागमुहुत्तेहिं ऊणे दुवालसमुहुत्ता राई भवइ चउहिं एगट्ठिभागमुहुत्तेहिं अधिया, एवं खलु एतेणुवाएणं णिक्खममाणा एते दुवे सूरिया ततोणंतरातो तदाणंतरं मंडलातो मंडलं संकममाणा २ पंच २ जोयणाइं पणतीसं च एगट्ठिभागे जोयणस्स एगमेगे मंडले अण्णमण्णस्स अंतरं अभिवहेमाणा २ सव्वबाहिरं मंडलं उवसंकमिता चारं चरंति, ता जया णं एते दुवे सूरिया सव्वबाहिरं मंडलं उवसंकमिता चारं चरंति तता णं एगं जोयणसतसहस्सं छच्च सट्ठे जोयणसते अण्णमण्णस्स अंतरं कट्ठु चारं चरंति, तता णं उत्तमकट्ठपत्ता जाव राई भवइ जहणए दुवाल० जाव दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, ते पविसमाणा सूरिया दोच्चं छम्मासं अयमाणा पढमंसि अहोरत्तंसि बाहिराणंतरं मंडलं उवसंकमिता चारं चरंति, ता जया णं एते दुवे सूरिया बाहिराणंतरं मंडलं उवसंकमिता चारं चरंति तदा णं एगं जोयणसयसहस्सं छच्च चउप्पण्णे जोयणसते छव्वीसं च एगट्ठिभागे जोयणस्स अण्णमण्णस्स अंतरं कट्ठु चारं चरंति०, तदा णं अट्टारसमुहुत्ता राई भवइ दोहिं एगट्ठिभागमुहुत्तेहिं ऊणा दुवालसमुहुत्ते दिवसे भवति दोहिं एगट्ठिभागमुहुत्तेहिं अहिए, ते पविसमाणा सूरिया दोच्चंसि अहोरत्तंसि बाहिरं तच्चं मंडलं उवसंकमिता चारं चरंति, ता जता णं एते दुवे सूरिया बाहिरं तच्चं मंडलं उवसंकमिता चारं चरंति तता णं एगं जोयणसयसहस्सं छच्च अडयाले जोयणसते बावणं च एगट्ठिभागे जोयणस्स अण्णमण्णस्स अंतरं कट्ठु चारं चरंति, तता णं अट्टारसमुहुत्ता राई भवइ चउहिं एग० जाव ऊणा दुवालसमुहुत्ते दिवसे भवति चउहिं० जाव अहिए, एवं खलु एतेणुवाएणं पविसमाणा एते दुवे सूरिया ततोऽणंतरातो तदाणंतरं मंडलाओ मंडलं संकममाणा पंच २ जोयणाइं पणतीसे एट्ठिभागे जोयणस्स एगमेगे मंडले अण्णमण्णस्संतरं णिवूहेमाणा २ सव्वब्भंतरं मंडलं उवसंकमिता चारं चरंति, जया णं एते दुवे सूरिया

सव्वभंतरं मंडलं उवसंकमिता चारं चरति तता णं णवणउतिं जोयणसहस्साइं छच्च चत्ताले जोयणसते अण्णमण्णस्स अंतरं कट्टु चारं चरति तता णं उत्तमकट्टपत्ते जाव दिवसे भवति जहण्णिया दुवालसमुहुत्ता राई भवति, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आइच्चे संवच्छरे एस णं आइच्चसंवच्छरस्स पज्जवसाणे । १५ ★★★★★ ॥१-४॥ ★★★★★ ता केवतियं ते दीवे समुद्दे वा ओगाहिता सूरिए चारं चरति आहिता० ?, तत्थ खलु इमाओ पंच पडिवत्तीओ पं०, एगे एवमाहंसु ता एगं जोयणसहस्सं एगं च तेत्तीसं जोयणसतं दीवं वा समुद्दं वा ओगाहिता सूरिए चारं चरति एगे एव०, एगे पुण०-ता एगं जोयणसहस्सं एगं चउत्तीसं जोयणसयं दीवं वा समुद्दं वा ओगाहिता सूरिए चारं चरति एगे एव०, एगे पुण०-ता एगं जोयणसहस्सं एगं च पणतीसं जोयणसतं दीवं वा समुद्दं वा ओगाहिता सूरिए चारं चरति एगे एव०, एगे पुण०-ता अवड्डं दीवं वा समुद्दं वा ओगाहिता सूरिए चारं चरति एगे एव०, एगे पुण०-ता नो किंचि एगं जोयणसहस्सं एगं तेत्तीसं जोयणसतं दीवं वा समुद्दं वा ओगाहिता सूरिए चारं चरति०, तत्थ जे ते एवमाहंसु ता एगं जोयणसहस्सं एगं तेत्तीसं जोयणसतं दीवं वा समुद्दं वा उग्गाहिता सूरिए चारं चरति ते एवमाहंसु-जता णं सूरिए सव्वभंतरं मंडलं उवसंकमिता चारं चरति तया णं जंबुदीवं एगं जोयणसहस्सं एगं च तेत्तीसं जोयणसतं ओगाहिता सूरिए चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति जहण्णिया दुवालसमुहुत्ता राई भवइ, ता जया णं सूरिए सव्वबाहिरं मंडलं उवसंकमिता चारं चरइ तया णं लवणसमुद्दं एगं जोयणसहस्सं एगं च तेत्तीसं जोयणसयं ओगाहिता चारं चरइ तया णं उत्तमकट्टपत्ता उक्कोसिया अट्टारसमुहुत्ता राई भवति जहण्णए दुवालसमुहुत्ते दिवसे भवइ, एवं चोत्तीसेऽवि, पणतीसेऽवि एवं चेव भाणियव्वं, तत्थ जे ते एवमाहंसु ता अवड्डं दीवं वा समुद्दं वा ओगाहिता सूरिए चारं चरति ते एवमा०-जता णं सूरिए सव्वभंतरं मंडलं उवसंकमिता चारं चरति तता णं अवड्डं जंबुदीवं ओगाहिता चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति जहण्णिया दुवालसमुहुत्ता राई भवति, एवं सव्वबाहिरएवि, णवरं अवड्डं लवणसमुद्दं, तता णं राइंदियं तहेव, तत्थ जे ते एव०-ता णो किञ्चि दीवं वा समुद्दं वा ओगाहिता सूरिए चारं चरति ते एवमाहंसु-ता जता णं सूरिए सव्वभंतरं मंडलं उवसंकमिता चारं चरति तता णं णो किंचि दीवं वा समुद्दं वा ओगाहिता सूरिए चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति तहेव, एवं सव्वबाहिरए मंडले, णवरं णो किंचि लवणसमुद्दं ओगाहिता चारं चरति, रातिंदियं तहेव, एगे एव० । १६। वयं पुण एवं वदामो-ता जया णं सूरिए सव्वभंतरं मंडलं उवसंकमिता चारं चरति तता णं जंबुदीवं असीतं जोयणसतं ओगाहिता चारं चरति तदा णं उत्तमकट्टपत्ते उक्कोसाए अट्टारसमुहुत्ते दिवसे भवति जहण्णिया दुवालसमुहुत्ता राई भवति, एवं सव्वबाहिरएवि णवरं लवणसमुद्दं तिण्णि तीसे जोयणसते ओगाहिता चारं चरति, तता णं उत्तमकट्टपत्ता उक्कोसिया अट्टारसमुहुत्ता राई भवइ जहण्णए दुवालसमुहुत्ते दिवसे भवति, गाथाओ भाणितव्वाओ । १७ ★★★★★ ॥१.५॥ ★★★★★ ता केवतियं ते एगमेगेणं रातिंदिएणं विकंपइत्ता २ सूरिए चारं चरति आहितेति वदेज्जा ?, तत्थ खलु इमाओ सत्त पडिवत्तीओ पं०, तत्थेगे एवमाहंसु- ता दो जोयणाइं अब्बदुचत्तालीसं तेसीतसयभागे जोयणस्स एगमेगेणं रातिंदिएणं विकंपइत्ता २ सूरिए चारं चरति एगे एव०, एगे पुण० ता अट्टातिज्जाइं जोयणाइं एगमेगेणं राइंदिएणं विकंपइत्ता सूरिए चारं चरति एगे एव०, एगे पुण० ता तिभागूणाइं तिन्नि जोयणाइं एगमेगेणं राइंदिएणं विकंपइत्ता २ सूरिए चारं चरति एगे एव०, एगे पुण०- ता तिण्णि जोयणाइं अब्बसीतालीसं च तेसीतसयभागे जोयणस्स एगमेगेणं राइंदिएणं विकंपइत्ता सूरिए चारं चरति एगे एव०, एगे पुण०- ता अब्बुट्टाइं जोयणाइं एगमेगेणं राइंदिएणं विकंपइत्ता सूरिए चारं चरति एगे एव०, एगे पुण०- ता चउब्भागूणाइं चत्तारि जोयणाइं एगमेगेणं राइंदिएणं विकंपइत्ता सूरिए चारं चरति एगे एव०, एगे पुण०- ता चत्तारि जोयणाइं अब्बबावण्णं च तेसीतिसतभागे जोयणस्स एगमेगेणं राइंदिएणं विकंपइत्ता सूरिए चारं चरति एगे०, वयं पुण एवं वदामो- ता दो जोयणाइं अडतालीसं च एगट्ठिभागे जोयणस्स एगमेगं मंडलं एगमेगेणं राइंदिएणं विकंपइत्ता सूरिए चारं चरति, तत्थ णं को हेतू इति वदेज्जा ?, ता अयण्णं जंबुदीवे जाव परिक्खेवेणं पं०, ता जता णं सूरिए णं सूरिए सव्वभंतरं मंडलं उवसंकमिता

चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवइ, से णिक्खममाणे सूरिए णवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमिता चारं चरति, ता जया णं सूरिए अब्भितराणंतरं मंडलं उवसंकमिता चारं चरति तदा णं दो जोयणाइं अडयालीसं च एगट्ठिभागे जोयणस्स एगेणं राइंदिएणं विकंपइत्ता चारं चरति तता णं अट्टारसमुहुत्ते दिवसे भवति दोहिं एगट्ठिभागमुहुत्तेहिं ऊणे दुवालसमुत्ता राई भवति दोहिं एगट्ठिभागमुहुत्तेहिं अहिया, से णिक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमिता चारं चरति, ता जया णं सूरिए अब्भितरं तच्चं मंडलं उवसंकमिता चारं चरति तता णं पंच जोयणाइं पणतीसं च एगट्ठिभागे जोयणस्स दोहिं राइंदिएहिं विकंपइत्ता चारं चरति तता णं अट्टारसमुहुत्ते दिवसे भवति चउहिं एगट्ठिभागमुहुत्तेहिं ऊणे दुवालसमुहुत्ता राई भवति चउहिं एगट्ठिभागमुहुत्तेहिं अधिया, एवं खलु एतेणं उवाएणं णिक्खममाणे सूरिए तताणंतराओ तदाणंतरं मंडलातो मंडलं संकममाणे २ दो २ जोयणाइं अडतालीसं च एगट्ठिभागे जोयणस्स एगमेगं मंडलं एगमेगेणं राइंदिएणं विकम्पमाणे २ सव्वबाहिरं मंडलं उवसंकमिता चारं चरति, ता जया णं सूरिए सव्वब्भंतरातो मंडलातो सव्वबाहिरं मंडलं उवसंकमिता चारं चरति तया णं सव्वब्भंतरं मंडलं पणिहाय एगेणं तेसीतेणं राइंदियसतेणं पंचदसुत्तरजोयणसते विकंपइत्ता चारं चरति तता णं उत्तमकट्टपत्ता उक्कोसिया अट्टारसमुहुत्ता राई भवइ जहणिए दुवालसमुहुत्ते दिवसे भवति, एस णं पढमे छम्मासे एस णं पढमछम्मासस्स पज्जवसाणे, से य पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमिता चारं चरति, ता जया णं सूरिए बाहिराणंतरं मंडलं उवसंकमिता चारं चरति तया णं दो दो जोयणाइं अडयालीसं च एगट्ठिभागे जोयणस्स एगमेगेणं राइंदिएणं विकम्पइत्ता चारं चरति तता णं अट्टारसमुहुत्ता राई भवति दोहिं एगट्ठिभागमुहुत्तेहिं ऊणा दुवालसमुहुत्ते दिवसे भवति दोहिं एगट्ठिभागमुहुत्तेहिं अहिए, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिता चारं चरति, ता जया णं सूरिए बाहिरं तच्चं मंडलं उवसंकमिता चारं चरति तया णं पंच जोयणाइं पणतीसं च एगट्ठिभागे जोयणस्स दोहिं राइंदिएहिं विकंपइत्ता चारं चरति, राइंदिए तहेव, एवं खलु एतेणुवाएणं पविसमाणे सूरिए ततोऽणंतरातो तयाणंतरं मंडलाओ मंडलं संकममाणे २ दो २ जोयणाइं अडयालीसं च एगट्ठिभागे जोयणस्स एगमेगेणं राइंदिएणं विकंपमाणे २ सव्वब्भंतरं मंडलं उवसंकमिता चारं चरति, ता जया णं सूरिए सव्वबाहिरातो मंडलातो सव्वब्भंतरं मंडलं उवसंकमिता चारं चरति तता णं सव्वबाहिरं मंडलं पणिधाय एगेणं तेसीएणं राइंदियसतेणं पंचदसुत्तरे जोयणसते विकंपइत्ता चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवइ, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे । १८ ★★ ★ ॥ १-६ ॥ ★★ ★ ता कहं ते मंडलसंठिती आहिताति वदेज्जा ?, तत्थ खलु इमातो अट्ट पडिवत्तीओ पं०, तत्थेगे एवमाहंसु- ता सव्वावि मंडलवता समचउरंससंठाणसंठिता पं० एगे एव०, एगे पुण०- ता सव्वावि णं मंडलवता विसमचउरंससंठाणसंठिया पं० एगे एव०, एगे पुण० सव्वावि णं मंडलवता समचतुक्कोणसंठिता पं० एगे ए०, एगे पुण० सव्वावि मंडलवता विसमचउक्कोणसंठिया पं० एगे एव०, एगे पुण० ता सव्वावि मंडल० समचक्कवालसंठिया पं० एगे एव०, एगे पुण०- ता सव्वावि मंडलवता विसमचक्कवालसंठिया पं० एगे एव०, एगे पुण०- ता सव्वावि मंडलवता चक्कच्चक्कवालसंठिया पं० एगे एव०, एगे पुण०- ता सव्वावि मंडलवता छत्तागारसंठिया पं० एगे एवमाहंसु, तत्थ जे ते एवमाहंसु ता सव्वावि मंडलवता छत्ताकारसंठिता पं० एतेणं णएणं णेयव्वं, णो चेव णं इतरेहिं, पाहुडगाहाओ भाणियव्वाओ । १९ ★★ ★ ॥ १-७ ॥ ★★ ★ ता सव्वावि णं मंडलवता केवतियं बाहल्लेणं केवतियं आयामविकखंभेणं केवतियं परिकखेवेणं आहिताति वदेज्जा ?, तत्थ खलु इमा तिणि पडिवत्तीओ पं०, तत्थेगे एवमाहंसु- ता सव्वावि णं मंडलवता जोयणं बाहल्लेणं एणं जोयणसहस्सं एणं तेत्तीसं जोयणसतं आयामविकखंभेणं तिणि जोयणसहस्साइं तिणि य नवणउए जोयणसते परिकखेवेणं पं० एगे एव०, एगे पुण०- ता सव्वावि णं मंडलवता जोयणं बाहल्लेणं एणं जोयणसहस्सं एणं च चउत्तीसं जोयणसयं आयामविकखंभेणं तिणि

जोयणसहस्साइं चत्तारि बिउत्तरे जोयणसते परिकखेवेणं पं० एगे एव०, एगे पुण०- ता जोयणं बाहल्लेणं एगं जोयणसहस्सं एगं च पणतीसं जोयणसतं आयामविकखंभेणं तिन्नि जोयणसहस्साइं चत्तारि पंचुत्तरे जोयणसते परिकखेवेणं पं० एगे एव०, पयं पुण०- ता सव्ववि मंडलवता अडतालीसं एगट्ठिभागे जोयणस्स बाहल्लेणं अणियता आयामविकखंभेणं परिकखेवेणं च आहिताति वदेज्जा, तत्थ णं को हेऊत्ति वदेज्जा ?, ता अयणं जंबुद्वीवे जाव परिकखेवेणं, ता जया णं सूरिए सव्वब्भंतरं मंडलं उवसंकमिता चारं चरति तथा णं सा मंडलवता अडतालीसं एगट्ठिभागे जोयणस्स बाहल्लेणं णवणउइजोयणसहस्साइं छच्च चत्ताले जोयणसते आयामविकखंभेणं तिण्णि जोयणसतसहस्साइं पण्णरसजोयणसहस्साइं एगूणणउत्तिं जोयणाइं किंचिविसेसाहिए परिकखेवेणं, तता णं उत्तमकट्ठपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, से णिकखममाणे सूरिए णवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमिता चारं चरति, ता जया णं सूरिए अब्भितराणंतरं मंडलं उवसंकमिता चारं चरति तदा णं सा मंडलवता अडतालीसं एगट्ठिभागे जोयणस्स बाहल्लेणं णवणवइं जोयणसहस्साइं छच्च पणताले जोयणसते पणतीसं च एगट्ठिभागे जोयणस्स आयामविकखंभेणं तिण्णि जोयणसतसहस्साइं पन्नरसं च सहस्साइं एगं सत्तुत्तरं जोयणतं किंचिविसेसूणं परिकखेवेणं, तदा णं दिवसरातिप्पमाणं तहेव, से णिकखममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमिता चारं चरति, ता जया णं सूरिए अब्भितरं तच्चं मंडलं उवसंकमिता चारं चरति तथा णं सा मंडलवता अडतालीसं एगट्ठिभागे जोयणस्स बाहल्लेणं णवणवतिजोयणसहस्साइं छच्च एक्कावण्णे जोयणसते णव य एगट्ठिभागा जोयणस्स आयामविकखंभेणं तिण्णि जोयणसहस्साइं पन्नरस य सहस्साइं एगं च पणवीसं जोयणसयं परिकखेवेणं पं०, तता णं दिवसराई तहेव, एवं खलु एतेण उवाएणं निक्खममाणे सूरिए तताणंतरातो तदाणंतरं मंडलातो मंडलं उवसंकममाणे २ पंच २ जोयणाइं पणतीसं च एगट्ठिभागे जोयणस्स एगमेगे मंडले विकखंमबाहल्लेणं अभिवट्ठेमाणे २ अट्टारस जोयणाइं परिरयवुट्ठिं अभिवट्ठेमाणे २ सव्वबाहिरं मंडलं उवसंकमिता चारं चरति, ता जया णं सूरिए सव्व० जाव चारं चरति तता णं सा मंडलवता अडतालीसं एगट्ठिभागा जोयणस्स एगं च जोयणसयसहस्सं छच्च सव्वे जोयणसते आयामविकखंभेणं तिन्नि जोयणसयसहस्साइं अट्टारस सहस्साइं तिण्णि य पण्णरसुत्तरे जोयणसते परिकखेवेणं तदा णं उक्कोसिया अट्टारसमुहुत्ता राई भवति जहणए दुवालसमुहुत्ते दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमिता चारं चरति, ता जया णं सूरिए बाहिराणंतरं मंडलं उवसंकमिता चारं चरति तता णं सा मंडलवता अडतालीसं एगट्ठिभागे जोयणस्स बाहल्लेणं एगं जोयणसयसहस्सं छच्च चउपण्णे जोयणसते छव्वीसं च एगट्ठिभागे जोयणस्स आयामविकखंभेणं तिन्नि जोयणसतसहस्साइं अट्टारस सहस्साइं दोण्णि य सत्ताणउत्ते जोयणसते परिकखेवेणं पं०, तता णं राइंदिए तहेव, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिता चारं चरति, ता जया णं सूरिए बाहिरं तच्चं मंडलं उवसंकमिता चारं चरति तता णं सा मंडलवता अडतालीसं एगट्ठिभागे जोयणस्स बाहल्लेणं एगं जोयणसतसहस्सं छच्च अडताले जोयणसए बावणं च एगट्ठिभागे जोयणस्स आयामविकखंभेणं तिण्णि जोयणसतसहस्साइं अट्टारस सहस्साइं दोण्णि अउणासीते जोयणसते परिकखेवेणं पं०, दिवसराई तहेव, एवं खलु एतेणुवाएणं पविसमाणे सूरिए तताणंतरातो तदाणंतरं मंडलातो मंडलं संकममाणे २ पंच जोयणाइं पणतीसं च एगट्ठिभागे जोयणस्स एगमेगे मंडले विकखंभवुट्ठिं णिवुट्ठेमाणे २ अट्टारस जोयणाइं परिरयवुट्ठिं णिवुट्ठेमाणे २ सव्वब्भंतरं मंडलं उवसंकमिता चारं चरति, ता जया णं सूरिए सव्वब्भंतरं मंडलं उवसंकमिता चारं चरति तता णं सा मंडलवता अडतालीसं एगट्ठिभागे जोयणस्स बाहल्लेणं णवणउत्तिं जोयणसहस्साइं छच्च चत्ताले जोयणसए आयामविकखंभेणं तिण्णि जोयणसयसहस्साइं पण्णरस य सहस्साइं अउणाणउत्तिं च जोयणाइं किंचिविसेसाहियाइं परिकखेवेणं पं०, तता णं उत्तमकट्ठपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे, ता सव्वावि णं मंडलवतरियो अडतालीसं एगट्ठिभागे जोयणस्स बाहल्लेणं, सव्वावि णं मंडलंतरिया दो जोयणाइं

विक्रवंभेणं, एस णं अब्बा तेसीयसतपडुप्पणो पंच दसुत्तरे जोयणसते आहि०, ता अब्भितरातो मंडलवताओ बाहिरं मंडलवतं बाहिराओ वा मंडलावताओ अब्भितरं मंडलवतं एस णं अब्बा केवतियं आहि० ?, ता पंच दसुत्तरजोयणसते आहिताति वदेज्जा, अब्भितराते मंडलवताते बाहिरा मंडलवया बाहिराओ मंडलवतातो अब्भितरा मंडलवता एस णं अब्बा केवतियं आहि० ?, ता पंच दसुत्तरे जोयणसते अडतालीसं च एगट्ठिभागे आहि०, ता अब्भितरातो मंडलवतातो बाहिरमंडलवता बाहिरातो० अब्भितरमंडलवता एस णं अब्बा केवतियं आहि० ?, ता पंच णवुत्तरे जोयणसते तेरस य एगट्ठिभागे जोयणस्स आहि०, अब्भितराते मंडलवताए बाहिरा मंडलवया बाहिराते मंडलवताते अब्भितरमंडलवया एस णं अब्बा केवतियं आहिताति वदेज्जा ?, ता पंच दसुत्तरे जोयणसए अआहियत्ति वदेज्जा ।२०☆☆☆

॥१-८॥ ☆☆☆ ता कहं ते तेरिच्छगती आहिताति वदेज्जा ?, तत्थ खलु इमाओ अट्ठ पडिवत्तीओ पं०, तत्थेगे एवमाहंसु- ता पुरच्छिमातो लोअंतातो पादो मरीची आगासंसि उट्ठेति से णं इमं इमं लोयं तिरियं करेइ ता पच्चत्थिमंसि लोगन्तंसि सायंमि सूरिए आगासंसि विद्धस्संति एगे एवमा०, एगे पुण०- ता पुरच्छिमातो लोअंतातो पातो सूरिए आगासंसि उट्ठेइ से णं लोयं तिरियं करेति ता पच्चत्थिमंसि लोयंसि सूरिए आगासंसि विद्धंसति, एगे एव०, एगे पुण०- ता पुरत्थिमाओ लोयंतातो पादो सूरिए आगासंसि उत्तिट्ठति से इमं लोयं तिरियं करेति ता पच्चत्थिमंसि लोयंसि सायं सूरिए आगासं अणुपविसति ता अहे पडियागच्छति ता पुणरवि अवरभूपुरत्थिमातो लोयंतातो पातो सूरिए आगासंसि उत्तिट्ठति एगे एवमा०, एगे पुण०- ता पुरत्थिमाओ लोगंताओ पाओ सूरिए पुढवीओ उत्तिट्ठति, से णं इमं लोयं तिरियं करेति ता पच्चत्थिमिल्लंसि लोयंतंसि सायं सूरिए पुढवीकायंसि विद्धंसइ एगे एव०, एगे पुण०- ता पुरत्थिमाओ लोगंताओ पाओ सूरिए पुढवीओ उत्तिट्ठइ से णं इमं लोयं तिरियं करेइ ता पच्चत्थिमंसि लोयंतंसि सायं सूरिए पुढवीकायं अणुपविसइ ता अहे पडियागच्छइ ता पुणरवि अवरभूपुरत्थिमाओ लोगंताओ पाओ सूरिए पुढवीओ उत्तिट्ठइ एगे एव०, एगे पुण०- ता पुरत्थिमिल्लाओ लोयंताओ पाओ सूरिए आउकायंसि उत्तिट्ठइ से णं इमं लोयं तिरियं करेइ ता पच्चत्थिमंसि लोयंतंसि सायं सूरिए आउकायंसि विद्धंसति एगे एव०, एगे पुण०- ता पुरत्थिमातो लोगंताओ पाओ सूरिए आउओ उत्तिट्ठति, से णं इमं तिरियं लोयं तिरियं करेति ता पच्चत्थिमंसि लोयंतंसि सायं सूरिए आउकायंसि पविसइ ता अहे पडियागच्छति ता पुणरवि अवरभूपुरत्थिमातो लोयंतातो पादो सूरिए आउओ उत्तिट्ठति एगे एव०, एगे पुण०- ता पुरत्थिमातो लोयंताओ बहूइं जोयणाइं बहूइं जोयणसताइं बहूइं जोयणसहस्साइं उड्ढं दूरं उप्पत्तिता एत्थ णं पातो सूरिए आगासंसि उत्तिट्ठति से णं इमं दाहिणद्धं लोयं तिरियं करेति ता उत्तरद्धलोयं तमेव रातो से णं इमं उत्तरद्धलोयं तिरियं करेइ ता दाहिणद्धलोयं तमेव राओ, से णं इमाइं दाहिणुत्तरद्धलोयाइं तिरियं करेइ ता पुरत्थिमाओ लोयंताओ बहूइं जोयणाइं तं चेव उड्ढं दूरं उप्पत्तिता एत्थ णं पातो सूरिए आगासंसि उत्तिट्ठति एगे एव०, वयं पुण एवं वयामो- ता जंबुदीवस्स पाईणपडीणायतउदीणदाहिणायताए जीवाए मंडलं चउव्वीसेणं सतेणं छेत्ता दाहिणपुरच्छिमंसि उत्तरपच्चत्थिमंसि य चउव्वभागमंडलंसि इमीसे रयणप्पभाए पुढवीए बहुसमरमणिज्जातो भूमिभागातो अट्ठ जोयणसताइं उड्ढं उप्पत्तिता एत्थ णं पादो दुवे सूरिया आगासाओ उत्तिट्ठति, ते णं इमाइं दाहिणुत्तराइं जंबुदीवभागाइं तिरियं करेति ता पुरत्थिमपच्चत्थिमाइं जंबुदीवभागाइं तामेव रातो ते णं इमाइं पुरच्छिमपच्चत्थिमाइं जंबुदीवभागाइं तिरियं करेति ता दाहिणुत्तराइं जंबुदीवभागाइं तामेव रातो, ते णं इमाइं दाहिणुत्तराइं पुरच्छिमपच्चत्थिमाणि य जंबुदीवभागाइं तिरियं (१९६) करेति ता जंबुदीवस्स पाईणपडीणायत० एत्थ णं पादो दुवे सूरिया आगासाओ उत्तिट्ठति ।२१ ☆☆☆ ॥२-१॥ ☆☆☆ ता कहं ते मंडलाओ मंडलं संकममाणे २ सूरिए चारं चरति आहि० ?, तत्थ खलु इमाओ दुवे पडिवत्तीओ पं०, तत्थेगे एवमाहंसु- ता मंडलातो मंडलं संकममाणे २ सूरिए भेयघाएणं संकामइ एगे एव०, एगे पुण०- ता मंडलाओ मंडलं संकममाणे सूरिए कण्णकलं णिव्वेढेति, तत्थ जे ते एवमाहंसु ता मंडलातो मंडलं संकममाणे भेयघाएणं संकामइ तेसिं णं अयं दोसे- ता जेणंतरेणं मंडलातो मंडलं संकममाणे २ सूरिए भेयघाएणं संकमति एवतियं च णं अब्भं पुरतो न गच्छति, पुरतो अगच्छमाणे मंडलकालं परिहवेति, तेसिं णं अयं दोसे, तत्थ जे ते एवमाहंसु- ता मंडलातो मंडलं

संकममाणे सूरिए कण्णकलं णिव्वेढेति तेसिं णं अयं विसेसे- ता जेणंतरेणं मंडलातो मंडलं संकममाणे सूरिए कण्णकलं णिव्वेढेति एवतियं च णं अब्बं पुरतो गच्छति पुरतो गच्छमाणे मंडलकालं ण परिह्वेति तेसिं णं अयं विसेसे, तत्थ जे ते एवमाहंसु- मंडलातो मंडलं संकममाणे सूरिए कण्णकलं णिव्वेढेति एतेणं णएणं णेतव्वं, णो चेव णं इतरेणं ॥२२ ★★★★★ ॥२.२॥ ★★★★★ ता केवतियं ते खेत्तं सूरिए एगमेगेणं मुहुत्तेणं गच्छति आहिं ? , तत्थ खलु इमातो चत्तारि पडिवत्तीओ पं०, तत्थ एगे०- ता छ छ जोयणसहस्साइं सूरिए एगमेगेणं मुहुत्तेणं गच्छति एगे०, एगे पुण०- ता पंच पंच जोयणसहस्साइं सूरिए एगमेगेणं मुहुत्तेणं गच्छति एगे एव०, एगे पुण०- ता चत्तारि २ जोयणसहस्साइं सूरिए एगमेगेणं मुहुत्तेणं गच्छति एगे०, एगे पुण०- ता छवि पंचवि चत्तारिवि जोयणसहस्साइं सूरिए एगमेगेणं मुहुत्तेणं गच्छति एगे०, तत्थ जे ते एवमाहंसु ता छ छ जोयणसहस्साइं सूरिए एगमेगेणं मुहुत्तेणं गच्छति ते एव०- जता णं सूरिए सव्वभंतरं मंडलं उवसंकमिता चारं चरति तथा णं उत्तमकट्टपत्ते उक्कोसे अट्टारसमुहुत्ते दिवसे भवति जहणिया दुवालसमुहुत्ता राई भवति, तंसिं च णं दिवसंसि एगं जोयणसतसहस्सं अट्ट य जोयणसहस्साइं तावक्खेत्ते पं०, ता जया णं सूरिए सव्वबाहिरं मंडलं उवसंकमिता चारं चरति तथा णं उत्तमकट्टपत्ता उक्कोसिया अट्टारसमुहुत्ता राई भवति जहणिए दुवालसमुहुत्ते दिवसे भवति, तंसिं च णं दिवसंसि बावत्तरिं जोयणसहस्साइं तावक्खेत्ते पं०, तथा णं छ छ जोयणसहस्साइं सूरिए एगमेगेणं मुहुत्तेणं गच्छति, तत्थ जे ते एवमाहंसु ता पंच जोयणसहस्साइं सूरिए एगमेगेणं मुहुत्तेणं गच्छति ते एव०- ता जता णं सूरिए सव्वभंतरं मंडलं उवसंकमिता चारं चरति, तहेव दिवसराइप्पमाणं, तंसिं च णं तावक्खेत्तं नउइजोयणसहस्साइं, ता जया णं सूरिए सव्वबाहिरं मंडलं उवसंकमिता चारं चरति तता णं तं चेव राइंदियप्पमाणं, तंसिं च णं दिवसंसि सट्ठिं जोयणसहस्साइं तावक्खेत्ते पं०, तता णं पंच २ जोयणसहस्साइं सूरिए एगमेगेणं मुहुत्तेणं गच्छति, तत्थ जे ते एव० ता चत्तारि जोयणसहस्साइं सूरिए एगमेगेणं मुहुत्तेणं गच्छति ते एव०- ता जया णं सूरिए सव्वभंतरं मंडलं उवसंकमिता चारं चरति तता णं दिवसराई तहेव, तंसिं च णं दिवसंसि बावत्तरिं जोयणसहस्साइं तावक्खेत्ते पं०, ता जया णं सूरिए सव्वबाहिरं मंडलं उवसंकमिता चारं चरति तता णं राइंदियं तहेव, तंसिं च णं दिवसंसि अडचालीसं जोयणसहस्साइं तावक्खेत्ते पं०, तता णं चत्तारि २ जोयणसहस्साइं सूरिए एगमेगेणं मुहुत्तेणं गच्छति, तत्थ जे ते एवमाहंसु छवि पंचवि चत्तारिवि जोयणसहस्साइं सूरिए एगमेगेणं मुहुत्तेणं गच्छति ते एव०- ता सूरिए णं उग्गमणमुहुत्तंसि अत्थमणमुहुत्तंसि य सिग्घगती भवति तता णं छ छ जोयणसहस्साइं एगमेगेणं मुहुत्तेणं गच्छति, मज्झिमतावक्खेत्तं समासादेमाणे २ सूरिए मज्झिमगती भवति, तता णं पंच २ जोयणसहस्साइं एगमेगेणं मुहुत्तेणं गच्छति, मज्झिमं तावक्खेत्तं संपत्ते सूरिए मंदगती भवति, तता णं चत्तारि जोयणसहस्साइं एगमेगेणं मुहुत्तेणं गच्छति, तत्थ को हेऊत्ति वदेज्जा ? , ता अयणं जंबुदीवे दीवे जाव परिकखेवेणं, ता जया णं सूरिए सव्वभंतरं मंडलं उवसंकमिता चारं चरति तता णं दिवसराई तहेव तंसिं च णं दिवसंसि एक्काणउत्तिं जोयणसहस्साइं तावक्खेत्ते पं०, ता जया णं सूरिए सव्वबाहिरं मंडलं उवसंकमिता चारं चरति तता णं राइंदियं तहेव, तस्सिं च णं दिवसंसि एगट्ठिजोयणसहस्साइं तावक्खेत्ते पं०, तता णं छवि पंचवि चत्तारिवि जोयणसहस्साइं सूरिए एगमेगेणं मुहुत्तेणं गच्छति एगे एव०, वयं पुण एवं वदामो- ता सातिरेगाइं पंच २ जोयणसहस्साइं सूरिए एगमेगेणं मुहुत्तेणं गच्छति, तत्थ को हेतूत्ति वदेज्जा ? , ता अयणं जंबुदीवे० परिकखेवेणं, ता जता णं सूरिए सव्वभंतरं मंडलं उवसंकमिता चारं चरति तता णं पंच २ जोयणसहस्साइं दोण्णि य एकावण्णे जोयणसए एगूणतीसं च सट्ठिभागे जोयणस्स एगमेगेणं मुहुत्तेणं गच्छति, तता णं इधगतस्स मणूसस्स सीतालीसाए जोयणसहस्सेहिं दोहिं य तेवट्ठेहिं जोयणसतेहिं एकवीसाए य सट्ठिभागेहिं जोयणस्स सूरिए चक्खुप्फासं हव्वमागच्छति, तथा णं दिवसराई तहेव, से णिक्खमाणे सूरिए णवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमिता चारं चरति, ता जया णं सूरिए अब्भितराणंतरं मंडलं उवसंकमिता चारं चरति तता णं पंच २ जोयणसहस्साइं दोण्णि य एकावण्णे जोयणसते सीतालीसं च सट्ठिभागे जोयणस्स एगमेगेणं मुहुत्तेणं गच्छति, तता णं इहगयस्स मणूसस्स सीतालीसाए जोयणसहस्सेहिं अउणासीते य जोयणसतेहिं सत्तावण्णाए

सट्टिभागेहिं जोयणस्स सट्टिभागं च एगसट्टिहा छेत्ता अउणावीसाए चुण्णियाभागेहिं सूरिए चक्खुप्फासं हव्वमागच्छति, तता णं दिवसराई तहेव, (१८ २/६१, १२ २/६१), से णिक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमिता चारं चरति, ता जया णं सूरिए अब्भितरं तच्चं मंडलं उवसंकमिता चारं चरति तता णं पंच २ जोयणसहस्साइं दोण्णि य बावण्णे जोयणसते पंच य सट्टिभागे जोयणस्स एगमेगेणं मुहुत्तेणं गच्छति, तता णं इहगतस्स मणूसस्स सीतालीसाए जोयणसहस्सेहिं छण्णउत्तीए य जोयणेहिं तेत्तीसाए य सट्टिभागेहिं जोयणस्स सट्टिभागं च एगट्टिहा छेत्ता दोहिं चुण्णियाभागेहिं सूरिए चक्खुप्फासं हव्वमागच्छति, तता णं दिवसराई तहेव, एवं खलु एतेणं उवाएणं णिक्खममाणे सूरिए तताणंतराओ तदाणंतरं मंडलातो मंडलं संकममाणे २ अट्टारस २ सट्टिभागे जोयणस्स एगमेगे मंडले मुहुत्तगतिं अभिवुट्ठेमाणे २ चुलसीतिं २ जोयणाइं पुरिसच्छायं णिवुट्ठेमाणे २ सव्वबाहिरं मंडलं उवसंकमिता चारं चरति, ता जया णं सूरिए सव्वबाहिरं मंडलं उवसंकमिता चारं चरति तता णं पंच २ जोयणसहस्साइं तिन्नि य पंचुत्तरे जोयणसते पण्णरस य सट्टिभागे जोयणस्स एगमेगेणं मुहुत्तेणं गच्छति, तता णं इहगतस्स मणूसस्स एकतीसाए जोयणसहस्सेहिं अट्टहिं एकतीसेहिं जोयणसतेहिं तीसाए य सट्टिभागेहिं जोयणस्स सूरिए चक्खुप्फासं हव्वमागच्छति, तता णं उत्तमकट्टपत्ता उक्कोसिया अट्टारसमुहुत्ता राई भवइ जहण्णए दुवालसमुहुत्ते दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमिता चारं चरति, ता जता णं सूरिए बाहिराणंतरं मंडलं उवसंकमिता चारं चरति तता णं पंच २ जोयणसहस्साइं तिण्णि य चउरुत्तरे जोयणसते सत्तावण्णं च सट्टिभागे जोयणस्स मुहुत्तेणं गच्छति, तता णं इधगतस्स मणूसस्स एकतीसाए जोयणसहस्सेहिं नवहि य सोलेहिं जोयणसएहिं एगूणतालीसाए सट्टिभागेहिं जोयणस्स सट्टिभागं च एगट्टिहा छेत्ता सट्टीए चुण्णियाभागेहिं सूरिए चक्खुप्फासं हव्वमागच्छति, तता णं राइंदियं तहेव, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिता चारं चरति, ता जता णं सूरिए बाहिरं तच्चं मंडलं उवसंकमिता चारं चरति तता णं पंच २ जोयणसहस्साइं तिन्नि य चउरुत्तरे जोयणसते ऊतालीसं च सट्टिभागे जोयणस्स एगमेगेणं मुहुत्तेणं गच्छति, तता णं इहगतस्स मणूसस्स एगाधिगेहिं बत्तीसाए जोयणसहस्सेहिं एकावण्णाए य सट्टिभागेहिं जोयणस्स सट्टिभागं च एगट्टिहा छेत्ता तेवीसाए चुण्णियाभागेहिं सूरिए चक्खुप्फासं हव्वमागच्छति, राइंदियं तहेव, एवं खलु एतेणुवाएणं पविसमाणे सूरिए तताणंतरातो तताणंतरं मंडलतो मंडलं संकममाणे २ अट्टारस २ सट्टिभागे जोयणस्स एगमेगे मंडले मुहुत्तगइं णिवुट्ठेमाणे २ सातिरेगाइं पंचासीतिं २ जोयणाइं पुरिसच्छायं अभिवुट्ठेमाणे २ सव्वब्भंतरं मंडलं उवसंकमिता चारं चरति, ता जता णं सूरिए सव्वब्भंतरं मंडलं उवसंकमिता चारं चरति तता णं पञ्च २ जोयणसहस्साइं दोण्णि य एक्कावण्णे जोयणसए अगुणतीसं च सट्टिभागे जोयणस्स एगमेगेणं मुहुत्तेणं गच्छति, तता णं इहगतस्स मणूसस्स सीतालीसाए जोयणसहस्सेहिं दोहि य तेवट्ठेहिं जोयणसतेहिं एकवीसाए य सट्टिभागेहिं जोयणस्स सूरिए चक्खुप्फासं हव्वमागच्छति, तता णं उत्तमकट्टपत्ते उक्कोसए अट्टारसमुहुत्ते दिवसे भवति जहण्णिया दुवालसमुहुत्ता राई भवति, एस णं दोच्चे छम्मासे एस णं दोच्चस्स छम्मास्स पज्जवसाणे एस णं आदिच्चे संवच्छरे एस णं आदिच्चसंवच्छरस्स पज्जवसाणे ★★★ ॥२३॥ बितियं पाहुडं २-३ ॥

★★★ ता केवतियं खेतं चंदिमसूरिया ओभासंति उज्जोवेति तवेति पगासंति आहिं ?, तत्थ खलु इमाओ बारस पडिवत्तीओ पं०, तत्थेगे एवमा०- ता एगं दीवं एगं समुदं चंदिमसूरिया ओभासंति० एगे एव०, एगे० ता तिण्णि दीवे तिण्णि समुदे चंदिमसूरिया ओभासंति० एगे एव०, एगे पुण०- ता अब्बचउत्थे (प्र० आउट्टे) दीवसमुदे चंदिमसूरिया ओभासंति० एगे एव०, एगे पुण०- ता सत्त दीवे सत्त समुदे चंदिमसूरिया ओभासंति० एगे एव०, एगे पुण०- ता दस दीवे दस समुदे चंदिमसूरिया ओभासंति०, एगे पुण०- ता बारस दीवे बारस समुदे चंदिमसूरिया ओभासंति०, एगे पुण०- बायालीसं दीवे बायालीसं समुदे चंदिमसूरिया ओभासंति०, एगे पुण०- बावत्तरिं दीवे बावत्तरिं समुदे चंदिमसूरिया ओभासंति०, एगे पुण०- ता बायालं दीवसतं बायालं समुदसतं चंदिमसूरिया ओभासंति०, एग पुण०- ता बावत्तरिं दीवसतं बावत्तरिं समुदसतं चंदिमसूरिया ओभासंति०, एगे पुण०- ता बायालीसं दीवसहस्सं बायालं समुदसहस्सं चंदिमसूरिया ओभासंति०, एगे पुण०

ता बावत्तरं दीवसहस्सं बावत्तरं समुद्दसहस्सं चंदिमसूरिया ओभासंति० एगे एवमाहंसु, वयं पुण एवं वदामो- अयणं जंबुद्वीवे जाव परिकखेवेणं पं०, से णं एगाए जगतीए सव्वतो समंता संपरिकखित्ते, सा णं जगती तहेव जहा जंबुद्वीवपन्नतीए जाव एवामेव सपुव्वावरेणं जंबुद्वीवे २ चोद्दस सलिलासयसहस्सा छप्पन्नं च सलिलासहस्सा भवन्तीतिमक्खाता, जंबुद्वीवे णं दीवे पंचचक्रभागसंठिता आहिताति वदेज्जा, ता कहं ते जंबुद्वीवे पंचचक्रभागसंठिते आहि० ?, ता जता णं एते दुवे सूरिया सव्वभंभंतरं मंडलं उवसंकमित्ता चारं चरंति तदा णं जंबुद्वीवस्स तिण्णि पंचचउक्कभागे ओभासेति०, तं०- एगेवि एगं दिवहं पंचचक्रभागं ओभासेति० एगेवि एगं दिवहं पंचचक्रभागं ओभासेति, तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवइ, ता जता णं एते दुवे सूरिया सव्वबाहिरं मंडलं उवसंकमित्ता चारं चरंति तदा णं जंबुद्वीवस्स० दोण्णि चक्रभागे ओभासंति०, ता एगेवि एगं पंचचक्रवालभागं ओभासति० एगेवि एक्कं पंचचक्रवालभागं ओभासइ०, तता णं उत्तमकट्टपत्ता उक्कोसिया अट्टारसमुहुत्ता राई भवइ जहणए दुवालसमुहुत्ते दिवसे भवति **☆☆☆ १२४॥ ततियं पाहुडं ३॥** **☆☆☆** ता कहं ते सेआते संठिई आहिता० ?, तत्थ खलु इमा दुविहा संठिती पं० तं०-चंदिमसूरियसंठिती य तावखेत्तसंठिती य, ता कहं ते चंदिमसूरियसंठिती आहिता० ?, तत्थ खलु इमातो सोलस पडिवत्तीओ पं०, तत्थेगे एवमाहंसु-ता समचउरंससंठिता चंदिमसूरियसंठिती एगे एव०, एगे पुण०, ता विसमचउरंससंठिता चंदिमसूरियसंठिती पं०, एवं समचउक्कोणसंठिता विसमचउक्कोणसंठिया समचक्रवालसंठिता विसमचक्रवालसंठिता चक्रच्चक्रवालसंठिता पं० एगे एव०, एगे पुण०-ता छत्तागारसंठिता चंदिमसूरियसंठिती पं०, गेहसंठिता गेहावणसंठिता पासादसंठिता गोपुरसंठिया पेच्छाघरसंठिता वलभीसंठिता हम्मियतलसंठिता वालगपोतियासंठिता चंदिमसूरियसंठिती पं०, तत्थ जे ते एवमा०-ता समचउरंससंठिता चंदिमसूरियसंठिती पं० एतेणं णएणं णेतव्वं, णो चेव णं इतरेहिं, ता कहं ते तावक्खेत्तसंठिती आहिता० ?, तत्थ खलु इमाओ सोलस पडिवत्तीओ पं०, तत्थ णं एगे एवमाहंसु-ता गेहसंठिता तावक्खेत्तसंठिती पं०, एवं जाव वालगपोतियासंठिता तावक्खेत्तसंठिती, एगे पुण एवमा०-ता जस्संठिते जंबुद्वीवे तस्संठिता तावक्खेत्तसंठिती एगे एव०, एगे पुण०-ता जस्संठिते भारहे वासे तस्सं०, एवं उज्जाणसंठिया निज्जाणसंठिता एगतो णिसहसंठिता दुहतो णिसहसंठिता सेयणगससंठिता एगे एव०, एगे पुण० ता सेणगपट्टसंठिता तावक्खेत्तसं० एगे एवमाहंसु, वयं पुण एवं वदामो-ता उद्धीमुहकलंबुआपुप्फसंठिता तावक्खेत्तसंठिती पं० अंतो संकुडा बाहिं वित्थडा अंतो वट्ठा बाहिं पिधुला अंतो अंकमुहसंठिता बाहिं सत्थिमुहसंठिता उभतो पासेणं तीसे दुवे बाहाओ अवट्ठिताओ भवंति पणतालीसं २ जोयणसहस्साइं आयामेणं, दुवे य णं तीसे बाहाओ अणवट्ठिताओ भवंति, तं०- सव्वभंभंतरिया चेव बाहा सव्वबाहिरिया चेव बाहा, तत्थ को हेतूत्ति वदेज्जा ?, ता अयणं जंबुद्वीवे जाव परिकखेवेणं, ता जया णं सूरिए सव्वभंभंतरं मंडलं उवसंकमित्ता चारं चरंति तता णं उद्धीमुहकलंबुआपुप्फसंठिता तावक्खेत्तसंठिती आहिताति वदेज्जा अंतो संकुडा बाहिं वित्थडा अंतो वट्ठा बाहिं पिधुला अंतो अंकमुहसंठिता बाहिं सत्थिमुहसंठिआ, दुहतो पासेणं तीसे तथेव जाव सव्वबाहिरिया चेव बाहा, तीसे णं सव्वभंभंतरिया बाहा मंदरपव्वयंतेणं णव जोयणसहस्साइं चत्तारि य छलसीते जोयणसते णव य दसभागे जोयणस्स परिकखेवेणं आहिता०, ता से णं परिकखेवविसेसे कतो आहिता० ?, ता जे णं मंदरस्स पव्वयस्स परिकखेवे तं परिकखेवं तीहिं गुणित्ता दसहिं छित्ता दसहिं भागे हीरमाणे एस णं परिकखेवविसेसे आहिता०, तीसे णं सव्वबाहिरिया बाहा लवणसमुद्धंतेणं चउणउतिं जोयणसहस्साइं अट्ठ य अट्ठसट्ठे जोयणसते चत्तारि य दसभागे जोयणस्स परिकखेवेणं आहिता०, ता से णं परिकखेवविसेसे कतो आहिता० ?, ता जे णं जंबुद्वीवस्स परिकखेवे तं परिकखेवे तीहिं गुणित्ता दसहिं छेत्ता दसहिं भागे हीरमाणे एस णं परिकखेवविसेसे आहिताति वदेज्जा, तीसे णं तावक्खेत्ते केवतियं आयामेणं आहिताति वदेज्जा ?, ता अट्ठत्तरीं जोयणसहस्साइं तिण्णि य तेत्तीसे जोयणसते जोयणतिभागे य आयामेणं आहितेति वदेज्जा, तया णं किंसंठिया अंधगारसंठिई आहितेति वदेज्जा ?, उद्धीमुहकलंबुआपुप्फसंठिता तहेव जाव बाहिरिया चेव बाहा, तीसे णं सव्वभंभंतरिया बाहा मंदरपव्वयंतेणं छज्जोयणसहस्साइं तिण्णि य

चउवीसे जोयणसते छच्च दसभागे जोयणस्स परिक्खेवेणं आहितेतिवदेज्जा, ता से णं परिक्खेवविसेसे कतो आहिते० ?, ता जे णं मंदरस्स पव्वयस्स परिक्खेवे तं परिक्खेवं दोहिं गुणेत्ता सेसं तहेव, तीसे णं सव्वबाहिरिया बाहा लवणसमुद्धंतेणं तेवट्ठिं जोयणसहस्साइं दोणिं य पणयाले जोयणसते छच्च दसभागे जोयणस्स परिक्खेवेणं आहिते०, ता से णं परिक्खेवविसेसे कतो आहिते० ?, ता जे णं जंबुद्दीवस्स परिक्खेवे तं परिक्खेवं दोहिं गुणिता दसहिं छेत्ता दसहिं भागे हीरमाणे एस णं परिक्खेवविसेसे आहिते०, ता से णं अंधकारे केवतियं आयामेणं आहिते० ?, ता अट्ठत्तरिं जोयणसहस्साइं तिणिं य तेत्तीसे जोयणसते जोयणतिभागं च आयामेणं आहितेति वदेज्जा, तता णं उत्तमकट्ठपत्ते अट्ठारसमुहुत्ते दिवसे भवति जहणिया दुवालसमुहुत्ता राई भवइ, ता जया णं सूरिए सव्वबाहिरं मंडलं उवसंकमिता चारं चरति तता णं किंसंठिता तावक्खेत्तसंठिती आहिता० ?, ता उद्धीमुहकलंबुयापुप्फसंठिता तावक्खेत्तसंठिती आहिता०, एवं जं अब्भितरमंडले अंधकारसंठितीए पमाणं तं बाहिरमंडले तावक्खेत्तसंठितीए जं तहिं तावक्खेत्तसंठितीए तं बाहिरमंडले अंधकारसंठितीए भाणियव्वं जाव तता णं उत्तमकट्ठपत्ता उक्कोसिया अट्ठारसमुहुत्ता राई भवति जहणिए दुवालसमुहुत्ते दिवसे भवति, ता जंबुद्दीवे सूरिया केवतिया खेत्तं उड्ढं तवंति केवतियं खेत्तं अहे तवंति केवतियं खेत्तं तिरियं तवंति ?, ता जंबुद्दीवे णं दीवे सूरिया एणं जोयणसतं उड्ढं तवंति अट्ठारस जोयणसताइं अधे तवंति सीतालीसं जोयणसहस्साइं दुन्नि य तेवट्ठे जोयणसते एक्कवीसं च सट्ठिभागे जोयणस्स तिरियं तवंति **☆☆☆॥२५॥ चउत्थं पाहुंडं ४॥☆☆☆** ता कंसि णं सूरियस्स लेस्सा पडिहताति वदेज्जा ?, तत्थ खलु इमाओ वीसं पडिवत्तीओ पं०, तत्थेगे एव०-ता मंदरंसि णं पव्वतंसि सूरियस्स लेस्सा पडिहता० एगे एव०, एगे पुण एव०-ता मेरुंसि णं पव्वतंसि सूरियस्स लेस्सा पडिहता० एगे एव०, एवं एतेणं अभिलावेणं भाणियव्वं, ता मणोरमंसि णं पव्वयंसि ता सुदंसणंसि णं पव्वयंसि ता सयंपभंसि णं पव्वतंसि ता गिरिरायंसि णं पव्वतंसि ता रतणुच्चयंसि णं पव्वतंसि ता सिलुच्चयंसि णं पव्वयंसि ता लोअमज्झंसि णं पव्वतंसि ता लोयणाभिसि णं पव्वतंसि ता अच्छंसि णं पव्वतंसि ता सूरियावत्तंसि णं पव्वतंसि ता सूरियावरणंसि णं पव्वतंसि ता उत्तमंसि णं पव्वयंसि ता दिसादिसि णं पव्वतंसि ता अवतंसंसि णं पव्वतंसि ता धरणिखीलंसि णं पव्वयंसि ता धरणिसिगंसि णं पव्वयंसि ता पव्वतिंदंसि णं पव्वतंसि ता पव्वयरायंसि णं पव्वयंसि सूरियस्स लेसा पडिहता आहिताति वदेज्जा एगे एव०, वयं पुण एवं वदामो-ता मंदरेवि पवुच्चति जाव पव्वयरायावि वुच्चति, ता जे णं पुग्गला सूरियस्स लेसं फुसंति ते णं पुग्गला सूरियस्स लेसं पडिहणंति, अदिट्ठावि णं पोग्गला सूरियस्स लेस्सं पडिहणंति चरिमलेसंतरगतावि णं पोग्गला सूरियस्स लेस्सं पडिहणंति **☆☆☆ ॥२६॥ पंचमं पाहुंडं ५॥ ☆☆☆** ता कहां ते ओयसंठिती आहिताति वदेज्जा ?, तत्थ खलु इमाओ पणवीसं पडिवत्तीओ पं०, तत्थेगे एवमाहंसु-ता अणुसमयमेव सूरियस्स ओया अण्णा उप्पज्जे अण्णा अवेति एगे एवमाहंसु, एगे पुण०-ता अणुमुहुत्तमेव सूरियस्स ओया अण्णा उप्पज्जति अण्णा अवेति, एतेणं अभिलावेणं णेतव्वा, ता अणुराइंदियमेव ता अणुपक्खमेव ता अणुमासमेव ता अणुउउमेव ता अणुअयणमेव ता अणुसंवच्छरमेव ता अणुजुगमेव ता अणुवाससयमेव ता अणुवाससहस्समेव ता अणुवाससयसहस्समेव ता अणुपुव्वमेव ता अणुपुव्वसयमेव ता अणुपुव्वसहस्समेव ता अणुपुव्वसतसहस्समेव ता अणुपलितोवममेव ता अणुपलितोवमसतमेव ता अणुपलितोवमसहस्समेव ता अणुपलितोवमसयसहस्समेव ता अणुसागरोवममेव ता अणुसागरोवमसतमेव ता अणुसागरोवमसहस्समेव ता अणुसागरोवमसयसहस्समेव एगे एवमाहंसु ता अणुउस्सप्पिणीओसप्पिणिमेव सूरियस्स ओया अण्णा उप्पज्जति अण्णा अवेति एगे एवमाहंसु, वयं पुण एवं वदामो-ता तीसं २ मुहुत्ते सूरियस्स ओया अवट्ठिता भवति, तेणं परं सूरियस्स ओया अणवट्ठिता भवति, छम्मासे सूरिए ओयं णिवुड्ढेति छम्मासे सूरिए ओयं अभिवड्ढेति, णिक्खममाणे सूरिए देसं णिवुड्ढेति पविसमाणे सूरिए देसं अभिवुड्ढेइ, तत्थ को हेतूति वदेज्जा ?, ता अयणं जंबुद्दीवे सव्वदीवसमुद्धानं जाव परिक्खेवेणं, ता जया णं सूरिए सव्वब्भंतरं मंडलं उव० चारं चरति तता णं उत्तमकट्ठपत्ते उक्कोसिए अट्ठारसमुहुत्ते दिवसे भवति जहणिया दुवालसमुहुत्ता राई भवति, से णिक्खममाणे सूरिए णवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमिता चारं चरति,

ता जया णं सूरिए अब्भितराणंतरं मंडलं उवसंकमिता चारं चरति तता णं एगेणं राइंदिएणं एगं भागं ओयाए दिवसखेत्तस्स णिवुड्हित्ता रतणिकखेत्तस्स अभिवड्हित्ता चारं चरति मंडलं अट्टारसहिं तीसेहिं सतेहिं छित्ता, तता णं अट्टारसमुहुत्ते दिवसे भवति दोहिं एगट्ठिभागमुहुत्तेहिं ऊणे दुवालसमुहुत्ता राई भवति दोहिं एगट्ठिभागमुहुत्तेहिं अहिया, से णिकखममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमिता चारं चरति, ता जया णं सूरिए अब्भितरं तच्चं मंडलं उवसंकमिता चारं चरति तता णं दोहिं राइंदिएहिं दो भागे ओयाए दिवसखेत्तस्स णिवुड्हित्ता रयणिकखेत्तस्स अभिवड्हित्ता चारं चरति मंडलं अट्टारसतीसेहिं सएहिं छेत्ता, तता णं अट्टारसमुहुत्ते दिवसे भवति चउहिं एगट्ठिभागमुहुत्तेहिं ऊणे दुवालसमुहुत्ता राई भवति चउहिं एगट्ठिभागमुहुत्तेहिं अहिया, एवं खलु एतेणुवाएणं निक्खममाणे सूरिए तयाणंतराओ तदाणंतरं मंडलातो मंडलं संकममाणे २ एगमेगे मंडले एगमेगेणं राइंदिएणं एगमेगं भागं ओयाए दिवसखेत्तस्स णिवुड्हित्ता २ रयणिकखेत्तस्स अभिवड्हित्ता २ सव्वबाहिरं मंडलं उवसंकमिता चारं चरति, ता जया णं सूरिए सव्वब्भंतरातो मंडलातो सव्वबाहिरं मंडलं उवसंकमिता चारं चरति तता णं सव्वब्भंतरं मंडलं पणिधाय एगेणं तेसीतेणं राइंदियसतेणं संगं तेसीतं भागसतं ओयाए दिवसखेत्तस्स णिवुड्हित्ता रयणिकखेत्तस्स अभिवड्हित्ता चारं चरति मंडलं अट्टारसहिं तीसेहिं सयेहिं छेत्ता, तता णं उत्तमकट्टपत्ता उक्को० अट्टारसमुहुत्ता राई भवति जह० दुवालसमुहुत्ते दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमिता चारं चरति, ता जया णं सूरिए बाहिराणंतरं मंडलं उवसंकमिता चारं चरति तता णं एगेणं राइंदिएणं एगं भागं ओयाए रतणिकखेत्तस्स णिवुड्हित्ता दिवसखेत्तस्स अभिवड्हित्ता चारं चरति मंडलं अट्टारसहिं तीसेहिं सएहिं छेत्ता, तता णं अट्टारसमुहुत्ता राई भवति दोहिं एगट्ठिभागमुहुत्तेहिं ऊणा दुवालसमुहुत्ते दिवसे भवति दोहिं एगट्ठिभागमुहुत्तेहिं अधिए, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिता चारं चरति, ता जया णं सूरिए बाहिरं तच्चं मंडलं उवसंकमिता चारं चरति तता णं दोहिं राइंदिएहिं दो भाग ओयाए रयणिकखेत्तस्स णिवुड्हित्ता दिवसखेत्तस्स अभिवड्हित्ता चारं चरति मंडलं अट्टारसहिं तीसेहिं सएहिं छेत्ता, तया णं अट्टारसमुहुत्ता राई भवति चउहिं एगट्ठिभागमुहुत्तेहिं ऊणा दुवालसमुहुत्ते दिवसे भवति चउहिं एगट्ठिभागमुहुत्तेहिं अधिए, एवं खलु एतेणुवाएणं पविसमाणे सूरिए तताणंतरातो तदाणंतरं मंडलातो मंडलं संकममाणे २ एगमेगे मंडले एगमेगेणं राइंदिएणं एगमेगं भागं ओयाए रयणिकखेत्तस्स णिवुड्हित्ता २ दिवसखेत्तस्स अभिवड्हित्ता २ सव्वब्भंतरं मंडलं उवसंकमिता चारं चरति ता जया णं सूरिए सव्वबाहिरातो मंडलातो सव्वब्भंतरं मंडलं उवसंकमिता चारं चरति तता णं (१९७) सव्वबाहिरं मंडलं पणिधाय एगेणं तेसीतेणं राइंदियसएणं एगं तेसीतं भागसतं ओयाए रयणिकखेत्तस्स णिवुड्हित्ता दिवसखेत्तस्स अभिवड्हित्ता चारं चरति मंडलं अट्टारसतीसेहिं सएहिं छेत्ता, तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे ★★★ । २७। छट्ठं पाहुडं ६॥ ★★★ ता के ते सूरियं वरंति आहिताति वदेज्जा ?, तत्थ खलु इमाओ वीसं पडिवत्तीओ पं०, तत्थेगे एवमाहंसुता मंदरे णं पव्वते सूरियं वरयति आहितेति वदेज्जा एगे एवमा०, एगे पुण०-ता मेरू णं पव्वते सूरियं वरति आहि०, एवं एएणं अभिलावेणं णेतव्वं जाव पव्वतराये णं पव्वते सूरियं वरयति आहिते० तं एगे एवमाहंसु, वयं पुण एवं वदामो-ता मंदरेवि पवुच्चति तहेव जाव पव्वतराएवि पवुच्चति, ता जे णं पोग्गला सूरियस्स लेसं फुसंति ते पोग्गला सूरियं वरयंति अदिट्ठावि णं पोग्गला सूरियं वरयंति, चरमलेसंतरगतावि णं पोग्गला सूरियं वरयति

★★★ । २८॥ सत्तमं पाहुडं ॥ ★★★ ता कहं ते उदयसंठिती आहितेति वदेज्जा ?, तत्थ खलु इमाओ तिण्णि पडिवत्तीओ पं०, तत्थेगे एवमाहंसु-ता जया णं जंबुदीवे० दाहिणड्ढे अट्टारसमुहुत्ते दिवसे भवति तता णं उत्तरड्ढेवि अट्टारसमुहुत्ते दिवसे भवति जया णं उत्तरड्ढे अट्टारसमुहुत्ते दिवसे भवति तया णं दाहिणड्ढेऽवि अट्टारसमुहुत्ते दिवसे भवति, जदा णं जंबुदीवे दाहिणड्ढे सत्तरसमुहुत्ते दिवसे भवति तया णं उत्तरड्ढेवि सत्तरसमुहुत्ते दिवसे भवति, जया णं उत्तरड्ढे सत्तरसमुहुत्ते

दिवसे भवति तदा णं दाहिणइडेवि सत्तरसमुहुत्ते दिवसे भवति, एवं परिहावेतव्वं, सोलसमुहुत्ते दिवसे पण्णरस० दिवसे चउदस० दिवसे तेरस० दिवसे जाव ता जया णं जंबुद्दीवे दाहिणइडे बारसमुहुत्ते दिवसे तथा णं उत्तरद्धेवि बारसमुहुत्ते दिवसे भवति, जता णं उत्तरद्धे बारसमुहुत्ते दिवसे भवति तता णं दाहिणद्धेवि बारसमुहुत्ते दिवसे भवति, जता णं दाहिणद्धे बारसमुहुत्ते दिवसे भवति तता णं जंबुद्दीवे मंदरस्स पव्वयस्स पुरच्छिमपच्चत्थिमेणं सता पण्णरसमुहुत्ते दिवसे भवति सदा पण्णरसमुहुत्ता राई भवति, अवट्ठिता णं तत्थ राईदिया पं० समणाउसो ! एगे एव०, एगे पुण०-जता णं जंबुद्दीवे दाहिणद्धे अट्टारसमुहुत्ताणंतरे दिवसे भवति तथा णं उत्तरद्धेवि अट्टारसमुहुत्ताणंतरे दिवसे भवइ, जया णं उत्तरद्धे अट्टारसमुहुत्ताणंतरे दिवसे भवइ तता णं दाहिणइडेवि अट्टारसमुहुत्ताणंतरे दिवसे भवइ, एवं परिहावेतव्वं, सत्तरसमुहुत्ताणंतरे दिवसे भवति सोलसमुहुत्ताणंतरे० पण्णरसमुहुत्ताणंतरे० चोदसमुहुत्ताणंतरे० तेरसमुहुत्ताणंतरे०, जया णं जंबुद्दीवे दाहिणद्धे बारसमुहुत्ताणंतरे दिवसे भवति तदा णं उत्तरद्धेवि बारसमुहुत्ताणंतरे दिवसे, जता णं उत्तरद्धे बारसमुहुत्ताणंतरे दिवसे भवइ तथा णं दाहिणद्धेवि बारसमुहुत्ताणंतरे दिवसे भवति तदा णं जंबुद्दीवे २ मंदरस्स पव्वयस्स पुरत्थिमपच्चत्थिमेणं णो सदा पण्णरसमुहुत्ते दिवसे भवति णो सदा पण्णरसमुहुत्ता राई भवति, अणवट्ठिता णं तत्थ राईदिया पं० समणाउसो ! एगे एव०, एगे पुण०-ता जया णं जंबुद्दीवे २ दाहिणइडे अट्टारसमुहुत्ते दिवसे भवति तदा णं उत्तरद्धे दुवालसमुहुत्ता राई भवति जया णं उत्तरइडे अट्टारसमुहुत्ते दिवसे भवति तदा णं दाहिणइडे बारसमुहुत्ता राई भवइ जया णं दाहिणइडे अट्टारसमुहुत्ताणंतरे दिवसे भवति तदा णं उत्तरद्धे बारसमुहुत्ता राई भवइ, जता णं उत्तरद्धे अट्टारसमुहुत्ताणंतरे दिवसे भवति तदा णं दाहिणद्धे बारसमुहुत्ता राई भवति, एवं णेतव्वं सगलेहि य अणंतरेहि य एक्केके दो दो आलावगा, सव्वहिं दुवालसमुहुत्ता राई भवति, जाव ता जता णं जंबुद्दीवे दाहिणद्धे बारसमुहुत्ताणंतरे दिवसे भवति तदा णं उत्तरद्धे दुवालसमुहुत्ता राई भवति जया णं उत्तरद्धे दुवालसमुहुत्ताणंतरे दिवसे भवति तदा णं दाहिणद्धे दुवालसमुहुत्ता राई भवति, तता णं जंबुद्दीवे मन्दरस्स पव्वयस्स पुरत्थिमपच्चत्थिमेणं णेवत्थि पण्णरसमुहुत्ते दिवसे भवति णेवत्थि पण्णरसमुहुत्ता राई भवति, वोच्छिण्णा णं तत्थ राईदिया पं० समणाउसो ! एगे एवमा०, वयं पुण एवं वदामो-ता जंबुद्दीवे २ सूरिया उदीणपाईणमुग्गच्छ पाईणदाहिणमागच्छंति, पाईणदाहिणमुग्गच्छ दाहिणपडीणमागच्छंति, दाहिणपडीणमुग्गच्छ पडीणउदीणमागच्छन्ति पडीणउदीणमुग्गच्छ उदीणपाईणमागच्छन्ति, ता जता णं जंबुद्दीवे दीवे दाहिणद्धे दिवसे भवति तदा णं उत्तरद्धे दिवसे भवति, जदा णं उ० तदा णं जंबुद्दीवे दीवे मंदरस्स पव्वयस्स पुरच्छिमपच्चत्थिमेणं राई भवति, ता जया णं जंबुद्दीवे २ मंदरस्स पव्वयस्स पुरत्थिमेणं दिवसे भवति तदा णं पच्चत्थिमेणवि दिवसे भवति, जया णं पच्चत्थिमेणं दिवसे भवति तदा णं जंबुद्दीवे २ मंदरस्स पव्वयस्स उत्तरदाहिणेणं राई भवति, ता जया णं दाहिणद्धेवि उक्कोसए अट्टारसमुहुत्ते दिवसे भवति तथा णं उत्तरद्धे उक्कोसए अट्टारसमुहुत्ते दिवसे भवति, जदा उत्तरद्धे० तदा णं जंबुद्दीवे दीवे मंदरस्स पव्वयस्स पुरत्थिमेणं जहणिया दुवालसमुहुत्ता राई भवति, ता जया णं जंबुद्दीवे दीवे मन्दरस्स पव्वतस्स पुरच्छिमेणं उक्कोसए अट्टारसमुहुत्ते दिवसे भवति तता णं पच्चत्थिमेणं उक्कोसए अट्टारसमुहुत्ते दिवसे भवति, जता णं पच्चत्थिमेणवि उक्कोसए अट्टारसमुहुत्ते दिवसे भवति तता णं जंबुद्दीवे दीवे मंदरस्स पव्वयस्स उत्तरदाहिणेणं जहणिया दुवालसमुहुत्ता राई भवति, एवं एणं गमेणं णेतव्वं, अट्टारसमुहुत्ताणंतरे दिवसे सातिरेगदुवालसमुहुत्ता राई भवति, सत्तरसमुहुत्ते दिवसे तेरसमुहुत्ता राई सत्तरसमुहुत्ताणंतरे दिवसे सातिरेगतेरसमुहुत्ता राई सोलसमुहुत्ते दिवसे चोदसमुहुत्ता राई सोलसमुहुत्ताणंतरे दिवसे सातिरेगचोदसमुहुत्ता राई पण्णरसमुहुत्ते दिवसे पण्णरसमुहुत्ता राई पण्णरसमुहुत्ताणंतरे दिवसे सातिरेगपण्णरसमुहुत्ता राई भवइ चउदसमुहुत्ते दिवसे सोलसमुहुत्ता राई चोदसमुहुत्ताणंतरे दिवसे सातिरेगसोलसमुहुत्ता राई तेरसमुहुत्ते दिवसे सत्तरसमुहुत्ता राई, तेरसमुहुत्ताणंतरे दिवसे सातिरेगसत्तरसमुहुत्ता राई, जहण्णए दुवालसमुहुत्ते दिवसे भवति उक्कोसिया अट्टारसमुहुत्ता राई भवइ, एवं भणितव्वं, ता जया णं जंबुद्दीवे दीवे दाहिणद्धे वासाणं पढमे समए पडिवज्जति तता णं उत्तरद्धेवि वासाणं पढमे समए पडिवज्जति, जता णं उत्तरद्धे वासाणं पढमे समए पडिवज्जति तता णं जंबुद्दीवे मंदरस्स पव्वयस्स पुरच्छिमपत्थिमेणं अणंतरपुरक्खडकालसमयंसि वासाणं पढमे समए पडिवज्जइ, ता जया णं जंबुद्दीवे० मंदरस्स पव्वयस्स पुरच्छिमेणं

वासाणं पढमे समए पडिवज्जइ तता णं पच्चत्थिमेणवि वासाणं पढमे समए पडिवज्जइ, जया णं पच्चत्थिमेणं वासाणं पढमे समए पडिवज्जइ तता णं जंबुद्दीवे मंदरदाहिणेणं अणंतरपच्छाकयकालसमयंसि वासाणं पढमे समए पडिवण्णे भवति, जहा समओ एवं आवलिया आणापाणू थोवे लवे मुहुत्ते अहोरत्ते पक्खे मासे उऊ, एवं दस आलावगा जहा वासाणं एवं हेमंताणं गिम्हाणं च भाणितव्वा, ता जता णं जंबुद्दीवे दाहिणद्धे पढमे अयणे पडिवज्जति तदा णं उत्तरद्धेवि पढमे अयणे पडिवज्जइ जता णं उत्तरद्धे पढमे अयणे पडिवज्जति तदा णं दाहिणद्धेवि पढमे अयणे पडिवज्जइ, जता णं उत्तरद्धे पढमे अयणे पडिवज्जति तता णं जंबुद्दीवे मंदरस्स पव्वयस्स पुरत्थिमपच्चत्थिमेणं अणंतरपुरक्खडकालसमयंसि पढमे अयणे पडिवज्जति, ता जया णं जंबुद्दीवे मंदरस्स पव्वयस्स पुरत्थिमेणं पढमे अयणे पडिवज्जति तता णं पच्चत्थिमेणवि पढमे अयणे पडिवज्जइ, जया णं पच्चत्थिमेणं पढमे अयणे पडिवज्जइ तदा णं जंबुद्दीवे मंदरस्स पव्वयस्स उत्तरदाहिणेणं अणंतरपच्छाकडकालसमयंसि पढमे अयणे पडिवण्णे भवति, जहा अयणे तहा संवच्छरे जुगे वाससते, एवं वाससहस्से वाससयसहस्से पुव्वंगे पुव्वे एवं जाव सीसपहेलिया पलितोवमे सागरोवमे, ता जया णं जंबुद्दीवे दाहिणद्धे ओसप्पिणी पडिवज्जति तता णं उत्तरद्धेवि ओसप्पिणी पडिवज्जति, जता णं उत्तरद्धे ओसप्पिणी पडिवज्जति तता णं जंबुद्दीवे मंदरस्स पव्वयस्स पुरत्थिमपच्चत्थिमेणं णेवत्थि ओसप्पिणी णेव अत्थि उस्सप्पिणी अवट्ठिते णं तत्थ काले पं० समणाउसो !, एवं उस्सप्पिणीवि, ता जया णं लवणे समुद्धे दाहिणद्धे दिवसे भवति तता णं लवणसमुद्धे उत्तरद्धे दिवसे भवति जता णं उत्तरद्धे दिवसे भवति तता णं लवणसमुद्धे पुरच्छिमपच्चत्थिमेणं राई भवति, जहा जंबुद्दीवे तहेव जाव उस्सप्पिणी तहा धायइसंडे णं दीवे सूरिया ओदीण० तहेव, ता जता णं धायइसंडे दीवे दाहिणद्धे दिवसे भवति तता णं उत्तरद्धेवि दिवसे भवति, जता णं उत्तरद्धे दिवसे भवति तता णं धायइसंडे दीवे मंदराणं पव्वताणं पुरत्थिमपच्चत्थिमेणं राई भवति, एवं जंबुद्दीवे जहा तहेव जाव उस्सप्पिणी, कालोए णं जहा लवणे समुद्धे तहेव, ता अब्भंतरपुक्खरद्धे णं सूरिया उदीणपाईणमुग्गच्छ तहेव ता जया णं अब्भंतरपुक्खरद्धे णं दाहिणद्धे दिवसे भवति तदा णं उत्तरद्धेवि दिवसे भवति, जता णं उत्तरद्धे दिवसे भवति तता णं अब्भंतरपुक्खरद्धे मंदराणं पव्वताणं पुरत्थिमपच्चत्थिमे णं राई भवति, सेसं जहा जंबुद्दीवे तहेव जाव ओस्सप्पिणीउसप्पिणीओ ☆☆☆ ॥२९॥ अड्डमं पाहुडं ८ ॥ ☆☆☆ ता कतिकड्डं ते सूरिए पोरिसीच्छायं णिव्वत्तेति आहिते० ?, तत्थ खलु इमाओ तिण्णि पडिवत्तीओ पं०, तत्थेगे एवमाहंसु-जे णं पोग्गला सूरियस्स लेसं फुसंति ते णं पोग्गला संतप्पंति, ते णं पोग्गला संतप्पमाणा तदणंतराई बाहिराई पोग्गलाई संतावेत्तीति एस णं से समिते तावक्खेत्ते एगे०, एगे पुण०-ता जे णं पोग्गला सूरियस्स लेसं फुसंति ते णं पोग्गला नो संतप्पंति, ते णं पोग्गला असंतप्पमाणा तदणंतराई बाहिराई पोग्गलाई णो संतावेत्तीति एस णं से समिते तावक्खेत्ते एगे एव०, एगे पुण०-ता जे णं पोग्गला सूरियस्स लेसं फुसंति ते णं पोग्गला अत्थेगतिया संतप्पंति अत्थेगतिया णो संतप्पंति, तत्थ अत्थेगइआ संतप्पमाणा तदणतराई बाहिराई पोग्गलाई अत्थेगतियाई संतावेत्ति अत्थेगतियाई णो संतावेत्ति, एस णं से समिते तावक्खेत्ते एगे एव०, वयं पुण एवं वदामो-ता जाओ इमाओ चंदिमसूरियाणं देवाणं विमाणेहिंतो लेसाओ बहित्ता उच्छूढा अभिणिसट्ठाओ एतावंति, एतासि णं लेसाणं अंतरेसु अण्णतरीओ छिण्णलेसाओ संमुच्छंति, तते णं ताओ छिण्णलेस्साओ समुच्छियाओ समाणीओ तदणंतराई बाहिराई पोग्गलाई संतावेत्तीति एस णं से समिते तावक्खेत्ते ॥३०॥ ता कतिकड्डे ते सूरिए पोरिसीच्छायं णिव्वत्तेति आहितेति वदेज्जा ?, तत्थ खलु इमाओ पणवीसं पडिवत्ताओ पं०, तत्थेगे एवं० ता अणुसमयमेव सूरिए पोरिसिच्छायं णिव्वत्तेइं आहिते० एगे एव०, एगे पुण०-ता अणुमुहुत्तमेव सूरिए पोरिसिच्छायं णिव्वत्तेति आहिते०, एतेणं अभिलावेणं णेतव्वं, ता जाओ चेव ओयसंठितीए पणुवीसं पडिवत्तीओ ताओ चेव णेतव्वाओ जाव अणुउस्सप्पिणीमेव सूरिए पोरिसीए च्छायं णिव्वत्तेति आहिता० एगे एवं०, वयं पुण एवं वदामो-ता सूरियस्स णं उच्चत्तं च लेसं च पडुच्च छाउद्देसे उच्चत्तं च छायां च पडुच्च लेसुद्देसे लेसं च छायां च पडुच्च उच्चतोद्देसे, तत्थ खलु इमाओ दुवे पडिवत्तीओ पं०, तत्थेगे एवं०-ता अत्थि णं से दिवसे जंसि णं दिवसंसि सूरिए चउपोरिसीदछायं निव्वत्तेइ, अत्थि णं से दिवसे जंसि णं दिवसंसि सूरिए

दुपोरिसीच्छायं निव्वत्तेइ० एगे०, एगे पुण०-अत्थि णं से दिवसे जंसि णं दिवसंसि सूरिए दुपोरिसीदछायं णिव्वत्तेइ एगे एवं०, एगे पुण०-ता अत्थि णं से दिवसे जंसि णं दिवसंसि सूरिए दुपोरिसीच्छायं णिव्वत्तेति अत्थि णं से दिवसे जंसि णं दिवसंसि सूरिए नो किंचि पोरिसिच्छायं णिव्वत्तेति, तत्थ जे ते एवमाहंसु-ता अत्थि णं से दिवसे जंसि णं दिवसंसि सूरिए चउपोरिसियं छायां णिव्वत्तेति अत्थि णं से दिवसे जंसि णं दिवसंसि सूरिए दोपोरिसियं छायां निव्वत्तेइ ते एव०-ता जता णं सूरिए सव्वब्भंतरं मंडलं उवसंकमिता चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, तंसि च णं दिवसंसि सूरिए चउपोरिसीयं छायां निव्वत्तेति ता उग्गमणमुहुत्तंसि य अत्थमणमुहुत्तंसि य लेसं अभिवड्ढेमाणे नो चेव णं णिव्वुड्ढेमाणे, ता जता णं सूरिए सव्वबाहिरं मंडलं उवसंकमिता चारं चरति तता णं उत्तमकट्टपत्ता उक्कोसिया अट्टारसमुहुत्ता राई भवति जहणए दुवालसमुहुत्ते दिवसे भवति, तंसि च णं दिवसंसि सूरिए दुपोरिसियं छायां निव्वत्तेइ, तं०-उग्गमणमुहुत्तंसि य अत्थमणमुहुत्तंसि य लेसं अभिवड्ढेमाणे नो चेव णं निव्वुड्ढेमाणे, तत्थ णं जे ते एव०-ता अत्थि णं से दिवसे जंसि णं दिवसंसि सूरिए दुपोरिसियं छायां णिव्वत्तेइ, अत्थि णं से दिवसे जंसि णं दिवसंसि सूरिए णो किंचिपोरिसियं छायां णिव्वत्तेति ते एव०-ता जता णं सूरिए सव्वब्भंतरं मंडलं उवसंकमिता चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, तंसि च णं दिवसंसि सूरिए दुपोरिसियं छायां णिव्वत्तेति तं०-उग्गमणमुहुत्तंसि य अत्थमणमुहुत्तंसि य लेसं अभिवड्ढेमाणे णो चेव णं णिव्वुड्ढेमाणे, ता जया णं सूरिए सव्वबाहिरं मंडलं उवसंकमिता चारं चरति तता णं उत्तमकट्टपत्ता उक्कोसिया अट्टारसमुहुत्ता राई भवति जहणए दुवालसमुहुत्ते दिवसे भवति, तंसि च णं दिवसंसि सूरिए णो किंचि पोरिसीछायं णिव्वत्तेति तं०-उग्गमणमुहुत्तंसि य अत्थमणमुहुत्तंसि य, नो चेव णं लेसं अभिवड्ढेमाणे वा निव्वुड्ढेमाणे वा, ता कइकट्ठं ते सूरिए पोरिसीच्छायं निव्वत्तेइ आहियत्ति वइज्जा ?, तत्थ इमाओ छण्णउई पडिवत्तीओ पं०, तत्थेगे एवमाहंसु-अत्थि णं ते से देसे जंसि णं देसंसि सूरिए एगपोरिसीछायं निव्वत्तेइ एगे एव०, एगे पुण०-ता अत्थि णं से देसे जंसि देसंसि सूरिए दुपोरिसियं छायां णिव्वत्तेति, एवं एतेणं अभिलावेणं णेतव्वं, जाव छण्णउत्तिं पोरिसियं छायां णिव्वत्तेति, तत्थ जे ते एवमाहंसु-ता अत्थि णं से देसे जंसि णं देसंसि सूरिए एगपोरिसियं छायां णिव्वत्तेति ते एवमाहंसु-ता सूरियस्स णं सव्वहेट्ठिमातो सूरप्पडिहितो बहित्ता अभिणिसट्ठाहिं लेसाहिं ताडिज्जमाणीहिं इमीसे रयणप्पभाए पुढवीए बहुसमरमणिज्जाओ भूमिभागाओ जावतियं सूरिए उड्ढं उच्चत्तेणं एवतियाए एगाए अब्बाए एगेणं छायाणुमाणप्पमाणेणं उमाए तत्थ से सूरिए एगपोरिसीयं छायां णिव्वत्तेति, तत्थ जे ते एवमाहंसु-ता अत्थि णं से देसे जंसि णं देसंसि सूरिए दुपोरिसिं छायां णिव्वत्तेति ते एवमाहंसु-ता सूरियस्स णं सव्वहेट्ठिमातो सूरियपडिधीतो बहित्ता अभिणिसताहिं लेसाहिं ताडिज्जमाणीहिं इमीसे रयणप्पभाए पुढवीए बहुसमरमणिज्जातो भूमिभागातो जावतियं सूरिए उड्ढं उच्चत्तेणं एवतियाहिं दोहिं अब्बाहिं दोहिं छायाणुमाणप्पमाणेहिं उमाए एत्थ णं से सूरिए दुपोरिसियं छायां णिव्वत्तेति, एवं णेयव्वं जाव तत्थ जे ते एवमाहंसु-ता अत्थि णं से देसे जंसि णं देसंसि सूरिए छण्णउत्तिं पोरिसियं छायां णिव्वत्तेति ते एवमाहंसु-ता सूरियस्स णं सव्वहिट्ठिमातो सूरप्पडिधीओ बहित्ता अभिणिसट्ठाहिं लेसाहिं ताडिज्जमाणीहिं इमीसे रयणप्पभाए पुढवीए बहुसमरमणिज्जातो भूमिभागातो जावतियं सूरिए उड्ढं उच्चत्तेणं एवतियाहिं छण्णवतीए अब्बाहिं छण्णवतीए छायाणुमाणप्पमाणेहिं उमाए एत्थ णं से सूरिए छण्णउत्तिं पोरिसियं छायां णिव्वत्तेति एगे एव०, वयं पुण एवं वदामो-सातिरेगअउणट्ठिपोरिसीणं सूरिए पोरिसीछायं णिव्वत्तेति, अवद्धपोरिसी णं छाया दिवसस्स किं गते वा सेसे वा ?, ता तिभागे गते वा सेसे वा, ता पोरिसी णं छाया दिवसस्स किं गते वा सेसे वा ?, ता चउब्भागे गते वा सेसे वा, ता दिवद्धपोरिसी णं छाया दिवसस्स किं गते वा सेसे वा ?, ता पंचमभागे गते वा सेसे वा, एवं अब्बपोरिसिं छोढुं पुच्छा, दिवसस्स भागं छोढुं वा करणं जाव ता अब्बअउणासट्ठिपोरिसीछाया दिवसस्स किं गते वा सेसे वा ?, ता एगूणवीससतभागे गते वा सेसे वा, ता अउणसट्ठिपोरिसी णं छाया दिवसस्स किं गते वा सेसे वा ?, बावीससयसहस्सभागे गते वा सेसे वा, ता सातिरेगअउणसट्ठिपोरिसी णं छाया दिवसस्स किं गते वा सेसे वा ?, ता णत्थि किंचि गते वा सेसे वा, तत्थ खलु इमा पणवीसनिविट्ठा छाया पं० तं०-खंभछाया रज्जुछाया पागारछाया पासायछाया उवग्ग (प्र०

तर) छाया उच्चत्तछाया अणुलोमछाया पडिलोमछाया आरुभिता उवहिता (१०) समा पडिहता खीलच्छाया पक्खच्छाया पुरतोउदग्गा पुरिमकंठभाउवगता पच्छिमकंठभाउगता छायाणुवादिणी कट्ठाणुवादिणीछाया छायाछाया (२०) छायाविकम्पो वेहासछाया कडछाया गोलछाया पिट्ठओदग्गा, तत्थ णं गोलच्छाया अट्ठविहा पं० तं०-गोलच्छाया अवद्धगोलच्छाया गोलगोलछाया अवद्धगोलगोलछाया गोलावलिच्छाया अवड्ढगोलावलिछाया गोलपुंजछाया अवद्धगोलपुंजछाया

☆☆☆।३१॥ णवमं पाहुडं ९ ॥ ☆☆☆ दसमं पाहुडं ☆☆☆ ता जोगेति वत्थुस्स आवलियाणिवाते आहिते० ता कहं ते जोगेति वत्थुस्स आवलियाणिवाते आहिते० ?, तत्थ खलु इमाओ पंच पडिवत्तीओ पं०, तत्थेगे एव०-ता सव्वेवि णं णक्खत्ता कत्तियादिया भरणिपज्जवसाणा एगे एव०, एगे पुण०-ता सव्वेवि णं णक्खत्ता महादीया अस्सेसपज्जवसाणा पं० एगे एव०, एगे पुण एव०-ता सव्वेसि णं णक्खत्ता धणिट्ठादीया सवणपज्जवसाणा पं० एगे एव०, एगे पुण०-ता सव्वेवि णं णक्खत्ता अस्सिणीआदीया रेवतिपज्जवसाणा पं० एगे एव०, एगे पुण०-सव्वेवि णं णक्खत्ता भरणीआदिया अस्सिणीपज्जवसाणा पं० एगे एव०, वयं पुण एवं वदामो-सव्वेवि णं णक्खत्ता अभिईआदीया उत्तरासाढापज्जवसाणा पं० तं०-अभिई सवणो जाव उत्तरासाढा।३२॥१०-१ ॥ ता कहं ते मुहुत्तग्गे आहि० ?, ता एतेसिं णं अट्ठावीसाए णक्खत्ताणं अत्थि णक्खत्ते जे णं णव मुहुत्ते सत्तावीसं च सत्तट्ठिभागे मुहुत्तस्स चंदेणं सद्धिं जोयं जोएंति, अत्थि णक्खत्ता जे णं पण्णरस मुहुत्ते चंदेणं सद्धिं जोयं जोएंति, अत्थि णक्खत्ता जे णं तीसं०, अत्थि णक्खत्ता जे णं पणतालीसं मुहुत्ते चंदेणं सद्धिं जोयं जोएंति, ता एएसिं णं अट्ठावीसाए णक्खत्ताणं कयरे नक्खत्ते जे णं नव मुहुत्ते सत्तावीसं च सत्तट्ठिभाए मुहुत्तस्स चंदेणं सद्धिं जोएंति ?, कयरे नक्खत्ता जे णं पण्णरस मुहुत्ते चंदेणं सद्धिं जोगं जोएंति ?, कतरे नक्खत्ता जे णं तीसं मुहुत्ते चंदेणं सद्धिं जोगं जोइंति ? कतरे नक्खत्ता जे णं पणयालीसं मुहुत्ते चंदेण सद्धिं जोयं जोइंति ?, ता एएसिं णं अट्ठावीसाए णक्खत्ताणं तत्थ जे से णक्खत्ते जे णं णव मुहुत्ते सत्तावीसं च सत्तट्ठिभागे मुहुत्तस्स चंदेण सद्धिं जोयं जोएंति से णं एगे अभीयी, तत्थ जे ते णक्खत्ता जे णं पण्णरस मुहुत्ते चंदेणं सद्धिं जोयं जोएंति ते णं छ, तं०-सतभिसया भरणी अट्ठा अस्सेसा साती जेट्ठा, तत्थ जे ते णक्खत्ता जे णं तीसं मुहुत्ते चंदेण सद्धिं जोयं जोयंति ते पण्णरस, तं०-सवणे धणिट्ठा पुव्वाभद्वता रेवती अस्सिणी कत्तिया मग्गसिर पुस्सो महा पुव्वाफग्गुणी हत्थो चित्ता अणुराहा मूलो पुव्वआसाढा, तत्थ जे ते णक्खत्ता जे णं पणतालीसं मुहुत्ते चंदेणं सद्धिं जोगं जोएंति ते णं छ, तं०-उत्तराभद्वदा रोहिणी पुणव्वसू उत्तराफग्गुणी विसाहा उत्तरासाढा।३३। ता एतेसिं णं अट्ठावीसाए णक्खत्ताणं अत्थि णक्खत्ते जे णं चत्तारि अहोरत्ते छच्च मुहुत्ते सूरें सद्धिं जोयं जोएति, अत्थि णक्खत्ता जे णं छ अहोरत्ते एक्कवीसं च मुहुत्ते सूरें सद्धिं जोयं जोएंति, अत्थि णक्खत्ता जे णं तेरस अहोरत्ते बारस य मुहुत्ते सूरें सद्धिं जोयं जोएंति, अत्थि णक्खत्ता जे णं वीसं अहोरत्ते तिण्णि य मुहुत्ते सूरें सद्धिं जोयं जोएंति, ता एतेसिं णं अट्ठावीसाए णक्खत्ताणं कतरे णक्खत्ते जे णं चत्तारि अहोरत्ते छच्च मुहुत्ते सूरें सद्धिं जोयं जोएति ? कतरे णक्खत्ता जे णं छ अहोरत्ते एक्कवीसं मुहुत्ते सूरें सद्धिं जोयं जोएंति ? कतरे णक्खत्ता जे णं तेरस अहोरत्ते बारस मुहुत्ते सूरें सद्धिं जोयं जोएंति ? कतरे णक्खत्ता जे णं वीसं अहोरत्ते तिण्णि य मुहुत्ते सूरें सद्धिं जोयं जोएंति ?, एतेसिं णं अट्ठावीसाए णक्खत्ताणं तत्थ जे से णक्खत्ते जे णं चत्तारि अहोरत्ते छच्च मुहुत्ते सूरें सद्धिं जोयं जोएंति से णं अभीयी, तत्थ जे ते णक्खत्ता जे णं छ अहोरत्ते एक्कवीसं च मुहुत्ते सूरिण सद्धिं जोयं जोएंति ते णं छ, तं०-सतभिसया भरणी अट्ठा अस्सेसा साती जेट्ठा, तत्थ जे ते० तेरस अहोरत्ते दुवालस य मुहुत्ते सूरें सद्धिं जोयं जोएंति ते णं पण्णरस, तं०-सवणो धणिट्ठा पुव्वाभद्वता रेवती अस्सिणी कत्तिया मग्गसिरं पूसो महा पुव्वाफग्गुणी हत्थो चित्ता अणुराधा मूलो पुव्वआसाढा, तत्थ जे ते णक्खत्ता जे णं वीसं अहोरत्ते तिण्णि य मुहुत्ते सूरें सद्धिं जोयं जोएंति ते णं छ, तं०-उत्तराभद्वदा रोहिणी पुणव्वसू उत्तराफग्गुणी विसाहा उत्तरासाढा।३४॥१०-२॥ ता कहं ते एवभागा आहि० ?, एतेसिं णं अट्ठावीसाए णक्खत्ताणं अत्थि णक्खत्ता पुव्वंभागा समखेत्ता तीसतिमुहुत्ता पं०, अत्थि णक्खत्ता पच्छंभागा समखेत्ता तीसइमुहुत्ता पं०, अत्थि णक्खत्ता णत्तंभागा अवड्ढखेत्ता पण्णरसमुहुत्ता पं०, अत्थि णक्खत्ता उभयंभागा दिवड्ढखेत्ता पणतालीसमुहुत्ता पं०, ता एएसिं णं अट्ठावीसाए णक्खत्ताणं कतरे नक्खत्ता पुव्वंभागा समखेत्ता तीसतिमुहुत्ता पं० कतरे णक्खत्ता पच्छंभागा समखेत्ता तीसतिमुहुत्ता

पं० ? कतरे णक्खत्ता णत्तंभागा अवड्ढखेत्ता पण्णरसमुहुत्ता पं० ? कतरे नक्खत्ता उभयंभागा दिवड्ढखेत्ता पणतालीसतिमुहुत्ता पं० ?, ता एतेसिं णं अट्ठावीसाए णक्खत्ताणं तत्थ जे ते णक्खत्ता पुव्वंभागा समखेत्ता तीसतिमुहुत्ता पं० ते णं छ, तं०-पुव्वापोट्टवता कत्तिया मघा पुव्वाफग्गुणी मूलो पुव्वासाढा, तत्थ जे ते णक्खत्ता पच्छंभागा समखेत्ता तीसतिमुहुत्ता पं० ते णं दस, तं०-अभिई सवणो धणिट्ठा रेवती अस्सिणी मिगसिर पूसो हत्थो चित्ता अणुराधा, तत्थ जे ते णक्खत्ता णत्तंभागा अवड्ढखेत्ता पण्णरसमुहुत्ता पं० ते णं छ, तं०-सयभिसया भरणी अद्दा अस्सेसा साती जेट्ठा, तत्थ जे ते णक्खत्ता उभयंभागा दिवड्ढखेत्ता पणतालीसं मुहुत्ता पं० ते णं छ, तं०-उत्तरापोट्टवतारोहिणी पुणव्वसू उत्तराफग्गुणी विसाहा उत्तरासाढा ।३५॥१०-३॥ ता कहं ते जोगस्स आदी आहिताति वदेज्जा ?, ता अभियीसवणा खलु दुवे णक्खत्ता पच्छाभागा समखित्ता सातिरेगऊतालीसतिमुहुत्ता तप्पढमयाए सायं चंदेण सद्धिं जोयं जोएति ततो पच्छा अवरं सातिरेयं दिवसं, एवं खलु अभिईसवणा दुवे णक्खत्ता एगराई एगं च सातिरेगं दिवसं चंदेण सद्धिं जोगं जोएति ता जोयं अणुपरियट्ठंति ता सायं चंदं धणिट्ठाणं समप्पंति, ता धणिट्ठा खलु णक्खत्ते पच्छंभागे समखेत्ते तीसतिमुहुत्ते तप्पढमयाए सायं चंदेण सद्धिं जोगंजोएति ता ततो पच्छा राई अवरं च दिवसं, एवं खलु धणिट्ठाणक्खत्ते एगं च राई एगं च दिवसं चंदेण सद्धिं जोयं जोएति ता जोयं अणुपरियट्ठति ता सायं चंदं सतभिसयाणं समप्पेति, ता सतभिसया खलु णक्खत्ते णत्तंभागे अवड्ढखेत्ते पण्णरसमुहुत्ते ता पढमताए सायं चंदेण सद्धि जाव जोएति णो लभति अवरं दिवसं, एवं खलु सयभिसया णक्खत्ते एगं राई चंदेण सद्धिं जोयं जोएति ता जोयं अणुपरियट्ठेति ता तो चंदं पुव्वाणं पोट्टवताणं समप्पेति, ता पुव्वापोट्टवता खलु नक्खत्ते पुव्वंभागे समखेत्ते तीसतिमुहुत्ते तप्पढमताए पातो (१९८) चंदेण सद्धिं जोयं जोएति ततो पच्छा अवरराई, एवं खलु पुव्वापोट्टवता णक्खत्ते एगं च दिवसं एगं च राई चंदेण सद्धिं जोयं जोएति ता जोयं अणुपरियट्ठेति ता पातो चंदं उत्तरापोट्टवताणं समप्पति, ता उत्तरापोट्टवता खलु नक्खत्ते उभयंभागे दिवड्ढखेत्ते पणतालीसमुहुत्ते तप्पढमयाए पातो चंदेण सद्धिं जोयं जोएति अवरं च रातिं ततो पच्छा अवरं दिवसं, एवं खलु उत्तरापोट्टवताणक्खत्ते दो दिवसे एगं च राई चंदेण सद्धिं जोयं जोएति ता जोगं अणुपरियट्ठति ता सायं चंदं रेवतीणं समप्पेति, ता रेवती खलु णक्खत्ते पच्छंभागे समखेत्ते तीसतिमुहुत्ते तप्पढमताए सागं चंदेण सद्धिं जोयं जोएति ततो पच्छा अवरं दिवसं, एवं खलु रेवतीणक्खत्ते एगं राई एगं च दिवसं चंदेण सद्धिं जोयं जोएति ता जोयं अणुपरियट्ठति ता सागं चंदं अस्सिणीणं समप्पेति, ता अस्सिणी खलु णक्खत्ते पच्छिमभागे समखेत्ते तीसतिमुहुत्ते तप्पढमताए सागं चंदेण सद्धिं जोयं जोएति ततो पच्छा अवरं दिवसं, एवं खलु अस्सिणीणक्खत्ते एगं राई एगं च दिवसं चंदेण सद्धिं जोयं जोएति ता जोगं अणुपरियट्ठइ ता सागं चंदं भरणीणं समप्पेति, ता भरणी खलु णक्खत्ते णत्तंभागे अवड्ढखेत्ते पण्णरसमुहुत्ते तप्पढमताए सागं चंदेण सद्धिं जोयं जोएति णो लभति अवरं दिवसं, एवं खलु भरणीणक्खत्ते एगं राई चंदेण सद्धिं जोयं जोएति ता जोयं अणुपरियट्ठति ता पादो चंदं कत्तियाणं समप्पेति, ता कत्तिया खलु णक्खत्ते पुव्वंभागे समखिक्खत्ते तीसड्ढमुहुत्ते तप्पढमताए सागं चंदेण सद्धिं जोगं जोएति ततो पच्छा राई, एवं खलु कत्तिया णक्खत्ते एगं दिवसं एगं च राईचंदेण सद्धिं जोयं जोएति ता जोयं अणुपरियट्ठइ ता पादो चंदं रोहिणीणं समप्पेति, रोहिणी जहा उत्तराभद्वता मगसिरं जहा धणिट्ठा अद्दा जहा सतभिसया पुणव्वसू जहा उत्तराभद्वता पुस्सो जहा धणिट्ठा अस्सेसा जहा सतभिसया मघा जहा पुव्वाफग्गुणी २ जहा पुव्वाभद्वया उत्तराफग्गुणी जहा उत्तराभद्वता जिट्ठा जहा हत्थो चित्ता य जहा धणिट्ठा साती जहा सतभिसया विसाहा जहा उत्तराभद्वता अणुराहा जहा धणिट्ठा सयभिसया मूला पुव्वासाढा य जहा पुव्वभद्वपदा उत्तरासाढा जहा उत्तराभद्वता ।३६॥१०-४॥ ता कहं ते कुला आहि० ?, तत्थ खलु इमे बारस कुला बारस उवकुला चत्तारि कुलोवकुला पं०, बारस कुला, तं०-धणिट्ठाकुलं उत्तराभद्व (प्र० पोट्ट) वता० अस्सिणी० कत्तिया० संठाणा० पुस्सा० महा० उत्तराफग्गुणी० चित्ता० विसाहा० मूला० उत्तरासाढाकुलं, बारस उवकुला तं०-सवणोउवकुलं पुव्वापोट्टवता० रेवती० भरणी० रोहिणी० पुणव्वसु० अस्सेसा० पुव्वाफग्गुणी० हत्थो० साती० जेट्ठा० पुव्वासाढा०, चत्तारि कुलोवकुला तं०-अभीयीकुलोवकुलं सतभिसया० अद्दा० अणुराधाकुलोवकुलं ।३७॥१०-५॥ ता कहं ते पुण्णिमासिणी आहि० ?, तत्थ खलु इमाओ बारस पुण्णिमासिणीओ बारस अमावासाओ पं० तं०-साविट्ठी

पोट्टवती आसोई कत्तिया मग्गसिरी पोसी माही फग्गुणी चेत्ती विसाही जेढामूली आसाढी, ता साविट्टिणं पुण्णमासिणीं कति णक्खत्ता जोएंति ?, ता तिण्णि णक्खत्ता जोइंति, तं०-अभिई सवणो धणिट्ठा, ता पुट्टवतीणं पुण्णिमं कति णक्खत्ता जोएंति ?, ता तिन्नि नक्खत्ता जोयंति तं०-सतिभिसया पुव्वापोट्टवता उत्तरापुट्टवता, ता आसोदिणं पुण्णिमं कति णक्खत्ता जोएंति, ता दोण्णि णक्खत्ता जोएंति, तं०-रेवती य अस्सिणी य, कत्तियणं पुण्णिमं कति णक्खत्ता जोएंति ?, ता दोण्णि णक्खत्ता जोएंति तं०-भरणी कत्तिया य, ता मागसिरीपुत्तिमं कति णक्खत्ता जोएंति ?, ता दोण्णि णक्खत्ता जोएंति, तं०-रोहिणी मग्गसिरो य, ता पोसिणं पुण्णिमं कति णक्खत्ता जोएंति ?, ता तिण्णि णक्खत्ता जोएंति, तं०-अद्दा पुणव्वसू पुस्सो, ता माहिणं पुण्णिमं कति णक्खत्ता जोएंति ?, ता दोण्णि नक्खत्ता जोएंति, तं०-अस्सेसा महा य, ता फग्गुणीणं पुण्णिमं कति णक्खत्ता जोएंति ?, ता दुत्ति नक्खत्ता जोएंति तं०-पुव्वाफग्गुणी उत्तराफग्गुणी य, ता चित्तिणं पुण्णिमं कति णक्खत्ता जोएंति ?, ता दोण्णि० तं०-हत्थो चित्ता य, ता विसाहिणं पुण्णिमं कति णक्खत्ता जोएंति ?, दोण्णि णक्खत्ता जोएंति तं०-साती विसाहा य, ता जेढामूलिणं पुण्णिमासिणिं कति णक्खत्ता जोयंति ?, ता तिन्नि णक्खत्ता जोएंति, तं०-अणुराहा जेढा मूलो, आसाढिणं पुण्णिमं कति णक्खत्ता जोएंति ?, ता दो णक्खत्ता जोएंति, तं०-पुव्वासाढा उत्तरासाढा ।३८। ता साविट्टिणं पुण्णिमासिं णं किं कुलं जोएति उवकुलं० कुलोवकुलं जोएति ?, ता कुलं वा० उवकुलं वा० कुलोवकुलं वा जोएति, कुलं जोएमाणे धणिट्ठा णक्खत्ते० उवकुलं जोएमाणे सवणे णक्खत्ते जोएति, कुलोवकुलं जोएमाणे अभिईणक्खत्ते जोएति, साविट्ठिं पुण्णिमं कुलं वा उवकुलं वा कुलोवकुलं वा जोएति, कुलेण वा उवकुलेण वा कुलोवकुलेण वा जुत्ता साविट्ठी पुण्णिमा जुत्ताति वत्तव्वं सिया, ता पोट्टवतीणं पुण्णिमं किं कुलं० उवकुलं० कुलोवकुलं वा जोएति ?, ता कुलं वा० उवकुलं वा० कुलोवकुलं वा जोएति, कुलं जोएमाणे उत्तरापोट्टवता णक्खत्ते जोएति, उवकुलं जोएमाणे पुव्वापोट्टवता णक्खत्ते जोएति, कुलोवकुलं जोएमाणे सतिभिसया णक्खत्ते जोएति, पोट्टवतीणं पुण्णिमासिणिं कुलं वा उवकुलं वा कुलोवकुलं वा जोएति, कुलेण वा० जुत्ता पोट्टवती पुण्णिमा जुत्ताति वत्तव्वं सिया, ता आसोइं णं पुण्णिमासिणिं किं कुलं उवकुलं कुलोवकुलं जोएति ?, णो लभति कुलोवकुलं, कुलं जोएमाणे अस्सिणी णक्खत्ते जोएति, उवकुलं जोएमाणे रेवतीणक्खत्ते जोएति, आसोइं णं पुण्णिमं च कुलं वा उवकुलं वा जोएति कुलेण वा जुत्ता उवकुलेण वा जुत्ता अस्सोदिणी पुण्णिमा जुत्तत्ति वत्तव्वं सिया, एवं णेतव्वाउ (प्र० जाव आसाढी पुत्तमासिणी जुत्तत्ति वत्तव्वं सिया) पोसं पुण्णिमं जेढामूलं पुण्णिमं च कुलोवकुलं पि जोएति, अवसेसासु णत्थि कुलोवकुलं, ता साविट्ठिं णं अमावासं कति णक्खत्ता जोएंति ?, दुत्ति नक्खत्ता जोएंति, तं०-अस्सेसा य महा य, एवं एतेणं अभिलावेणं णेतव्वं, पोट्टवती दोत्ति णक्खत्ता जोएंति, तं०-पुव्वाफग्गुणी उत्तराफग्गुणी, अस्सोइं हत्थो चित्ता य, कत्तिइं साती विसाहा य, मग्गसिरं अणुराधा जेढामूलो, पोसिं पुव्वासाढा उत्तरासाढा, माहिं अभीयी सवणो धणिट्ठा, फग्गुणी सतिभिसया पुव्वापोट्टवता उत्तरापोट्टवता, चेत्तिं रेवती अस्सिणी य, विसाहिं भरणी कत्तिया य, जेढामूलिं रोहिणी मग्गसिरं च, ता आसाढिं णं अमावासिं कति णक्खत्ता जोएंति ?, ता तिन्नि नक्खत्ता जोएंति, तं०-अद्दा पुणव्वसू पुस्सो, ता साविट्ठिं णं अमावासं किं कुलं वा जोएति उवकुलं वा जोएति कुलोवकुलं वा जोएइ ?, कुलं वा जोएइ उवकुलं वा जोएइ नो लब्भइ कुलोवकुलं, कुलं जोएमाणे महाणक्खत्ते जोएति, उवकुलं जोएमाणे असिलेसा जोएइ, कुलेण वा जुत्ता उवकुलेण वा जुत्ता साविट्ठी अमावासा जुत्ताति वत्तव्वं सिया, एवं णेतव्वं णवरं मग्गसिराए माहीए फग्गुणीए आसाढीए य अमावासाए कुलोवकुलं पि जोएति, सेसासु णत्थि ।३९॥१०-६॥ ता कहं ते सण्णिवाते आहि० ?, ता जया णं साविट्ठी पुण्णिमा भवति तता णं माही अमावासा भवति जया णं माही पुण्णिमा भवति तता णं साविट्ठी अमावासा भवति, जता णं पुट्टवती पुण्णिमा भवति तता णं फग्गुणी अमावासा भवति जया णं फग्गुणी पुण्णिमा भवति तता णं पुट्टवती अमावासा भवति, जया णं आसोई पुण्णिमा भवति तता णं चेत्ती अमावासा भवति जया णं चित्ती पुण्णिमा भवति तया णं आसोई अमावासा भवति, जया णं कत्तियी पुण्णिमा भवति तता णं वेसाही अमावासा भवति जता णं वेसाही पुण्णिमा भवति तता णं कत्तिया अमावासा भवति, जया णं मग्गसिरी पुण्णिमा भवति तता णं जेढामूली अमावासा भवति जता णं जेढामूली पुण्णिमा भवति तता णं मग्गसिरी अमावासा भवति, जता णं पोसी पुण्णिमा भवति तता णं

आसाढी अमावासा भवति जता णं आसाढी पुण्णिमा भवति तता णं पोसी अमावासा भवति ।४०॥१०-७॥ ता कहं ते नक्खत्तसंठिती आहिं ? , ता एएसिं णं अट्ठवीसाए णक्खत्ताणं अभीयी णं णक्खत्ते किंसंठिते पं० ? , गो० ! गोसीसावालिसंठिते पं० , सवणे णक्खत्ते किंसंठिते पं० ? , काहारसंठिते पं० , धणिट्ठाणक्खत्ते० सउणिपलीणगसंठिते पं० , सयभिसयाणक्खत्ते० पुप्फोवयारसंठिते , पुव्वापोट्टवताणक्खत्ते० अवड्ढवाविसंठिते , एवं उत्तरावि , रेवतीणक्खत्ते णावासंठिते , अस्सिणीणक्खत्ते आसक्खंधसंठिते , भरणीणक्खत्ते भगसंठिए पं० , कत्तियाणक्खत्ते छुरधरसंठिते पं० , रोहिणीणक्खत्ते सगडुड्हिसंठिते , मिगसिराणक्खत्ते मगसीसावलिसंठिते , अट्ठाणक्खत्ते रूधिरबिंदुसंठिए , पुणव्वसू तुलासंठिए , पुप्फे वद्धमाण० , अस्सेसाण० पडागसंठिए , महा० पागारसंठिते , पुव्वाफग्गुणी० अब्धपलियंकसंठिते , एवं उत्तरावि , हत्थे हत्थसंठिते , ता चित्ताणक्खत्ते मुहफुल्लसंठिते , साती० खीलगसंठिते , विसाहा० दामणिसंठिते , अणुराधा० एगावलिसंठिते , जेड्डान० गयदंतसंठिते , मूले० विच्छुयलंगोलसंठिते , पुव्वासाढा० गयविक्रमसंठिते , उत्तरासाढाणक्खत्ते किंसंठिए पं० ? , सीहनिसाइयसंठिते पं० ।४१॥१०-८॥ ता कहं ते तारग्गे आहिं ? , ता एतेसिं णं अट्ठावीसाए णक्खत्ताणं अभीईणक्खत्ते कतितारे पं० ? , तितारे पं० , सवणे णक्खत्ते० तितारे , धनिट्ठा पणतारे , सतभिसया कति० ? , सत्ततारे , पुव्वापोट्टवता कति० ? , दुतारे , एवं उत्तरावि , रेवतीण० कति० ? , बत्तीसतितारे , अस्सिणी० कति० ? , तितारे , एवं सव्वे पुच्छिज्जंति , भरणी तितारे , कत्तिया छतारे , रोहिणी पंचतारे मगसिरेतितारे , अट्ठा एगतारे , पुणव्वसू पंचतारे , पुस्से तितारे , अस्सेसा छतारे , महा सत्ततारे , पुव्वाफग्गुणी दुतारे , एवं उत्तरावि , हत्थे पंचतारे , चित्ता एकतारे , साती एकतारे , विसाहा पंचतारे , अणुराहा चउतारे , जेड्डा तितारे , मूले एगारतारे , पुव्वासाढा चउतारे , उत्तरासाढाणक्खत्ते चउतारे पं० ।४२॥१०-९॥ ता कहं ते नेता आहिं ? , ता वासाणं पढमं मासं कति णक्खत्ता णेंति ? , ता चत्तारि णक्खत्ता णिंति , तं०-उत्तरासाढा अभिई सवणो धणिट्ठा , उत्तरासाढा चोदस अहोरत्ते नेति , अभिई सत्त अहोरत्ते नेति , सवणे अट्ठ अहोरत्ते नेति , धणिट्ठा एगं अहोरत्तं नेइ , तंसि णं मासंसि चउरंगुलपोरिसीए छायाए सूरिए अणुपरियट्ठति , तस्स णं मासस्स चरिमे दिवसे दो पादाइं चत्तारि य अंगुलाणि पोरिसी भवति , ता वासाणं दोच्चं मासंकति णक्खत्ता णेंति ? , ता चत्तारि णक्खत्ता णेंति , तं०-धणिट्ठा सतभिसया पुव्वापुट्टवता उत्तरापोट्टवया , धणिट्ठा चोदस अहोरत्ते नेति , सयभिसया सत्त अहोरत्ते नेति , पुव्वाभद्वया अट्ठ अहोरत्ते नेइ , उत्तरापोट्टवता एगं अहोरत्तं नेति , तंसि णं मासंसि अट्ठंगुलपोरिसीए छायाए सूरिए अणुपरियट्ठति , तस्स णं मासस्स चरिमे दिवसे दो पादाइं अट्ठ अंगुलाइं पोरिसी भवति , ता वासाणं ततियं मासं कति णक्खत्ता णेंति ? , ता तिण्णि णक्खत्ता णिंति , तं०-उत्तरापोट्टवता रेवती अस्सिणी , उत्तरापोट्टवता चोदस अहोरत्ते नेति रेवती पण्णरस० अस्सिणी एगं अहो० , तंसि च णं मासंसि दुवालसंगुलपोरिसीछायाए सूरिए अणुपरियट्ठति , तस्स णं मासस्स चरिमदिवसे लेहत्थाइं तिण्णि पदाइं पोरिसी भवति , ता वासाणं चउत्थं मासं कति णक्खत्ता णेंति ? , ता तिन्नि नक्खत्ता णेंति , तं०-अस्सिणी भरणी कत्तिया , अस्सिणी चउदस अहो० भरणी पन्नरस अहो० कत्तिया एगं अहो० , तंसि च णं मासंसि सोलसंगुलपोरिसीछायाए सूरिए अणुपरियट्ठति , तस्स णं मासस्स चरिमे दिवसे तिन्नि पयाइं चत्तारि अंगुलाइं पोरिसी भवइ , ता हेमंताणं पढमं मासं कइ णक्खत्ता णेंति ? , ता तिण्णि णक्खत्ता णेंति , तं०-कत्तिया रोहिणी संठाणा , कत्तिया चोदस अहो० रोहिणी पन्नरस अहो० संठाणा एगं अहो० , तंसि च णं मासंसि वीसंगुलपोरिसीए छायाए सूरिए अणुपरियट्ठति , तस्स णं मासस्स चरिमे दिवसे तिण्णि पदाइं अट्ठ अंगुलाइं पोरिसी भवति , ता हेमंताणं दोच्चं मासं कति णक्खत्ता णेंति ? , चत्तारि णक्खत्ता णेंति , तं०-संठाणा अट्ठा पुणव्वसू पुस्सो , संठाणा चोदस अहोरत्ते नेति अट्ठा सत्त अहो० पुणव्वसू अट्ठ अहो० पुस्से एगं अहोरत्तं नेति , तंसि च णं मासंसि चउवीसंगुलपोरिसीए छायाए सूरिए अणुपरियट्ठति , तस्स णं मासस्स चरिमे दिवसे लेहट्ठाणि चत्तारि पदाइं पोरिसी भवति , ता हेमंताणं ततियं मासं कति णक्खत्ता णेंति ? , ता तिण्णि णक्खत्ता णेंति , तं०-पुस्से अस्सेसा महा , पुस्से चोदस अहोरत्ते नेति अस्सेसा पंचदस अहो० महा एगं अहो० , तंसि च णं मासंसि वीसंगुलाइ पोरिसीए छायाए सूरिए अणुपरियट्ठति , तस्स णं मासस्स चरिमे दिवसे तिण्णि पदाइं अट्ठंगुलाइं पोरिसी भवति , ता हेमंताणं चउत्थं मासं कति णक्खत्ता णेंति ? , ता तिण्णि नक्खत्ता णेंति , तं०-महा पुव्वाफग्गुणी

उत्तराफग्गुणी, महा चोदस अहो० पुव्वाफग्गुणी पन्नरस अहो० उत्तराफग्गुणी एगं अहो०, तंसि च णं मासंसि सोलसअंगुलाइ पोरिसीए छायाए सूरिए अणुपरियट्ठति, तस्स णं मासस्स चरिमे दिवसे तिण्णि पदाइं चत्तारि अंगुलाइं पोरिसी भवति, ता गिम्हाणं पढमं मासं कति णक्खत्ता णेंति ?, ता तिन्नि णक्खत्ता णेंति, तं०-उत्तराफग्गुणी हत्थो चित्ता, उत्तराफग्गुणी चोदस अहोरत्ते णेति हत्थो पण्णरस अहो० चित्ता एगं अहोरत्तं णेइ, तंसि च णं मासंसि दुवालसअंगुलपोरिसीए छायाए सूरिए अणुपरियट्ठति, तस्स णं मासस्स चरिमे दिवसे लेहट्ठाइ य तिण्णि पदाइं पोरिसी भवति, ता गिम्हाणं बितियं मासं कति णक्खत्ता णेंति ?, ता तिण्णि णक्खत्ता णेंति, तं०-चित्ता साई विसाहा, चित्ता चोदस अहोरत्ते णेति साती पण्णरस अहो० विसाहा एगं अहोरत्तं णेति, तंसि च णं मासंसि अट्ठगुलपोरिसीए छायाए सूरिए अणुपरियट्ठति, तस्स णं मासस्स चरिमे दिवसे दो पदाइं अट्ठ अंगुलाइं पोरिसी भवति, गिम्हाणं ततियं मासं कति णक्खत्ता णेंति ?, ता चत्तारि णक्खत्ता णेंति, तं०-विसाहा अणुराधा जेट्ठा मूलो, विसाहा चोदस अहो० अणुराधा अट्ठ० जेट्ठा सत्त० मूलं एगं अहोरत्तं णेति, तंसि च णं मासंसि चउरंगुलपोरिसीए छायाए सूरिए अणुपरियट्ठति, तस्स णं मासस्स चरिमे दिवसे दो पादाणि य चत्तारि अंगुलाणि पोरिसी भवति, ता गिम्हाणं चउत्थं मासं कति णक्खत्ता णेंति ?, ता तिण्णि णक्खत्ता णेंति, तं०-मूलो पुव्वासाढा उत्तरासाढा, मूलो चोदस अहोरत्ते णेति पुव्वासाढा पण्णरस अहोरत्ते णेति उत्तरासाढा एगं अहोरत्तं णेइ, तंसि च णं मासंसि वट्ठाए समचउरंससंठिताए णग्गोधपरिमंडलाए सक्कायमणुरंगिणीए छायाए सूरिए अणुपरियट्ठति, तस्स णं मासस्स चरिमे दिवसे लेहट्ठाइं दो पदाइं पोरिसी भवति ।४३॥१०-१०॥ ता कहं ते चंदमग्गा अहि० ?, ता एएसिं णं अट्ठावीसाए णक्खत्ताणं अत्थि णक्खत्ता जे णं सता चंदस्स दाहिणेणं जोअं जोएंति, अत्थि णक्खत्ता जे णं सता चंदस्स उत्तरेणं जोयं जोयंति, अत्थि णक्खत्ता जे णं सदा चंदस्स दाहिणेणवि उत्तरेणवि पमहंपि जोयं जोएंति, अत्थि णक्खत्ता जे णं चंदस्स दाहिणेणवि पमहंपि जोयं जोएंति, अत्थि णक्खत्ता जे णं चंदस्स सदा पमहं जोअं जोएंति, ता एएसिं णं अट्ठावीसाए नक्खत्ताणं कतरे नक्खत्ता जे णं सता चंदस्स दाहिणेणं जोयं जोएंति ?, तहेव जाव कतरे नक्खत्ता जे णं सदा चंदस्स पमहं जोयं जोएंति ?, ता एतेसिं णं अट्ठावीसाए नक्खत्ताणं तत्थ जे णं नक्खत्ता सया चंदस्स दाहिणेण जोयं जोएंति ते णं छ, तं०-संठाणा अद्दा पुस्सो अस्सेसा हत्थो मूलो, तत्थ जे ते णक्खत्ता जे णं सदा चंदस्स उत्तरेणं जोयं जोएंति ते णं बारस, तं०-अभिई सवणो धणिट्ठा सतभिसया पुव्वाभद्वया उत्तरापोट्ठवता रेवती अस्सिणी भरणी पुव्वाफग्गुणी उत्तराफग्गुणी साती, तत्थ जे ते णक्खत्ता जे णं चंदस्स दाहिणेणवि उत्तरेणवि पमहंपि जोयं जोएंति ते णं सत्त, तं०-कत्तिया रोहिणी पुणव्वसू महा चित्ता विसाहा अणुराहा, तत्थ जे ते नक्खत्ता जे णं चंदस्स दाहिणेणवि पमहंपि जोयं जोएंति ताओ णं दो आसाढाओ सव्वबाहिरे मंडले जोयं जोएंसु वा जोएंति वा जोएस्संति वा, तत्थ जे से णक्खत्ते जे णं सदा चंदस्स पमहं जोयं जोएंति सा णं एगा जेट्ठा ।४४। ता कति ते चंदमंडला पं० ?, ता पण्णरस चंदमंडला पं०, ता एएसिं णं पण्णरसण्हं चंदमंडलाणं अत्थि चंदमंडला जे णं सया णक्खत्तेहिं अविरहिया, अत्थि चंदमंडला जे णं सया णक्खत्तेहिं विरहिया, अत्थि चंदमंडला जे णं रविससिणक्खत्ताणं सामण्णा भवंति, अत्थि चंदमंडला जे णं सया आदिच्चेहिं विरहिया, ता एतेसिं णं पण्णरसण्हं चंदमंडलाणं कयरे चंदमंडला जे णं सता णक्खत्तेहिं अविरहिया जाव कयरे चंदमंडला जे णं सदा आदिच्चविरहिता ?, ता एतेसिं णं पण्णरसण्हं चंदमंडलाणं जे ते चंदमंडला ते णं सदा णक्खत्तेहिं अविरहिता ते णं अट्ठ, तं०-पढमे चंदमंडले ततिए० छट्ठे० सत्तमे० अट्ठमे० दसमे० एकादसे० पण्णरसमे चंदमंडले, तत्थ जे णं सदा णक्खत्तेहिं विरहिया ते णं सत्त, तं०-बितिए चउत्थे पंचमे नवमे बारसमे तेरसमे चउदसमे चंदमंडले, तत्थ जे ते चंदमंडला जे णं ससिरविनक्खत्ताणं सामण्णा भवंति ते णं चत्तारि, तं०-पढमे बीए इक्कारसमे पन्नरसमे चंदमंडले, तत्थ जे ते चंदमंडला जे णं सदा आदिच्चविरहिता ते णं पंच, तं०-छट्ठे सत्तमे अट्ठमे नवमे दसमे चंदमंडले ।४५॥१०-११॥ ता कहं ते देवताणं अज्झयणा आहि० ?, ता एएणं अट्ठावीसाए नक्खत्ताणं अभिई णक्खत्ते किंदेवताए पं० ?, बंभदेवयाए पं०, सवणे विण्हदेवयाए पं०, धणिट्ठा वसुदेवयाए पं०, सयभिसया वरूणदेवयाए पं०, पुव्वापोट्ठ० अजदे० उत्तरापोट्ठवया अहिवट्ठिदेवताए पं०, एवं सव्वेपि पुच्छिज्जंति, रेवती पुस्सदेवता अस्सिणी अस्स० भरणी जम० कत्तिया अग्गि० रोहिणी पयावइ० संठाणा सोम० अद्दा रूढ० पुणव्वसू अदिति० पुस्सो

बहस्सइ० अस्सेसा सप्प० महा पिति० पुव्वाफग्गुणी भग० उत्तराफग्गुणी अज्जम० हत्थे सविया० चित्ता तट्ठ० साती वायु० विसाहा इंदग्गी० अणुराहा मित्त० जेट्ठा इंद० मूले णिरिति० पुव्वासाढा आउ० उत्तरासाढा विस्सदेवयाए पं० ॥४६॥१०-१२॥ ता कहां ते मुहुत्ताणं नामधेज्जा आहि० ?, ता एगमेगस्स णं अहोरत्तस्स तीसं मुहुत्ता पं० तं०-‘रोदे सेते मित्ते वायु सुपीए तहेव अभिचंदे । माहिंद बलव बंभो बहुसच्चे १० चेव ईसाणे ॥१६॥ तट्ठे य भावियप्पा वेसमणे वारूणे य आणंदे । विजए य वीससेणे पायावच्चे उवसमे य २०॥ १७॥ गंधव्व अग्गिवेसे सयरिसहे आयवं च अममे य । अणवं च भोम रिसहे सव्वट्ठे रक्खसे चेव ३०॥१८॥१४७॥१०-१३॥ ता कहां ते दिवसा आहिय० ?, ता एगमेगस्स णं पक्खस्स पन्नरस २ दिवसा पं० तं०-पडिवा दिवसे बितिया जाव पण्णरसीदिवसे, ता एतेसिं णं पण्णरसण्हं दिवसाणं पन्नरस नामधेज्जा पं० तं०-‘पुव्वंगे सिद्धमणोरमे य तत्तो मणोहरो चेव । जसभदे य जसोधर सव्वकामसमिद्धेति य ॥१९॥ इंदे मुद्धाभिसित्ते सोमणस्स धणंजए य बोद्धव्वे । अत्थसिद्धे अभिजाते अच्चासणे य सतंजए ॥२०॥ अग्गिवेसे उवसमे दिवसाणं नामधेज्जाइं । ता कहां ते रातीओ आहि० ?, ता एगमेगस्स णं पक्खस्स पण्णरस राईओ पं० तं०-पडिवा राई बिदिया राई जाव पण्णरसी राई, ता एतासिं णं पण्णरसण्हं राईणं पण्णरस नामधेज्जा पं० तं०-‘उत्तमा य सुणक्खत्ता, एलावच्चा जसोधरा । सोमणसा चेव तवा, सिरिसंभूता य बोद्धव्वा ॥२१॥ विजया य वेजयंती जयंति अपराजिया य इच्छा य । समाहारा चेव तथा तेया य तहा य अतितेया ॥२२॥ देवाणंदा निरती रयणीणं णामधेज्जाइं ॥४८॥१०-१४॥ ता कहां ते तिही आहि० ?, तत्थ खलु इमा दुविहा तिही पं० तं०-दिवसतिही राइतिही य, ता कहां ते दिवसतिही आहितेति वदेज्जा ?, ता एगमेगस्स णं पक्खस्स पण्णरस २ दिवसतिही पं० तं०-णंदे भदे जए तुच्छे पुण्णे पक्खस्स पंचमी, पुणरवि णंदे भदे जए तुच्छे पुण्णे पक्खस्स दसमी, पुणरवि णंदे भदे जये तुच्छे पुण्णे पक्खस्स पण्णरसी, एवं ते तिगुणा तिहीओ सव्वेसि दिवसाणं, कहां ते राइतिथी आहि० ?, एगमेगस्स णं पक्खस्स पण्णरस राति तिथी पं० तं०-उग्गवती भोगवती जसवती सव्वसिद्धा सुहणामा पुणरवि उग्गवती भोगवती जसवती सव्वसिद्धा सुहणामा पुणरवि उग्गवती भोगवती जसवती सव्वसिद्धा सुहणामा, एते तिगुणा तिहीओ सव्वासिं रातीणं ॥४९॥१०-१५॥ ता कहां ते गोत्ता आहि० ?, ता एतेसिं णं अट्ठावीसाए णक्खत्ताणं अभियी णक्खत्ते किंगोत्ते पं० ?, ता मोग्गल्लायणसगोत्ते पं०, सवणे णक्खत्ता किंगोत्ते० ?, संखायणगोत्ते पं०, धणिट्ठाणक्खत्ते अग्गितावसागोत्ते पं०, सतभिसयाणक्खत्ते कण्णलो (प्र० कल्लो) यणसगोत्ते पं०, पुव्वापोट्ठवताणक्खत्ते जोउकण्णियसगोत्ते पं०, उत्तरापोट्ठवताणक्खत्ते धणंजयसगोत्ते पं०, रेवतीणक्खत्ते पुस्सायणसगोत्ते पं०, अस्सिणीनक्खत्ते अस्सादणसगोत्ते पं०, भरणीणक्खत्ते भग्गवेससगोत्ते पं०, कत्तियाणक्खत्ते अग्गिवेससगोत्ते पं०, रोहिणीणक्खत्ते गोतमसगोत्ते पं०, संठाणाणक्खत्ते भारद्वायसगोत्ते पं०, अट्ठाणक्खत्ते लोहिच्चायणसगोत्ते पं०, पुणव्वसुणक्खत्ते वासिट्ठगोत्ते पं०, पुस्से उमज्जायणसगोत्ते पं०, अस्सेसा मंडव्वायणसगोत्ते पं०, महान० पिंगायणसगोत्ते पं०, पुव्वाफग्गुणी० गोवल्लायणसगोत्ते पं०, उत्तराफग्गुणी० कासवसगोत्ते पं०, हत्थे० कोसियगोत्ते पं०, चित्ता० दब्बियायणसगोत्ते पं०, साई० वामरछगोत्ते पं०, विसाहा० सुंगायाणसगोत्ते पं०, अणुराधा० गोलव्वायणसगोत्ते पं०, जेट्ठा० तिगिच्छायणसगोत्ते पं०, मूले० कच्चायणसगोत्ते पं०, पुव्वासाढा० वज्झियायणसगोत्ते पं०, उत्तरासाढाणक्खत्ते किंगोत्ते पं० ?, वग्धावच्चसगोत्ते पं० ॥५०॥१०-१६॥ ता कहां ते भोयणा आहि० ?, ता एएसिं णं अट्ठावीसाए णक्खत्ताणं कत्तियाहिं दधिणा भोच्चा कज्जं साधंति, रोहिणीहिं वसभमंसं भोच्चा कज्जं साधंति, संठाणाहिं मिगमंसं० अट्ठाहिं णवणीतेण भोच्चा० पुणव्वसुणा घतेण० पुस्सेणं खीरेण० अस्सेसाए दीवगमंसं० महाहिं कसरिं० पुव्वाहिं फग्गुणीहिं मढकमंसं० उत्तराहिं फग्गुणीहिं णक्खी (प्र० भी) मंसं० हत्थेण वत्थाणीपण्णं० चित्ताहिं मुग्गसूवेणं० सादिणा फलाइं० विसाहाहिं आसित्ति (प्र० न्नसि) याओ० अणुराहाहिं मिस्सकूरं० जेट्ठाहिं ओलटिंठएणं० मूलेणं मूलापन्नेणं० पुव्वाहिं आसाढाहिं आमलग (प्र० मालवे) सरीरे० उत्तराहिं आसाढाहिं विलेविं० अभीयणा पुप्फेहिं० सवणेणं खीरेणं० धणिट्ठाहिं जूसेण० सयभिसाए तुवरीओ० पुव्वाहिं पुट्ठवयाहिं कारिल्लएहिं० उत्तराहिं पुट्ठवताहिं वराहमंसं० रेवतीहिं जलयरमंसं० अस्सिणीहिं तित्तिरमंसं० वट्ठकमंसं० वा० भरणीहिं तिलतंदुलकं भोच्चा कज्जं साधंति ॥५१॥१०-१७॥ ता कहां ते चारा आहि० ?, तत्थ खलु इमा दुविहा चारा पं० तं०-आदिच्चारा

य चन्दचारा य, ता कहं ते चंदचारा आहि० ?, ता पंचसंवच्छरिए णं जुगे अभीङ्गणक्खत्ते सत्तसट्ठिचारे चंदेण सद्धिं जोयं जोएति, सवणे णं णक्खत्ते सत्तट्ठि चारे चंदेण सद्धिं जोयं जोएति एवं जाव उत्तरासाढाणक्खत्ते सत्तट्ठिचारे चंदेण सद्धिं जोयं जोएति, ता कहं ते आइच्चचारा आहितेति वदेज्जा ?, ता पंचसंवच्छरिए णं जुगे अभीङ्गणक्खत्ते (१९९) पंचचा (वा) रे सूरें सद्धिं जोयं जोएति, एवं जाव उत्तरासाढाणक्खत्ते पंचचा (वा) रे सूरें सद्धिं जोयं जोएति । ५२॥१०-१८॥ ता कहं ते मासा आहि० ?, ता एगमेगस्स णं संवच्छरस्स बारस मासा पं०, तेसिं च दुविहा नामधेज्जा पं० तं०-लोइया लोउत्तरिया य, तत्थ लोइया णामा-सावणे भद्वत्ते आसोए जाव आसाढे, लोउत्तरिया णामा-‘अभिण्दे सुपट्ठे य, विजये पीतिवद्धणे । सेज्जंसे सिवे यावि, सिसिरे य सहेमवं ॥२३॥ नवमे वसंतमासे, दसमे कुसुमसंभवे । एकादसमे णिदाहो, वणविरोही य बारसे ॥२४॥५३॥१०-१९॥ ता कति णं भंते ! संवच्छरा आहि० ?, ता पंच संवच्छरा आहि०, तं०-णक्खत्तसंवच्छरे जुग० पमाण० लक्खण० सणिच्छरसंवच्छरे । ५४॥ ता णक्खत्तसंवच्छरे णं दुवालसविहे पं० तं०-सावणे भद्वए जाव आसाढे, जं वा बहस्सती महग्गहे दुवालसहिं संवच्छरेहिं सव्वं णक्खत्तमंडलं समाणेति । ५५॥ ता जुगसंवच्छरे णं पंचविहे पं० तं०-चंदे चंदे अभिवट्ठिए चंदे अभिवट्ठिए चेव, ता पढमस्स णं चंदसंवच्छरस्स चउवीसं पव्वा पं० दोच्चस्स णं चंदसंवच्छरस्स चउवीसं पव्वा पं० तच्चस्स णं अभिवट्ठितसंवच्छरस्स छव्वीसं पव्वा पं० चउत्थस्स णं चंदसंवच्छरस्स चउवीसं पव्वा पं० पंचमस्स णं अभिवट्ठियसंवच्छरस्स छव्वीसं पव्वा पं०, एवामेव सपुव्वावरेणं पंचसंवच्छरिए जुगे एगे चउवीसे पव्वसते भवतीतिमक्खातं । ५६॥ ता पमाणसंवच्छरे पंचविहे पं० तं०-नक्खत्ते चंदे उडू आइच्चे अभिवट्ठिए । ५७॥ ता लक्खणसंवच्छरे पंचविहे पं० तं०-नक्खत्ते चंदे उडू आइच्चे अभिवट्ठिए, ता णक्खत्ते णं संवच्छरे णं पंचविहे पं०-‘समगं णक्खत्ता जोयं जोएति समगं उडू परिणमंति । नच्चुण्हं नाइसीए बहुउदए होइ नक्खत्ते ॥२५॥ ससिसमगपुत्तिमासिं जोइंता विसमचारिनक्खत्ता । कडुओ बहुउद्वओ य तमाहु संवच्छरं चंदं ॥२६॥ विसमं पवालिणो परिणमंति अणुऊसु दिंति पुप्फफलं । वासं न सम्म वासइ तमाहु संवच्छरं कम्मं ॥२७॥ पुढवीदगाणं च रसं पुप्फफलाणं च देइ आइच्चे । अप्पेणवि वासेणं संमं निप्फज्जए सस्सं ॥२८॥ आइच्चतेयतविया खणलवदिवसा उऊ परिणमन्ति । पूरेति निण्णथलये तमाहु अभिवट्ठितं जाण ॥२९॥ ता सणिच्छरसंवच्छरे णं अट्ठावीसतिविहे पं० तं०-अभियी सवणे जाव उत्तरासाढा, जं वा सणिच्छरे महग्गहे तीसाए संवच्छरेहिं सव्वं णक्खत्तमंडलं समाणेति । ५८॥१०-२०॥ ता कहं ते जोतिसस्स दारा आहि० ?, तत्थ खलु इमाओ पंच पडिवत्तीओ पं०, तत्थेगे एवमाहंसु ता कत्तियादी णं सत्त नक्खत्ता पुव्वदारिया पं० एगे एव०, एगे पुण० ता महादीया सत्त पुव्व० पं० एगे एव०, एगे पुण०-अणुराहाइया सत्त पुव्व० पं० एगे०, एगे पुण०-धणिट्ठादीया सत्त पुव्व० पं० एगे०, एगे पुण०-अस्सिणीयादीया णं सत्त पुव्व० पं० एगे०, एगे० पुण०-भरणीयादीया णं सत्त णक्खत्ता पुव्व० पं०, तत्थ जे ते एवमाहंसु ता कत्तियादी णं सत्त पुव्व० पं० ते एव० तं०-कत्तिया रोहिणी संठाणा अट्ठा पुणव्वसू पुरस्सो असिलेसा, सत्त णक्खत्ता दाहिणदारिया पं० तं०-महा पुव्वाफग्गुणी उत्तराफग्गुणी हत्थो चित्ता साई विसाहा, अणुराधादीया सत्त णक्खत्ता पच्छिमदारिया पं० तं०-अणुराधा जेट्ठा मूलो पुव्वासाढा उत्तरासाढा अभियी सवणो, धणिट्ठादीया सत्त णक्खत्ता उत्तरदारिया पं० तं०-धणिट्ठा सतभिसया पुव्वापोट्ठवता उत्तरापोट्ठवता रेवती अस्सिणी भरणी, तत्थ जे ते एवमाहंसु ता महादीया सत्त पुव्व० पं० ते एव० तं०-महा पुव्वाफग्गुणी उत्तराफग्गुणी हत्थो चित्ता साती विसाहा, अणुराधादीया सत्त दाहिण० पं० तं०-अणुराधा जेट्ठा मूलो पुव्वासाढा उत्तरासाढा अभियी सवणे, धणिट्ठादीया सत्त पच्छिम० पं० तं०-धणिट्ठा सतभिसया पुव्वापोट्ठवता उत्तरापोट्ठवता रेवती अस्सिणी भरणी, कत्तियादीया सत्त उत्तर० पं० तं०-कत्तिया रोहिणी संठाणा अट्ठा पुणव्वसू पुरस्सो अस्सेसा, तत्थ णं जे ते एव० ता धणिट्ठादीया सत्त पुव्व० पं० ते एव० तं०-धणिट्ठा सतभिसया पुव्वाभद्वया उत्तराभद्वया रेवती अस्सिणी भरणी, कत्तियादीया सत्त दाहिण० पं० तं०-कत्तिया रोहिणी संठाणा अट्ठा पुणव्वसू पुरस्सो अस्सेसा, महादीया सत्त पच्छिम० पं० तं०-महा पुव्वाफग्गुणी उत्तराफग्गुणी हत्थो चित्ता साती विसाहा, अणुराधादीया सत्त उत्तर० पं० तं०-अणुराधा जेट्ठा मूलो पुव्वासाढा उत्तरासाढा अभियी सवणो, तत्थ जे ते एव० ता अस्सिणीआदीया सत्त पुव्व० पं० ते एव० तं०-अस्सिणी भरणी कत्तिया रोहिणी संठाणा अट्ठा पुणव्वसू,

पुस्सादिया सत्त दाहिण० पं० तं०-पुस्सो अस्सेसा महा पुव्वाफग्गुणी उत्तराफग्गुणी हत्थो चित्ता, सादीयादीया सत्त पच्छिम० पं० तं०-साती विसाहा अणुराहा जेट्ठा मूलो पुव्वासाढा उत्तरासाढा, अभीयीआदीया सत्त उत्तर० पं० तं०-अभिई सवणो धणिट्ठा सतभिसया पुव्वाभद्वया उत्तराभद्वया रेवती, तत्थ जे ते एव० ता भरणिआदीया सत्त पुव्व० पं० ते एव० तं०-भरणी कत्तिया रोहिणी संठाणा अद्वा पुणव्वसू पुस्सो, अस्सेसादीया सत्त दाहिण० पं० तं०-अस्सेसा महा पुव्वाफग्गुणी उत्तराफग्गुणी हत्थो चित्ता साई, विसाहादीयासत्त पच्छिम० पं० तं०-विसाहा अणुराहा जेट्ठा मूलो पुव्वासाढा उत्तरासाढा अभिई, सवणादीया सत्त उत्तर० पं० तं०-सवणो धणिट्ठा सतभिसया पुव्वापोट्ठवया उत्तरापोट्ठवया रेवती अस्सिणी एगे एवं०, वयं पुण एवं वदामो ता अभिईयादिया सत्त पुव्वदा० पं० तं०-अभीयी सवणो धणिट्ठा सतभिसया पुव्वापोट्ठवता उत्तरापोट्ठवया रेवती, अस्सिणी आदीया सत्त दाहिण० पं० तं०-अस्सिणी भरणी कत्तिया रोहिणी संठाणा अद्वा पुणव्वसू, पुस्सादीया सत्त पच्छिम० पं० तं०-पुस्सो अस्सेसा महा पुव्वाफग्गुणी उत्तराफग्गुणी हत्थो चित्ता, सातिआदीया सत्त णक्खत्ता उत्तरदारिया पं० तं०-साती विसाहा अणुराहा जेट्ठा मूले पुव्वासाढा उत्तरासाढा ।५९॥१०-२१॥ ता कहं ते णक्खत्तविजये आहि० ?, ता अयणं जंबुद्वीवे जाव परिकखेवेणं, ता जंबुद्वीवे दो चंदा पभासेंसु वा पभासेंति वा पभासिस्संति वा दो सूरिया तविंसु वा तवेति वा तविस्संति वा छप्पणं णक्खत्ता जोयं जोएसु वा० तं०.दो अभीयी दो सवणा दो धणिट्ठा दो सतभिसया दो पुव्वापोट्ठवता दो उत्तरापोट्ठवता दो रेवती दो अस्सिणी दो भरणी दो कत्तिया दो रोहिणी दो संठाणा दो अद्वा दो पुणव्वसू दो पुस्सा दो अस्सेसा दो महा दो पुव्वाफग्गुणी दो उत्तराफग्गुणी दो हत्था दो चित्ता दो साई दो विसाहा दो अणुराधा दो जेट्ठा दो मूला दो पुव्वासाढा दो उत्तरासाढा, ता एसिं णं छप्पण्णाए णक्खत्ताणं अत्थि णक्खत्ता जे णं णव मुहुत्ते सत्तावीसं च सत्तट्ठिभागे मुहुत्तस्स चंदेण सद्धिं जोयं जोएंति अत्थि णक्खत्ता जे णं पण्णरस मुहुत्ते चंदेण० अत्थि णक्खत्ता जे णं तीसइमुहुत्ते० अत्थि णक्खत्ता जे णं पणयालीसं मुहुत्ते चंदेण०, ता एतेसिं णं छप्पण्णाए णक्खत्ताणं कतरे णक्खत्ते जे णं णव मुहुत्ते सत्तावीसं च सत्तट्ठिभागे मुहुत्तस्स चंदेण० कतरे णक्खत्ता जे णं पन्नरस मुहुत्ते० कतरे णक्खत्ता जे णं तीसं मुहुत्ते० कतरे णक्खत्ता जे णं पणतालीसं मुहुत्ते चंदेण सद्धिं जोयं जोएंति ?, ता एतेसिं णं छप्पण्णाए णक्खत्ताणं तत्थ जे ते णक्खत्ता जे णं णव मुहुत्ते सत्तावीसं च सत्तट्ठिभागे मुहुत्तस्स चंदेण० ते णं दो अभीयी, तत्थ जे ते णक्खत्ता जे णं पण्णरस मुहुत्ते चंदेण० ते णं बारस तं०-दो सतभिसया दो भरणी दो अद्वा दो अस्सेसा दो साती दो जेट्ठा, तत्थ जे० णं तीसं मुहुत्ते चंदेण० ते णं तीसं तं०-दो सवणा दो धणिट्ठा दो पुव्वभद्वता दो रेवती दो अस्सिणी दो कत्तिया दो संठाणा दो पुस्सा दो महा दो पुव्वाफग्गुणी दो हत्था दो चित्ता दो अणुराधा दो मूला दो पुव्वासाढा, तत्थ जे ते णक्खत्ता पणतालीसं मुहुत्ते० ते णं बारस तं०-दो उत्तरापोट्ठवता दो रोहिणी दो पुणव्वसू दो उत्तराफग्गुणी दो विसाहा दो उत्तरासाढा, ता एसिं णं छप्पण्णाए णक्खत्ताणं अत्थि णक्खत्ते जे णं चत्तारि अहोरत्ते छच्च मुहुत्ते सूरिएण सद्धिं जोयं जोएंति अत्थि णक्खत्ता जे णं छ अहोरत्ते एकवीसं च मुहुत्ते सूरेंण० अत्थि णक्खत्ता जे णं तेरस अहोरत्ते बारस मुहुत्ते सूरेंण० अत्थि णक्खत्ता जे णं वीसं अहोरत्ते तिन्नि य मुहुत्ते सूरेंण०, एसिं णं छप्पण्णाए णक्खत्ताणं कयरे णक्खत्ता जे णं तं चैव उच्चारैयव्वं, ता एतेसिं णं छप्पण्णाए णक्खत्ताणं तत्थ जे ते णक्खत्ता जे णं चत्तारि अहोरत्ते छच्च मुहुत्ते सूरेंण० ते णं दो अभीयी, तत्थ जे ते णक्खत्ता जे णं छ अहोरत्ते एकवीसं च मुहुत्ते सूरेंण० ते णं बारस तं०-दो सतभिसया दो भरणी दो अद्वा दो अस्सेसा दो साती दो जेट्ठा, तत्थ जे ते णक्खत्ता जे णं तेरस अहोरत्ते बारस मुहुत्ते सूरेंण० ते णं तीसं तं०- दो सवणा जाव दो पुव्वासाढा, तत्थ जे ते णक्खत्ता जे णं वीसं अहोरत्ते तिण्णि य मुहुत्ते सूरेंण सद्धिं जोयं जोएंति ते णं बारस तं०- दो उत्तरापोट्ठवता जाव उत्तरासाढा ।६०। ता कहं ते सीमा विक्खंभे आहितेति वदेज्जा ?, ता एतेसिं णं छप्पण्णाए णक्खत्ताणं अत्थि णक्खत्ता जेसिं णं छ सया तीसा सत्तट्ठिभागतीसतिभागाणं सीमाविक्खंभो अत्थि णक्खत्ता जेसिं णं सहस्सं पंचोत्तरं सत्तसट्ठिभागतीसतिभागाणं सीमाविक्खंभो अत्थि णक्खत्ता जेसिं णं दो सहस्सा दसुत्तरा संत्तट्ठिभागतीसतिभागाणं सीमाविक्खंभो अत्थि णक्खत्ता जेसिं णं तिसहस्सं पंचदसुत्तरं सत्तट्ठिभागतीसतिभागाणं सीमाविक्खंभो, ता एतेसिं णं छप्पण्णाए णक्खत्ताणं कतरे णक्खत्ता जेसिं णं छ सया तीसा तं चैव उच्चारैयव्वं जाव तिसहस्सं पंचदसुत्तरं सत्तसट्ठिभागतीसतिभागाणं

श्री आगमगुणमंजूषा - ११३०

एएसि णं पंचण्हं संवच्छराणं पढमं अमावासं चंदे कंसि देसंसि जोएति ?, ता जंसि णं देसंसि चंदे चरिमं बावट्ठिं अमावासं जोएति ताते अमावासट्ठाणातो मंडलं चउवीसेणं सतेणं छेत्ता बत्तीसं भागे उवादिणावेत्ता एत्थ णं से चंदे पढमं अमावासं जोएति, एवं जेणेव अभिलावेणं चंदस्स पुण्णमासिणीओ भणिताओ तेणेव अभिलावेणं अमावासाओ भणितव्वाओ, बिइया ततिया दुवालसमी, एवं खलु एतेणुवाएणं ताते २ अमावासट्ठाणाते मंडलं चउवीसेणं सतेणं छेत्ता दुतीसं २ भागे उवादिणावेत्ता तंसि २ देसंसि तं तं अमावासं चंदेण जोएति, ता एतेसिं णं पंचण्हं संवच्छराणं चरमं बावट्ठिं अमावासं चंदे कंसि देसंसि जोएति ?, ता जंसि णं देसंसि चंदे चरिमं बावट्ठिं पुण्णमासिणिं जोएति ताते पुण्णमासिणिंटाणाए मंडलं चउवीसेणं सतेणं छेत्ता सोलसभागे ओसक्कावइत्ता एत्थ णं से चंदे चरिमं बावट्ठिं अमावासं जोएति ।६५। ता एतेसिं णं पंचण्हं संवच्छराणं पढमं अमावासं सूरु कंसि देसंसि जोएति ?, ता जंसि णं देसंसि सूरु चरिमं बावट्ठिं अमावासं जोएति ताते अमावासट्ठाणाते मंडलं चउवीसेणं सतेणं छेत्ता चउणउतिभागे उवायणावेत्ता एत्थ णं से सूरु पढमं अमावासं जोएति, एवं जेणेव अभिलावेणं सूरियस्स पुण्णमासिणीओ तेणेव अमावासाओवि, तं०-बिदिया तइया दुवालसमी, एवं खलु एतेणुवाएणं ताते २ अमावासट्ठाणाते मंडलं चउवीसेणं सतेणं छेत्ता चउणउतिं २ भागे उवायणावेत्ता ता तंसि २ देसंसि तं तं अमावासं सूरिए जोएति, ता एतेसिं णं पंचण्हं संवच्छराणं चरिमं बावट्ठिं अमावासं सूरु कंसि देसंसि जोएइ ?, ता जंसि णं देसंसि सूरु चरिमं बावट्ठिं पुण्णमासिं जोएति ताते पुण्णमासिणिट्ठाणाते मंडलं चउवीसेणं सतेणं छेत्ता सत्तालीसं भागे ओसक्कावइत्ता एत्थ णं से सूरु चरिमं बावट्ठिं अमावासं जोएति ।६६। ता एसि णं पंचण्हं संवच्छराणं पढमं पुण्णमासिणिं चंदे केणं णक्खत्तेणं जोएति ?, ता धणिट्ठाहिं, धणिट्ठाणं तिण्णि मुहुत्ता एकूणवीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता पण्णट्ठी चुण्णिया भागा सेसा, तंसमयं च णं सूरिए केणं णक्खत्तेणं जोएति ?, ता पुव्वाफग्गुणीहिं, ता पुव्वाफग्गुणीणं अट्ठावीसं मुहुत्ता अट्ठतीसं च बावट्ठिभा मुहुत्तस्स बावट्ठिभागं च सत्तट्ठिधा छेत्ता बत्तीसं चुण्णिया भागा सेसा, ता एसिं णं पंचण्हं संवच्छराणं दोच्चं पुण्णमासिणिं चंदे केणं णक्खत्तेणं जोएति ?, ता उत्तराहिं पोट्ठवताहिं, उत्तराणं पोट्ठवताणं सत्तावीसं मुहुत्ता चोदस य बावट्ठिभागे मुहुत्तस्स बावट्ठिभागं च सत्तट्ठिधा छेत्ता बावट्ठी चुण्णिया भागा सेसा, तंसमयं च णं सूरु केणं णक्खत्तेणं जोएति ?, ता उत्तराहिं फग्गुणीहिं, उत्तराफग्गुणीणं सत्तं मुहुत्ता तेत्तीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता एकतीसं चुण्णिया भागा सेसा, ता एतेसिं णं पंचण्हं संवच्छराणं तच्चं पुण्णमासिणिं चंदे केणं णक्खत्तेणं जोएति ?, ता अस्सिणीहिं, अस्सिणीणं एकवीसं मुहुत्ता णव य एगट्ठिभागा मुहुत्तस्स बावट्ठिभागं च सत्तट्ठिधा छेत्ता तेवट्ठी चुण्णिया भागा सेसा, तंसमयं च णं सूरु केणं णक्खत्तेणं जोएति ?, ता चित्ताहिं, चित्ताणं एक्को मुहुत्तो अट्ठावीसं च बावट्ठी भागा मुहुत्तस्स बावट्ठिभागं च सत्तट्ठिधा छेत्ता तीसं चुण्णिया भागा सेसा, ता एतेसिं णं पंचण्हं संवच्छराणं दुवालसमं पुण्णमासिणिं चंदे केणं णक्खत्तेणं जोएति ?, ता उत्तराहिं आसाढाहिं, उत्तराणं च आसाढाणं छवीसं मुहुत्ता छवीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता चउपण्णं चुण्णिया भागा, तंसमयं च णं सूरु केणं णक्खत्तेणं जोएति ?, ता पुणव्वसुणा, पुणव्वसुस्स सोलस मुहुत्ता अट्ठ य बावट्ठी भागा मुहुत्तस्स बावट्ठिभागं च सत्तट्ठिधा छेत्ता वीसं चुण्णिया भागा सेसा, ता एतेसिं णं पंचण्हं संवच्छराणं चरमं बावट्ठिं पुण्णमासिणिं चंदे केणं णक्खत्तेणं जोएति ?, ता उत्तराहिं आसाढाहिं, उत्तराणं आसाढाणं चरमसमए, तंसमयं च णं सूरु केणं णक्खत्तेणं जोएति ?, ता पुस्सेणं, पुस्सेस्स एकूणवीसं मुहुत्ता तेतालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता तेत्तीसं चुण्णिया भागा सेसा ।६७। एतेसिं णं पंचण्हं संवच्छराणं पढमं अमावासं चंदे केणं णक्खत्तेणं जोएति ?, ता अस्सेसाहिं, अस्सेसाणं एक्के मुहुत्ते चत्तालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता छावट्ठी चुण्णिया भागा सेसा, तंसमयं च णं सूरु केणं णक्खत्तेणं जोएति ?, ता अस्सेसाहिं चैव, अस्सेसाणं एक्को मुहुत्तो चत्तालीसं च बावट्ठिभागा मुहुत्तस्स बावट्ठिभागं सत्तट्ठिधा छेत्ता छावट्ठि चुण्णिया भागा सेसा, ता एसिं णं पंचण्हं संवच्छराणं दोच्चं अमावासं चंदे केणं णक्खत्तेणं जोएति ?, ता उत्तराहिं फग्गुणीहिं, उत्तराणं फग्गुणीणं चत्तालीसं मुहुत्ता पणतीसं बावट्ठिभागा मुहुत्तस्स बावट्ठिभागं च सत्तट्ठिधा छेत्ता पण्णट्ठिं चुण्णिया भागा सेसा, तंसमयं च णं सूरु केणं णक्खत्तेणं जोएति ?, ता उत्तराहिं चैव फग्गुणीहिं, उत्तराणं फग्गुणीणं

तथेव जथा चंदस्स, ता एतेसिं णं पंचण्हं संवच्छराणं तच्चं अमावासं चंदे केणं नक्खत्तेणं जोएति ?, ता हत्थेणं, हत्थस्स चत्तारि मुहुत्ता तीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता बावट्ठी चुण्णिया भागा सेसा, तंसमयं च णं सूरं केणं नक्खत्तेणं जोएति ?, ता हत्थेणं चेव, हत्थस्स जहा चंदस्स, ता एएसिं णं पंचण्हं संवच्छराणं दुवालसमं अमावासं चंदे केणं नक्खत्तेणं जोएति ?, ता अद्दाहिं, अद्दाणं चत्तारि मुहुत्ता दस य बावट्ठिभागा मुहुत्तस्स बावट्ठिभागं च सत्तट्ठिधा छेत्ता चउपण्णं चुण्णिया भागा सेसा, तंसमयं च णं सूरं केणं नक्खत्तेणं जोएति ?, ता अद्दाहिं चेव, अद्दाणं जहा चंदस्स, ता एएसिं णं पंचण्हं संवच्छराणं चरिमं बावट्ठिं अमावासं चंदे केणं नक्खत्तेणं जोएति ?, ता पुणव्वसुणा, पुणव्वसुस्स बावीसं मुहुत्ता बायालीसं च बासट्ठिभागा मुहुत्तस्स सेसा, तंसमयं च णं सूरं केणं नक्खत्तेणं जोएति ?, ता पुणव्वसुणा चेव, पुणव्वसुस्स णं जहा चंदस्स ।६८। ता जेणं अज्ज नक्खत्तेणं चंदे जोयं जोएति जंसि देसंसि से णं इमाणि अट्ठ एकूणवीसाणि मुहुत्तसताइं चउवीसं च बावट्ठिभागं मुहुत्तस्स बावट्ठिभागं च सत्तट्ठिधा छेत्ता बावट्ठिं चुण्णियाभागे उवायिणावेत्ता पुणरवि से चंदे अण्णेणं सरिसएणं चेव नक्खत्तेणं जोयं जोएति अण्णंसि देसंसि, ता जेणं अज्ज नक्खत्तेणं चंदे जोयं जोएति जंसि देसंसि से णं इमाइं सोलस अट्ठतीस मुहुत्तसताइं अउणापण्णं च बावट्ठिभागे मुहुत्तस्स बावट्ठिभागं च सत्तट्ठिधा छेत्ता पण्णहि चुण्णियाभागे उवायिणावेत्ता पुणरवि से णं चंदे तेणं चेव नक्खत्तेणं जोयं जोएति अण्णंसि देसंसि, ता जेणं अज्ज नक्खत्तेणं चंदे जोयं जोएति जंसि देसंसि से णं इमाइं चउप्पण्णं मुहुत्तसहस्साइं णव य मुहुत्तसताइं उवादिणावित्ता पुणरवि से चंदे अण्णेणं तारिसएणं नक्खत्तेणं जोयं जोएति तंसि देसंसि, ता जेणं अज्ज नक्खत्तेणं चंदे जोयं जोएति जंसि देसंसि से णं इमं एणं मुहुत्तसयसहस्सं अट्ठाणउतिं च मुहुत्तसताइं उवायिणावित्ता पुणरवि से चंदे तेणं चेव नक्खत्तेणं जोयं जोएइ तंसि देसंसि, ता जेणं अज्ज नक्खत्तेणं सूरं जोयं जोएति जंसि देसंसि से णं इमाइं तिण्णि छावट्ठाइं राइंदियसताइं उवादिणावेत्ता पुणरवि से सुरिए अण्णेणं तारिसएणं चेव नक्खत्तेणं जोयं जोएति तंसि देसंसि, ता जेणं अज्ज नक्खत्तेणं सूरं जोयं जोएति तंसि देसंसि से णं इमाइं सत्तदुतीसं राइंदियसताइं उवाइणावेत्ता पुणरवि से सूरं तेणं चेव नक्खत्तेणं जोयं जोएति तंसि देसंसि, ता जेणं अज्ज नक्खत्तेणं सूरं जोएति जंसि देसंसि से णं इमाइं अट्ठारस तीसाइं राइंदियसताइं उवादिणावेत्ता पुणरवि सूरं अण्णेणं तारिसएणं चेव नक्खत्तेणं जोयं जोएति तंसि देसंसि, ता जेणं अज्ज नक्खत्तेणं सूरं जोयं जोयं जोएति जंसि देसंसि तेणं इमाइं छत्तीसं सट्ठाइं राइंदियसयाइं उवाइणावित्ता पुणरवि से सूरं तेणं चेव नक्खत्तेणं जोयं जोएति तंसि देसंसि ।६९। ता जया णं इमे चंदे गतिसमावण्णए भवति तता णं इतरेवि चंदे गतिसमावण्णए भवति जता णं इतरे चंदे गतिसमावण्णए भवति तता णं इमेवि चंदे गतिसमावण्णए भवति, ता जया णं इमे सूरिए गइसमावण्णे भवति तया णं इतरेवि सूरिए गइसमावण्णे भवति जता णं इतरे सूरिए गतिसमावण्णे भवति तया णं इमेवि सूरिए गइसमावण्णे भवति, एवं गहेवि नक्खत्तेवि, ता जया णं इमे चंदे जुत्ते जोगेणं भवति तता णं इतरेवि चंदे जुत्ते जोगेणं भवति जया णं इयरे चंदे जुत्ते जोगेणं भवइ तता णं इमेवि चंदे जुत्ते जोगेणं भवति, एवं सूरैवि गहेवि नक्खत्तेवि, सतावि णं चंदा जुत्ता जोएहिं सतावि णं सूरा जुत्ता जोगेहिं सयावि (२००) णं गहा जुत्ता जोगेहिं सयावि णं नक्खत्ता जुत्ता जोगेहिं दुहतोवि णं चंदा जुत्ता जोगेहिं दुहतोवि णं सूरा जुत्ता जोगेहिं दुहतोवि णं गहा जुत्ता जोगेहिं दुहतोवि णं नक्खत्ता जुत्ता जोगेहिं मंडलं सतसहस्सेणं अट्ठाणउतीए सतेहिं छेत्ता, इच्चेस नक्खत्तखत्तपरिभागे नक्खत्तविजए पाहुडेति आहितेत्तिबेमि ☆☆☆ ।७०। १०-२२ दसमं पाहुडं ॥ ☆☆☆ ता कहं ते संवच्छराणादी आहिं ? , तत्थ खलु इमे पंच संवच्छरा पं० तं०-चंदे चंदे अभिवट्ठिते चंदे अभिवट्ठिते, ता एतेसिं णं पंचण्हं संवच्छराणं पढमस्स चंदस्स संवच्छरस्स के आदी आहितेति वदेज्जा ?, ता जे णं पंचमस्स अभिवट्ठितसंवच्छरस्स पज्जवसाणे से णं पढमस्स चंदस्स संवच्छरस्स आदी अणंतरपुरक्खडे समए, ता से णं किंपज्जवसिते आहिं ? , ता जे णं दोच्चस्स चंदसंवच्छरस्स आदी से णं पढमस्स चंदसंवच्छरस्स पज्जवसाणे अणंतरपच्छाकडे समये, तंसमयं च णं चंदे केणं नक्खत्तेणं जोएति ?, ता उत्तराहिं आसाढाहिं, उत्तराणं आसाढाणं छव्वीसं मुहुत्ता छव्वीसं च बावट्ठीभागा मुहुत्तस्स बावट्ठिभागं च सत्तट्ठिधा छित्ता

चउप्पणं चुणिया भागा सेसा, तंसमयं सूरै केणं णक्खत्तेणं जोएति ?, ता पुणव्वसुणा, पुणव्वसुस्स सोलस मुहुत्ता अट्ठ य बावट्ठिभागा मुहुत्तस्स बावट्ठीभागं च सत्तट्ठिहा छेत्ता वीसं चुणिया भागा सेसा, ता एएसिं णं पंचणहं संवच्छराणं दोच्चस्स चंदसंवच्छरस्स के आदी आहिं ?, ता जे णं पढमस्स चंदसंवच्छरस्स पज्जवसाणे से णं दोच्चस्स णं चंदसंवच्छरस्स आदी अणंतरपुरक्खडे समये, ता से णं किंपज्जवसिते आहिं ?, ता जे णं तच्चस्स अभिवट्ठितसंवच्छरस्स आदी से णं दोच्चस्स चंदसंवच्छरस्स पज्जवसाणे अणंतरपच्छाकडे समये, तंसमयं च णं चंदे केणं णक्खत्तेणं जोएति ?, ता पुव्वाहिं आसाढाहिं, पुव्वाणं आसाढाणं सत्त मुहुत्ता तेवणं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता इगतालीसं चुणिया भागा सेसा, तंसमयं च णं सूरै केणं णक्खत्तेणं जोएति ?, ता पुणव्वसुणा, पुणव्वसुस्स णं बायालीसं मुहुत्ता पणतीसं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता सत्त चुणिया भागा सेसा, ता एतेसिं णं पंचणहं संवच्छराणं तच्चस्स अभिवट्ठितसंवच्छरस्स के आदी आहिं ?, ता जे णं दोच्चस्स चंदसंवच्छरस्स पज्जवसाणे से णं तच्चस्स अभिवट्ठितसंवच्छरस्स आदी अणंतरपुरक्खडे समए, ता से णं किंपज्जवसिते आहिं ?, ता जे णं चउत्थरस चंदसंवच्छरस्स आदी से णं तच्चस्स अभिवट्ठितसंवच्छरस्स पज्जवसाणे अणंतरपच्छाकडे समए, तंसमयं च णं चंदे केणं णक्खत्तेणं जोएति ?, ता उत्तराहिं आसाढाहिं, उत्तराणं आसाढाणं तेरस मुहुत्ता तेरस य बावट्ठिभागा मुहुत्तस्स बावट्ठिभागं च सत्तट्ठिहा छेत्ता सत्तावीसं चुणिया भागा सेसा, तंसमयं च णं सूरै केणं णक्खत्तेणं जोएति ?, ता पुणव्वसुणा, पुणव्वसुस्स दो मुहुत्ता छप्पणं बावट्ठिभागा मुहुत्तस्स बावट्ठिभागं च सत्तट्ठिहा छेत्ता सट्ठी चुणिया भागा सेसा, ता एएसिं णं पंचणहं संवच्छराणं चउत्थमस्स चंदसंवच्छरस्स के आदी आहिं ?, ता जे णं तच्चस्स अभिवट्ठितसंवच्छरस्स पज्जवसाणे से णं चउत्थस्स चंदसंवच्छरस्स आदी अणंतरपुरक्खडे समये, ता से णं किंपज्जवसिते आहिं ?, ता जे णं चरिमस्स अभिवट्ठितसंवच्छरस्स आदी से णं चउत्थस्स चंदसंवच्छरस्स पज्जवसाणे अणंतरपच्छाकडे समये, तंसमयं च णं चंदे केणं णक्खत्तेणं जोएति ?, ता उत्तराहिं आसाढाहिं, उत्तराणं आसाढाणं चत्तालीसं मुहुत्ता चत्तालीसं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता चउदस चुणिया भागा सेसा, तंसमयं च णं सूरै केणं णक्खत्तेणं जोएति ?, ता पुणव्वसुणा, पुणव्वसुस्स अउणतीसं मुहुत्ता एकवीसं बावट्ठिभागा मुहुत्तस्स बावट्ठिभागं च सत्तट्ठिहा छेत्ता सीतालीसं चुणिया भागा सेसा, ता एतेसिं णं पंचणहं संवच्छराणं पंचमस्स अभिवट्ठितसंवच्छरस्स के आदी आहिताति वदेज्जा ?, ता जे णं चउत्थस्स चंदसंवच्छरस्स पज्जवसाणे से णं पंचमस्स अभिवट्ठितसंवच्छरस्स आदी अणंतरपुरक्खडे समये, ता से णं किंपज्जवसिते आहिताति वदेज्जा ?, ता जे णं पढमस्स चंदसंवच्छरस्स आदी से णं पंचमस्स अभिवट्ठितसंवच्छरस्स पज्जवसाणे अणंतरपच्छाकडे समये, तंसमयं च णं चंदे केणं णक्खत्तेणं जोएति ?, ता उत्तराहिं आसाढाहिं, उत्तराणं आसाढाणं चरमसमये, तंसमयं च णं सूरै केणं णक्खत्तेणं जोएति ?, ता पुस्सेणं, पुस्सस्स णं एकवीसं मुहुत्ता तेतालीसं च बावट्ठिभागा मुहुत्तस्स बावट्ठीभागं च सत्तट्ठिहा छेत्ता तेत्तीसं चुणिया भागा सेसा

☆☆☆।७१। एकारसमं पाहुडं ११ ॥ ☆☆☆ ता कति णं संवच्छरा आहिं ?, तत्थ खलु इमे पंच संवच्छरा पं० तं०-णक्खत्ते चंदे उडू आदिच्चे अभिवट्ठिते, ता एतेसिं णं पंचणहं संवच्छराणं पढमस्स नक्खत्तसंवच्छरस्स णक्खत्तमासे तीसतिमुहुत्तेणं २ अहोरत्तेणं मिज्जमाणे केवतिए राइंदियग्गेणं आहिं ?, ता सत्तावीसं राइंदियाइं एकवीसं च सत्तट्ठिभागा राइंदियस्स राइंदियग्गेणं आहितेति वदेज्जा, ता से णं केवतिए मुहुत्तग्गेणं आहितेति वदेज्जा ?, ता अट्ठसए एकूणवीसे मुहुत्ताणं सत्तावीसं च सत्तट्ठिभागे मुहुत्तस्स मुहुत्तग्गेणं आहितेति वदेज्जा, ता एएसिं णं अब्बा दुवालसक्खत्तकडा णक्खत्ते संवच्छरे, ता से णं केवतिए राइंदियग्गेणं आहिं ?, ता तिण्णि सत्तावीसे राइंदियसते एक्कावन्नं च सत्तट्ठिभागा राइंदियग्गेणं आहितेति वदेज्जा, ता से णं केवतिए मुहुत्तग्गेणं आहितेति वदेज्जा ?, ता णव मुहुत्तसहस्सा अट्ठ य बत्तीसे मुहुत्तसए छप्पन्नं च सत्तट्ठिभागे मुहुत्तस्स मुहुत्तग्गेण आहिं, ता एएसिं णं पंचणहं संवच्छराणं दोच्चस्स चंदसंवच्छरस्स चंदे मासे तीसतिमुहुत्तेणं अहोरत्तेणं गणिज्जमाणे केवतिए राइंदियग्गेणं आहितेति वदेज्जा ?, ता एगूणतीसं राइंदियाइं बत्तीसं बावट्ठिभागा राइंदियस्स राइंदियग्गेणं आहिं,

ता से णं केवति ए मुहुत्तगणेणं आहि० ?, ता अट्ठपंचास ए मुहुत्ते तीसं च बावट्ठिभागे मुहुत्तगणेणं आहि०, ता एस णं अब्बा दुवालसखुत्तकडा चंदे संवच्छरे, ता से णं केवति ए राइंदियगणेणं आहि०, ता तिन्नि चउप्पन्ने राइंदियसते दुवालस य बावट्ठिभागा राइंदियगणेणं आहि० ?, तीसे णं० केवति ए मुहुत्तगणेणं आहि०, ता दस मुहुत्तसहस्साइं छच्च पणुवीसे मुहुत्तस ए पण्णासं च बावट्ठिभागे मुहुत्तेणं आहि०, ता एसिं णं पंचण्हं संवच्छराणं तच्चस्स उडुसंवच्छरस्स उडुमासे तीसतिमुहुत्तेणं गणिज्जमाणे केवति ए राइंदियगणेणं आहि०, ता तीसं राइंदियाणं राइंदियगणेणं आहि० ?, ता से णं केवति ए मुहुत्तगणेणं आहि० ?, ता णव मुहुत्तसताइं मुहुत्तगणेणं आहि०, ता एस णं अब्बा दुवालसखुत्तकडा उडुसंवच्छरे, ता से णं केवति ए राइंदियगणेणं आहि० ?, ता तिण्णि सट्ठे राइंदियसते राइंदियगणेणं आहि०, ता से णं केवति ए मुहुत्तगणेणं आहि० ?, ता दस मुहुत्तसहस्साइं अट्ठ यं सयाइं मुहुत्तगणेणं आहि०, ता एसिं णं पंचण्हं संवच्छराणं चउत्थस्स आदिच्चसंवच्छरस्स आइच्चे मासे तीसतिमुहुत्तेणं अहोरत्तेणं गणिज्जमाणे केवति ए राइंदियगणेणं आहि० ?, ता तीसं राइंदियाइं अब्बभागे च राइंदियस्स राइंदियगणेणं आहि०, ता से णं केवति ए मुहुत्तगणेणं आहि० ?, ता णवपण्णरस मुहुत्तस ए मुहुत्तगणेणं आहि०, ता एस णं अब्बा दुवालसखुत्तकडा आदिच्चे संवच्छरे, ता से णं केवति ए राइंदियगणेणं आहि० ?, ता तिन्नि छावट्ठे राइंदियस ए राइंदियगणेणं आहि०, ता से णं केवति ए मुहुत्तगणेणं आहि० ?, ता दस मुहुत्तसहस्साइं णव असीते मुहुत्तसते मुहुत्तगणेणं आहि०, ता एसिं णं पंचण्हं संवच्छराणं पंचमस्स अभिवट्ठियसंवच्छरस्स अभिवट्ठिते मासे तीसतिमुहुत्तेणं अहोरत्तेणं गणिज्जमाणे केवति ए राइंदियगणेणं आहि० ? ता एकतीसं राइंदियाइं एगूणतीसं च मुहुत्ता सत्तरस य बावट्ठिभागे मुहुत्तस्स राइंदियगणेणं आहि०, ता से णं केवति ए मुहुत्तगणेणं आहि० ?, ता णव एगूणसट्ठे मुहुत्तसते सत्तरस य बावट्ठिभागे मुहुत्तस्स मुहुत्तगणेणं आहि०, ता एस णं अब्बा दुवालसखुत्तकडा अभिवट्ठितसंवच्छरे, ता से णं केवति ए राइंदियगणेणं आहि० ?, तिण्णि तेसीते राइंदियसते एकवीसं च मुहुत्ता अट्ठारस बावट्ठिभागे मुहुत्तस्स राइंदियगणेणं आहि०, ता से णं केवति ए मुहुत्तगणेणं आहि० ?, ता एक्कारस मुहुत्तसहस्साइं पंच य एक्कारस मुहुत्तसते अट्ठारस बावट्ठिभागे मुहुत्तस्स मुहुत्तगणेणं आहि० ।७२। ता केवतियं ते नोजुगे राइंदियगणेणं आहि०, ता सत्तरस एकाणउते राइंदियसते एगूणवीसं च मुहुत्तं च सत्तावण्णे बावट्ठिभागे मुहुत्तस्स बावट्ठिभागं च सत्तट्ठिधा छेत्ता पणपण्णं चुण्णियाभागे राइंदियगणेणं आहि०, ता से णं केवति ए मुहुत्तगणेणं आहि० ?, ता तेपण्णमुहुत्तसहस्साइं सत्त य उणापन्ने मुहुत्तसते सत्तावण्णं बावट्ठिभागे मुहुत्तस्स बावट्ठिभागं च सत्तट्ठिधा छेत्ता पणपण्णं चुण्णिया भागा मुहुत्तगणेणं आहि०, ता केवति ए णं ते जुगप्पत्ते राइंदियगणेणं आहि० ?, ता अट्ठतीसं राइंदियाइं दस य मुहुत्ता चत्तारि य बावट्ठिभागे मुहुत्तस्स बावट्ठिभागं च सत्तट्ठिधा छेत्ता दुवालस चुण्णिया भागा राइंदियगणेणं आहि०, ता से णं केवति ए मुहुत्तगणेणं आहि० ?, ता एक्कारस पण्णासे मुहुत्तस ए चत्तारि य बावट्ठिभागे बावट्ठिभागं च सत्तट्ठिधा छेत्ता दुवालस चुण्णिया भागा मुहुत्तगणेणं आहि०, ता केवतियं णं जुगे राइंदियगणेणं आहि० ?, ता अट्ठारसतीसे राइंदियसते राइंदियगणेणं आहि०, ता से णं केवति ए मुहुत्तगणेणं आहि० ?, ता चउप्पण्णं मुहुत्तसहस्साइं णव य मुहुत्तसताइं मुहुत्तगणेणं आहि०, ता से णं केवति ए बावट्ठिभागमुहुत्तगणेणं आहि० ?, ता चउत्तीसं सत्तसहस्साइं अट्ठतीसं च बावट्ठिभागा मुहुत्तगणेणं आहि० ।७३। ता कता णं एते आदिच्चचंदसंवच्छरा समादीया समपज्जवसिया आहि० ?, ता सट्ठिं ए ए आदिच्चमासा बावट्ठि एते चंदमासा एस णं अब्बा छखुत्तकडा दुवालसभयिता तीसं एते आदिच्चसंवच्छरा एकतीसं एते चंदसंवच्छरा तता णं एते आदिच्चचंदसंवच्छरा समादीया समपज्जवसिया आहि०, ता कता णं एते आदिच्चउडुचंदणक्खत्तसंवच्छरा समादीया समपज्जवसिया आहि० ?, ता सट्ठिं एते आदिच्चा मासा एगट्ठि एते उडुमासा बावट्ठि एते चंदमासा सत्तट्ठिं एते नक्खत्ता मासा, एस णं अब्बा दुवालसखुत्तकडा दुवालसभयिता सट्ठिं एते आदिच्चा संवच्छरा एगट्ठिं एते उडू संवच्छरा बावट्ठिं एते चंदा संवच्छरा सत्तट्ठिं एते नक्खत्ता संवच्छरा, तता णं एते आदिच्चउडुचंदणक्खत्ता संवच्छरा समादीया समपज्जवसिया आहि०, ता कता णं एते अभिवट्ठियआदिच्चउडुचंदणक्खत्ता संवच्छरा समादीया समपज्जवसिता आहि० ?, ता सत्तावण्णं मासा सत्त य अहोरत्ता एक्कारस य मुहुत्ता तेवीसं बावट्ठिभागा मुहुत्तस्स एते णं अभिवट्ठिता मासा सट्ठिं एते आदिच्चा मासा एगट्ठि एते उडुमासा बावट्ठि एते चंदमासा सत्तट्ठि एते

नक्खत्तमासा एस णं अब्बा छप्पणसत्तखुत्तकडा दुवालसभयिता सत्त सया चोत्ताला एते णं अभिवद्धिता संवच्छरा, सत्त सता असीता एते णं आदिच्चा संवच्छरा, सत्त सता तेणउता एते णं उडुसंवच्छरा, अट्ट सता छलुत्तरा एते णं चंदा संवच्छरा, एकसत्तरी अट्ट सया एए णं नक्खत्ता संवच्छरा, तता णं एते अभिवद्धितआदिच्चउडुचंदनक्खत्ता संवच्छरा समादीया समपज्जवसिया आहि०, ता णयट्ठताए णं चंदे संवच्छरे तिणि चउप्पण्णे राइंदियसते दुवालस य बावट्ठिभागे राइंदियस्स आहि०, ता अहातच्चेणं चंदे संवच्छरे तिणि चउप्पण्णे राइंदियसते पंच मुहुत्ते पण्णासं च बावट्ठिभागे मुहुत्तस्स आहि० । ७४। तत्थ खलु इमे छ उडू पं० तं०-पाउसे वरिसारत्ते सरते हेमंते वसंते गिम्हे, ता सव्वेवि णं एते चंदउडू दुवे २ मासाति चउप्पण्णेणं आदाणेणं गणिज्जमाणा सातिरेगाइं एगूणसट्ठी २ राइंदियाइं राइंदियगेणं आहि०, तत्थ खलु इमे छ ओमरत्ता पं० तं०-ततीये पव्वे सत्तमे एक्कारसमे पन्नरसमे एगूणवीसतिमे तेवीसतिमे पव्वे, तत्थ खलु इमे छ अतिरत्ता पं० तं०-चउत्थे पव्वे अट्ठमे बारसमे सोलसमे वीसतिमे चउवीसतिमे पव्वे, 'छच्चेव य अइरत्ता आइच्चाओ हवंति माणाइं । छच्चेव ओमरत्ता चंदाहि हवंति माणाहि ॥३०॥७५। तत्थ खलु इमाओ पंच वासिक्कीओ पंच हेमंतीओ आउट्ठीओ पं०, ता एएसिं णं पंचण्हं संवच्छराणं पढमं वासिक्कीं आउट्ठिं चंदे केणं नक्खत्तेणं जोएति ?, ता अभीयिणा, अभीयिस्स पढमसमएणं, तंसमयं च णं सूरे केणं णक्खत्तेणं जोएति ?, ता पूसेणं पूसस्स एगूणवीसं मुहुत्ता तेत्तालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता तेत्तीसं चुण्णिया भागा सेसा, ता एएसिं णं पंचण्हं संवच्छराणं दोच्चं वासिक्किं आउट्ठिं चंदे केणं० ?, ता संठाणाहिं, संठाणाणं एक्कारस मुहुत्ता ऊतालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता तेपणं चुण्णिया भागा सेसा, तंसमयं सूरे केणं० ?, ता पूसेणं, पूसस्स णं तं चेव जं पढमाए, एतेसिं णं पंचण्हं संवच्छराणं तच्चं वासिक्किं आउट्ठिं चंदे केणं० ?, ता विसाहाहिं, विसाहाणं तेरस मुहुत्ता चउप्पणं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता चत्तालीसं चुण्णिया भागा सेसा, तंसमयं च णं सूरे केणं० ?, ता पूसेणं, पूसस्स तं चेव, ता एतेसिं णं पंचण्हं संवच्छराणं चउत्थिं वासिक्किं आउट्ठिं चंदे केणं० ?, ता रेवतीहिं, रेवतीणं पणवीसं मुहुत्ता बत्तीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता छव्वीसं चुण्णिया भागा सेसा, तंसमयं च णं सूरे केणं० ?, ता पूसेणं, पूसस्स तं चेव, ता एतेसिं णं पंचण्हं संवच्छराणं पंचमिं वासिक्किं आउट्ठिं चंदे केणं० ?, ता पुव्वाहिं फग्गुणीहिं, पुव्वाफग्गुणीणं बारस मुहुत्ता सत्तालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता तेरस चुण्णिया भागा सेसा, तंसमयं च णं सूरे केणं० ?, ता पूसेणं, पूसस्स तं चेव । ७६। ता एएसिं णं पंचण्हं संवच्छराणं पढमं हेमंति आउट्ठिं चंदे केणं० ?, ता हत्थेणं, हत्थस्स णं पंच मुहुत्ता पण्णासं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता सद्ढी चुण्णिया भागा सेसा, तंसमयं च णं सूरे केणं० ?, उत्तराहिं आसाढाहिं, उत्तराणं आसाढाणं चरिमसमए, ता एएसिं णं पंचण्हं संवच्छराणं दोच्चं हेमंति आउट्ठिं चंदे केणं० ?, ता सतभिसयाहिं, सतभिसयाणं दुत्ति मुहुत्ता अट्ठावीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता छत्तालीसं चुण्णिया भागा सेसा, तंसमयं च णं सूरे केणं० ?, ता उत्तराहिं आसाढाहिं उत्तराणं आसाढाणं चरिमसमए, एतेसिं णं पंचण्हं संवच्छराणं तच्चं हेमंति आउट्ठिं चंदे केणं० ?, ता पूसेणं, पूसस्स एकूणवीसं मुहुत्ता तेतालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता तेत्तीसं चुण्णिया भागा सेसा, तंसमयं च णं सूरे केणं० ?, ता उत्तराहिं आसाढाहिं, उत्तराणं आसाढाणं चरिमसमए, ता एतेसिं णं पंचण्हं संवच्छराणं चउत्थिं हेमंति आउट्ठिं चंदे केणं० ?, ता मूलेणं, मूलस्स छ मुहुत्ता अट्ठावन्नं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता वीसं चुण्णिया भागा सेसा, तंसमयं च णं सूरे केणं० ?, ता उत्तराहिं आसाढाहिं, उत्तराणं आसाढाणं चरिमसमए, ता एतेसिं णं पंचण्हं संवच्छराणं पंचमिं हेमंति आउट्ठिं चंदे केणं० ?, कत्तियाहिं, कत्तियाणं अट्ठारस मुहुत्ता छत्तीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता छ चुण्णिया भागा सेसा, तंसमयं च णं सूरे केणं० ?, ता उत्तराहिं आसाढाहिं, उत्तराणं आसाढाणं चरिमसमए । ७७। तत्थ खलु इमे दसविधे जोए पं० तं०-वसभाणुजोए वेणुयाणुजोते मंचे मंचाइमंचे छत्ते छत्तातिच्छत्ते जुअणद्धे घणसंमद्धे पीणिते मंडकप्पुते णामं दसमे, एतेसिं णं पंचण्हं संवच्छराणं छत्तातिच्छत्तं जोयं चंदे कंसि देसंसि जोएति ?, ता जंबुद्धीवस्स पाईणपडीणायताए उदीणदाहिणायताए जीवाए मंडलं चउव्वीसेणं सतेणं छित्ता दाहिणपुरच्छिमिल्लंसि चउभागमंडलंसि

सत्तावीसं भागे उवादिणावेत्ता अट्टावीसतिभागं वीसथा छेत्ता अट्टारसभागे उवादिणावेत्ता तीहिं भागेहिं दोहिं य कलाहिं दाहिणपुरच्छिमिल्लं चउब्भागमंडलं असंपत्ते एत्थ णं से चंदे छत्तातिच्छत्तं जोयं जोएति, तं०-उप्पिं चंदो मज्झे णक्खत्ते हेट्ठा आदिच्चे, तंसमयं च णं चंदे केण० ?, ता चित्ताणं चरमसमए ★★★

।७८॥ बारसमं पाहुडं १२॥ ★★★ ता कहं ते चंदमसो वट्ठोवट्ठी आहि० ?, ता अट्टपंचासीते मुहुत्तसते तीसं च बावट्ठिभागे मुहुत्तस्स, ता दोसिणापक्खाओ अन्धगारपक्खसमयमाणे चंदे चत्तारि बायालसते छत्तालीसं च बावट्ठिभागे मुहुत्तस्स जाइं चंदे रज्जति तं०-पढमाए पढमं भागं बितियाए बितियं भागं जाव पण्णरसीए पण्णरसमं भागं, चरिमसमए चंदे रत्ते भवति, अवसेसे समए चंदे रत्ते विरत्ते य भवति, इयण्णं अमावासा, एत्थ णं पढमे पव्वे अमावासा, ता अंधारपक्खो, ता णं दोसिणापक्खं अयमाणे चंदे चत्तारि बायाले मुहुत्तसते छातालीसं च बावट्ठिभागा मुहुत्तस्स जाइंचंदे विरज्जति, तं०-पढमाए पढमं भागं बितियाए बितियं भागं जाव पण्णरसीए पण्णरसमं भागं, चरिमे समये चंदे विरत्ते भवति, अवसेससमए चंदे रत्ते य विरत्ते य भवति, इयण्णं पुण्णमासिणी, एत्थ णं दोच्चे पव्वे पुण्णमासिणी ।७९। तत्थ खलु इमाओ बावट्ठिं पुण्णमासिणीओ बावट्ठिं अमावासाओ पं०, बावट्ठि एते कसिणा रागा बावट्ठि एते कसिणा विरागा, एते चउव्वीसे पव्वसते एते चउव्वीसे कसिणरागविरागसते, जावतियाणं पंचण्हं संवच्छराणं समया एगेणं चउव्वीसेणं समयसतेणूणका एवतिया परित्ता असंखेज्जा देसरागवि रागसता भवंतीतिमक्खाता, अमावासातो णं पुण्णमासिणी चत्तारि बाताले मुहुत्तसते छत्तालीसं बावट्ठिभागे मुहुत्तस्स आहि०, ता पुण्णमासिणितो णं अमावासा चत्तारि बायाले मुहुत्तसते छत्तालीसं बावट्ठिभागे मुहुत्तस्स आहि०, ता अमावासातो णं अमावासा अट्टपंचासीते मुहुत्तसते तीसं च बावट्ठिभागे मुहुत्तस्स आहि०, ता पुण्णमासिणीतो णं पुण्णमासिणी अट्टपंचासीते मुहुत्तसते तीसं बावट्ठिभागे मुहुत्तस्स आहि०, एस णं एवतिए चंदे मासे एसं णं एवतिए सगले जुगे ।८०। ता चंदेणं अब्बमासेणं चंदे कति मंडलाइं चरति ?, ता चोदस चउब्भागमंडलाइं चरति एणं च चउवीसयसतभागं मंडलस्स, ता आइच्चेणं अब्बमासेणं चंदे कति मंडलाइं चरति ?, ता सोलस मंडलाइं चरति, सोलसमंडलचारी तदा अवराइं खलु दुवे अट्टकाइं जाइं चंदे केणइ असामण्णकाइं सयमेव पविट्ठित्ता २ चारं चरति, कतराइं खलु ते दुवे अट्टकाइं० ?, इमाइं खलु ते बे अट्टगाइं० तं०-निक्खममाणे चेव अमावासंतेणं पविसमाणे चेव पुण्णमासिंतेणं, एताइं खलु दुवे अट्टगाइं जाइं चंदे केणइ असामण्णगाइं सयमेव पविट्ठित्ता २ चारं चरइ, ता पढमायणगते चंदे दाहिणाते भागाते पविसमाणे सत्त अब्बमंडलाइं जाइं चंदे दाहिणाते भागाए पविसमाणे चारं चरति, कतराइं खलु ताइं० ?, इमाइं खलु ताइं० ?, तं०-विदिए अब्बमंडलले चउत्थे० छट्ठे० अट्टमे० दसमे० बारसमे० चउदसमे०, एताइं खलु ताइं सत्त अब्बमंडलाइं जाइं चंदे दाहिणाते भागाते पविसमाणे चारं चरति, ता पढमायणगते चंदे उत्तराते भागाते पविसमाणे छ अब्बमंडलाइं तेरस य सत्तट्ठिभागाइं अब्बमंडलस्स जाइं चंदे उत्तराते भागाए पविसमाणे चारं चरति, कतराइं खलु ताइं छ० ?, इमाइं खलु ताइं छ० तं०-तईए अब्बमंडले पंचमे० सत्तमे० नवमे० एक्कारसमे० तेरसमे० पन्नरसमब्बमंडलस्स तेरस सत्तट्ठिभागाइं, एताइं खलु ताइं छ अब्बमंडलाइं तेरस य सत्तट्ठिभागाइं अब्बमंडलस्स जाइं चंदे उत्तराते भागाते पविसमाणे चारं चरति, एतावयाव पढमे चंदायणे समत्ते भवति, ता णक्खत्ते अब्बमासे नो चंदे अब्बमासे चन्दे अब्बमासे नो णक्खत्ते अब्बमासे, ता नक्खत्ताओ अब्बमासातो ते चंदेणं अब्बमासेणं किमधियं चरति ?, एणं अब्बमंडलं चरति चत्तारि य सत्तट्ठिभागाइं अब्बमंडलस्स सत्तट्ठिभागं च एकतीसाए छेत्ता णव भागाइं, ता दोच्चायणगते चंदे पुरच्छिमाए भागाते णिक्खममाणे सत्त चउप्पण्णाइं जाइं चंदे परस्स चिन्नं पडिचरति सत्त तेरसकाइं जाइं चंदे अप्पणा चिण्णं चरति, ता दोच्चायणगते चंदे पच्चत्थिमाए भागाए निक्खममाणे छ चउप्पण्णाइं जाइं चंदे परस्स चिण्णं पडिचरति छ तेरसगाइं जाइं चंदे अप्पणो चिण्णं पडिचरति, अवरगाइं खलु दुवे तेरसगाइं जाइं चंदे केणइ असामन्नागाइं सयमेव पविट्ठित्ता २ चारं चरति, कतराइं खलु ताइं दुवे० ?, इमाइं खलु ताइं दुवे० सव्वब्भंतरे चेव मंडले सव्वबाहिरे चेव मंडले, एयाणि खलु ताणि दुवे तेरसगाइं जाइं चंदे केणइ जाव चारं चरइ, एतावता दोच्चे चंदायणे समत्ते भवति, ता णक्खत्ते मासे नो चंदे मासे चंदे मासे णो णक्खत्ते मासे,

ता णक्खत्ताते मासाए चंदेणं मासेणं किमथियं चरति ?, ता दो अद्धमंडलाइं चरति अट्ट य सत्तट्ठिभागाइं अद्धमंडलस्स सत्तट्ठिभागं च एकतीसधा छेत्ता अट्टारस भागाइं, ता तच्चायणगते चंदे पच्चत्थिमाते भागाए पविसमाणे बाहिराणंतरस्स पच्चत्थिमिल्लस्स अद्धमंडलस्स ईतालीसं सत्तट्ठिभागाइं जाइंचंदे अप्पणो परस्स य चिण्णं पडिचरति, तेरस सत्तट्ठिगाइं जाइं चंदे परस्स चिण्णाइं पडिचरति, तेरस सत्तट्ठिभागाइं जाइं चंदे अप्पणो परस्स य चिण्णं पडिचरति, एतावयाव बाहिराणं तरे पच्चत्थिमिल्ले अद्धमंडले समत्ते भवति, तच्चायणगते चंदे पुरच्छिमाए भागाए पविसमाणे बाहिरतच्चस्स पुरच्छिमिल्लस्स अद्धमंडलस्स ईतालीसं सत्तट्ठिभागाइं जाइं चंदे अप्पणो परस्स य चिण्णाइं पडियरति तेरस सत्तट्ठिभागाइं जाइं चंदे परस्स चिण्णं पडियरति तेरस सत्तट्ठिभागाइं जाइं चंदे अप्पणो परस्स य चिण्णं पडिचरति, एतावताव बाहिरतच्चे पुरच्छिमिल्ले अद्धमंडले समत्ते भवति, ता तच्चायणगते चंदे पच्चत्थिमाते भागाते पविसमाणे बाहिरचउत्थस्स पच्चत्थिमिल्लस्स अद्धमंडलस्स अट्ट सत्तट्ठिभागाइं सत्तट्ठिभागं च एकतीसधा छेत्ता अट्टारस भागाइं जाइं चंदे अप्पणो परस्स य चिण्णाइं पडियरति, एतावताव बाहिरचउत्थपच्चत्थिमिल्ले अद्धमंडले समत्ते भवइ, एव खलु चंदेणं मासेणं चंदे तेरस चउप्पणगाइं दुवे तेरसगाइं जाइं चंदे परस्स चिण्णाइं पडिचरति, तेरस तेरसगाइं जाइं चंदे अप्पणो चिण्णाइं पडियरति, दुवे ईतालीसगाइं दुवे तेरसगाइं अट्ट सत्तट्ठिभागं च एकतीसधा छेत्ता अट्टारस भागाइं जाइं चंदे अप्पणो परस्स य चिण्णाइं पडिचरति, अवराइं खलु दुवे तेरसगाइं जाइं चंदे केणई असामन्नगाइं सयमेव पविट्ठित्ता २ चारं चरति, इच्चेसो चंदमासो, अभिगमणिक्खमणवुट्ठिणिवुट्ठिअणवट्ठितसंठाणसंठितीविउव्वणगिट्ठिपत्ते रूवी चंदे देवे २ आहितेतिवदेज्जा ★★☆।८१॥ तेरससमं पाहुडं १३॥ ★★☆

ता कता ते दोसिणा बहू आहि० ?, ता दोसिणापक्खेणं दोसिणा बहू आहि०, ता कहं ते दोसिणापक्खे दोसिणा बहू आहि० ?, ता अंधकारपक्खाओ णं दोसिणा बहू आहि०, ता कहं ते अंधकारपक्खातो दोसिणापक्खे दोसिणा बहू आहि० ?, ता अंधकारपक्खातो णं दोसिणापक्खं अयमाणे चंदे चत्तारि बायाले मुहुत्तसते छत्तालीसं च बावट्ठिभागे मुहुत्तस्स जाइं चंदे विरज्जति, तं०-पढमाए पढमं भागं बिदियाए जाव पण्णरसीए पण्णरसं भागं, एवं खलु अंधकारपक्खातो दोसिणापक्खे दोसिणा बहू आहि०, ता केवतिया णं दोसिणापक्खे दोसिणा बहू आहि० ?, ता परित्ता असंखेज्जा भागा, ता (२०१) कता ते अंधकारे बहू आहि० ?, ता अंधयारपक्खे णं बहू अंधकारे आहि०, ता कहं ते अंधकारपक्खे अंधकारे बहू आहि० ?, ता दोसिणापक्खातो अंधकारपक्खे अंधकारे बहू आहि०, ता कहं ते दोसिणापक्खातो अंधकारपक्खे अंधकारे बहू आहि० ?, ता दोसिणापक्खातो णं अंधकारपक्खं अयमाणे चंदे चत्तारि वाताले मुहुत्तसते छायालीसं च बावट्ठिभागे मुहुत्तस्स जाइं चंदे रज्जति तं०-पढमाए पढमं भागं बिदियाए बिदियं जाव पण्णरसीए पण्णरसमं भागं, एवं खलु दोसिणापक्खातो अंधकारपक्खे अंधकारे बहू आहि०, ता केवतिए णं अंधकारपक्खे अंधकारे बहू आहि० ?, परित्ता असंखेज्जा भागा ★★☆।८२॥ चोदसमं पाहुडं १४॥ ★★☆

ता कहं ते सिग्घगती वत्थू आहि० ?, ता एतेसिं णं चंदिमसूरियगहगणनक्खत्ततारारूवाणं चंदेहिंतो सूरा सिग्घगती सूरैहिंतो गहा सिग्घगती गहेहिंतो णक्खत्ता सिग्घगती णक्खत्तेहिंतो तारा सिग्घगती, सव्वप्पगती चंदा सव्वसिग्घगती तारा, ता एगमेगेणं मुहुत्तेणं चंदे केवतियाइं भागसताइं गच्छति ?, ता जं जं मंडलं उवसंकमित्ता चारं चरति तस्स २ मंडलपरिक्खेवस्स सत्तरस अडसट्ठिं भागसते गच्छति मंडलं सतसहस्सेणं अट्ठाणउतीसतेहिं छेत्ता, ता एगमेगेणं मुहुत्तेणं सूरिए केवतियाइं भागसयाइं गच्छति ?, ता जं जं मंडलं उवसंकमित्ता चारं चरति तस्स २ मंडलपरिक्खेवस्स अट्टारस तीसे भागसते गच्छति मंडलं सतसहस्सेणं अट्ठाणउतीसतेहिं छेत्ता, ता एगमेगेणं मुहुत्तेणं णक्खत्ते केवतियाइं भागसताइं गच्छति ?, ता जं जं मंडलं उवसंकमित्ता चारं चरति तस्स २ मंडलपरिक्खेवस्स अट्टारस पणतीसे भागसते गच्छति मंडलं सतसहस्सेणं अट्ठाणउतीसतेहिं छेत्ता ।८३। ता जया णं चंदं गतिसमावण्णं सूरै गतिसमावण्णे भवति से णं गतिमाताए केवतियं विसेसेति ?, बावट्ठिभागे विसेसेति, ता जया णं चंदं गतिसमावण्णं णक्खत्ते गतिसमावण्णे भवइ से णं गतिमाताए केवतियं विसेसेइ ?, ता सत्तट्ठिभागे विसेसेति, ता जता णं सूरं गतिसमावण्णं णक्खत्ते

गतिसमावण्णे भवति से णं गतिमाताए केवतियं विसेसेति ?, ता पंच भागे विसेसेति, ता जता णं चंदं गतिसमावण्णं अभीयीणक्खत्ते णं गतिसमावण्णे पुरच्छिमाते भागाते समासादेति, पुरच्छिमाते भागाते समासादित्ता णव मुहुत्ते सत्तावीसं च सत्तट्ठिभागे मुहुत्तस्स चंदेण सद्धिं जोयं जोएति ता जोयं अणुपरियट्ठति ता विप्पजहाति ता विगतजोई यावि भवति, ता जता णं चंदं गतिसमावण्णं सवणे णक्खत्ते गतिसमावण्णे पुरच्छिमाए भागादे समासादेति ता तीसं मुहुत्ते चंदेण सद्धिं जोअं जोएति ता जोयं अणुपरियट्ठति ता विप्पजहाति ता विगतजोई यावि भवइ, एवं एएणं अभिलावेणं णेतव्वं, पण्णरसमुहुत्ताइं तीसतिमुहुत्ताइं पणयालीसमुहुत्ताइं भाणितव्वाइं जाव उत्तरासाढा, ता जता णं चंदं गतिसमावण्णं गहे गतिसमावण्णे पुरच्छिमाते भागाते समासादेति ता चंदेणं सद्धिं जोगं जुंजति ता जोगं अणुपरियट्ठति ता विप्पजहाति विगतजोई यावि भवति, ता जया णं सूरं गतिसमावण्णं अभीयीणक्खत्ते गतिसमावण्णे पुरच्छिमाते भागाते समासादेति ता चत्तारि अहोरत्ते छच्च मुहुत्ते सूरें सद्धिं जोयं जोएति ता जोयं अणुपरियट्ठति ता विप्पजहाति ता विगतजोगी यावि भवति, एवं छ अहोरत्ता एक्कवीसं मुहुत्ता य तेरस अहोरत्ता बारस मुहुत्ता य वीसं अहोरत्ता तिण्णि मुहुत्ता य सव्वे भणितव्वा जाव जता णं सूरं गतिसमावण्णं उत्तरासाढाणक्खत्ते गतिसमावण्णे पुरच्छिमाते भागाते समासादेति ता वीसं अहोरत्ते तिण्णि य मुहुत्ते सूरें सद्धिं जोयं जोएति ता जोयं अणुपरियट्ठति ता विप्पजहाति ता विगतजोगी यावि भवति, ता जता णं सूरं गतिसमावण्णं गहे गतिसमावण्णे पुरच्छिमाते भागाते समासादेति ता सूरें सद्धिं यथाजोयं जुंजति ता यथाजोयं अणुपरियट्ठति ता जाव विप्पजहाति ता विगतजोगी यावि भवति । ८४। ता णक्खत्तेणं मासेणं चंदे कति मंडलाइं चरति ?, ता तेरस मंडलाइं चरति तेरस य सत्तट्ठिभागे मंडलस्स, ता णक्खत्तेणं मासेणं सूरें कति मंडलाइं चरति ?, तेरस मंडलाइं चरति चोत्तालीसं च सत्तट्ठिभागे मंडलस्स, ता णक्खत्तेणं मासेणं णक्खत्ते कति मंडलाइं चरति ?, ता तेरस मंडलाइं चरति अब्बसीतालीसं च सत्तट्ठिभागे मंडलस्स, ता चंदेणं मासेणं चंदे कति मंडलाइं चरति ?, चोद्दस चउभागाइं मंडलाइं चरति एणं च चउव्वीससतं भागं मंडलस्स, ता चंदेणं मासेणं सूरें कति मंडलाइं चरति ?, ता पण्णरस चउभागाइं मंडलाइं चरति एणं च चउवीससयभागं मंडलस्स, ता चंदेणं मासेणं णक्खत्ते कति मंडलाइं चरति ?, ता पण्णरस चउभागाइं मंडलाइं चरति छच्च चउवीससतभागे मंडलस्स, ता उडुणा मासेणं चंदे कति मंडलाइं चरति ?, ता चोद्दस मंडलाइं चरति तीसं च एगट्ठिभागे मंडलस्स, ता उडुणा मासेणं सूरें कति मंडलाइं चरति ?, ता पण्णरस मंडलाइं चरति, ता उडुणा मासेणं णक्खत्ते कति मंडलाइं चरति ?, ता पण्णरस मंडलाइं चरति पंच य बावीससतभागे मंडलस्स, ता आदिच्चेणं मासेणं चंदे कति मंडलाइं चरति ?, ता चोद्दस मंडलाइं चरति एक्कारस य भागे मंडलस्स, ता आदिच्चेणं मासेणं सूरें कति मंडलाइं चरति ?, ता पण्णरस चउभागाहिगाइं मंडलाइं चरति, ता आदिच्चेणं मासेणं णक्खत्ते कति मंडलाइं चरति ?, ता पण्णरस चउभागाहिगाइं मंडलाइं चरति पंचतीसं च वीससतभागमंडलाइं चरति, ता अभिवट्ठिणं मासेणं चंदे कति मंडलाइं चरति ?, ता पणरस मंडलाइं तेसीतिं छलसीयसतभागे मंडलस्स, ता अभिवट्ठितेणं मासेणं सूरें कति मंडलाइं चरति ?, ता सोलस मंडलाइं चरति तीहिं भागेहिं ऊणगाइं दोहिं अडयालेहिं सएहिं मंडलं छित्ता, अभिवडिढतेणं मासेणं नक्खत्ते कति मंडलाइं चरति ?, ता सोलस मंडलाइं चरति सीतालीसाए सएहिं भागेहिं अहियाइं चोद्दसहिं अट्ठासीएहिं सएहिं मंडलं छेत्ता । ८५। ता एगमेगेणं अहोरत्तेणं चंदे कति मंडलाइं चरति ?, ता एणं अब्बमंडलं चरति एक्कतीसाए भागेहिं ऊणं णवहिं पण्णरसेहिं सएहिं अब्बमंडलं छेत्ता, ता एगमेगेणं अहोरत्तेणं सूरिए कति मंडलाइं चरति ?, ता एणं अब्बमंडलं चरति, ता एगमेगेणं अहोरत्तेणं णक्खत्ते कति मंडलाइं चरति ?, ता एणं अब्बमंडलं चरति दोहिं भागेहिं अधियं बत्तीसेहिं सएहिं अब्बमंडलं छेत्ता, ता एगमेगं मंडलं चंदे कतिहिं अहोरत्तेहिं चरति ?, ता दोहिं अहोरत्तेहिं चरति एक्कतीसाए भागेहिं अधितेहिं चउहिं चोतालेहिं सतेहिं राइंदिएहिं छेत्ता, ता एगमेगं मंडलं सूरें कतिहिं अहोरत्तेहिं चरति ?, ता दोहिं अहोरत्तेहिं चरति, ता एगमेगं मंडलं णक्खत्ते कतिहिं अहोरत्तेहिं चरति ?, ता दोहिं अहोरत्तेहिं चरति दोहिं भागेहिं ऊणेहिं तिहिं सत्तसट्ठेहिं सतेहिं राइंदिएहिं छेत्ता, ता जुगेणं चंदे कति मंडलाइं चरति ?, ता अट्ठचुलसीते मंडलसते चरति, ता जुगेणं सूरें कति मंडलाइं चरति ?, ता णवपण्णरसे मंडलसते चरति, ता जुगेणं णक्खत्ते कति मंडलाइं चरति ?, ता अट्ठारसपणतीसे दुभागमंडलसते चरति, इच्चेसा मुहुत्तगती

रिक्खातिमासराइंदियजुगमंडलपविभत्ती सिग्घगती वत्थु आहितेत्तिबेमि ☆☆☆ ॥८६॥ पन्नरसमं पाहुंडं १५॥ ☆☆☆ ता कहं ते दोसिणालक्खणे आहिं ? , ता चंदलेसादी य दोसिणादी य दोसिणाई य चंदलेसादी य के अट्टे किंलक्खणे ? , ता एकट्टे एकलक्खणे, ता सूरलेस्सादी य आयवेइ य आतवेति य सूरलेस्सादी य के अट्टे किंलक्खणे ? , ता एगट्टे एगलक्खणे, ता अंधकारेति छायाइ य छायाति य अंधकारेति य के अट्टे किंलक्खणे ? , ता एगट्टे एगलक्खणे ☆☆☆॥८७॥ सोलसं पाहुंडं १६॥ ☆☆☆ ता कहं ते चयणोववाते आहिं ? , तत्थ खलु इमाओ पणवीसं पडिवत्तीओ पं०, तत्थ एगे एव०-ता अणुसमयमेव चंदिमसूरिया अण्णे चयंति अण्णे उववज्जंति, एवं जहेव हेट्ठा तहेव जाव एगे पुण एव०-ता अणुओसप्पिणीउस्सप्पिणीमेव चंदिमसूरिया अण्णे चयंति अण्णे उववज्जंति एगे एव०, वयं पुण एवं वदामो-ता चंदिमसूरिया णं देवा महिइढीआ महाजुतीया महाबला महाजसा महासोक्खा महाणुभावा वरवत्थधरा वरमल्लधरा वरगन्धधरा वराभरणधरा अब्बोच्छित्तिणयट्ठताए काले अण्णे चयंति अण्णे उववज्जंति आहिं ☆☆☆ ॥८८॥ सत्तरसं पाहुंडं १७॥ ☆☆☆ ता कहं ते उच्चत्ते आहिं ? , तत्थ खलु इमाओ पणवीसं पडिवत्तीओ पं०, तत्थेगे एव०-ता एगं जोयणसहस्सं सूरु उइढं उच्चत्तेणं दिवइढं चंदे एगे एव०, एगे पुण०-ता दो जोयणसहस्साइ सूरु उइढं उच्चत्तेणं अइढातिज्जाइं चंदे एगे एव०, एगे पुण०-ता तिन्नि जोयणसहस्साइं सूरु उइढं उच्चत्तेणं अद्धुइढां चंदे०, एगे पुण०-ता चत्तारि जोयणसहस्साइं सूरु उइढं उच्चत्तेणं अब्बपंचमाइं चंदे एगे एव०, एगे पुण०-ता पंच जोयणसहस्साइं सूरु उइढं उच्चत्तेणं अब्बछट्ठाइं चंदे एगे एव०, एगे पुण०-ता छ जोयणसहस्साइं सूरु उइढं उच्चत्तेणं अब्बसत्तमाइं चंदे एगे एव०, एगे पुण०-ता सत्त जोयणसहस्साइं सूरु उइढं उच्चत्तेणं अब्बट्ठमाइं चंदे एगे एव० एगे पुण०-ता अट्ठ जोयणसहस्साइं सूरु उइढं उच्चत्तेणं अब्बनवमाइं चंदे एगे एव०, एगे पुण०-ता नव जोयणसहस्साइं सूरु उइढं उच्चत्तेणं अब्बदसमाइं चंदे एगे एव०, एगे पुण०-ता दस जोयणसहस्साइं सूरु उइढं उच्चत्तेणं अब्बएक्कारस चंदे एगे एव०, एगे पुण०-एक्कारस जोयणसहस्साइं सूरु उइढं उच्चत्तेणं अब्बबारस चंदे०, एतेणं अभिलावेणं णेतव्वं, बारस सूरु अब्बतेरस चंदे तेरस सूरु अब्बचोइस चंदे चउदस सूरु अब्बपण्णरस चंदे पण्णरस सूरु अब्बसोलस चंदे सोलससूरु अब्बसत्तरस चंदे सत्तरस सूरु अब्बअट्ठारस चंदे अट्ठारस सूरु अब्बएकूणवीसं चंदे एकोणवीसं सूरु अब्बवीसं चंदे वीसं सूरु अब्बएक्कवीसं चंदे एक्कवीसं सूरु अब्बवावीसं चंदे बावीसं सूरु अब्बतेवीसं चंदे तेवीसं सूरु अब्बचउवीसं चंदे चउवीसं सूरु अब्बपणवीसं चंदे एगे एव०, एगे पुण०-पणवीसं जोयणसहस्साइं सूरु उइढं उच्चत्तेणं अब्बछव्वीसं चंदे एगे एव०, वयं पुण०-एवं वदामो-ता इमीसे रयणप्पभाए पुढवीए बहुसमरमणिज्जाओ भूमिभागाओ सत्त णउइजोयणसए उइढं उप्पत्तिता हेट्ठिल्ले ताराविमाणे चारं चरति अट्ठजोयणसते उइढं उप्पत्तिता सूरविमाणे चारं चरति अट्ठअसीए जोयणसए उइढं उप्पत्तिता चंदविमाणे चारं चरति णव जोयणसताइं उइढं उप्पत्तिता उवरिल्ले ताराविमाणे चारं चरति, हेट्ठिल्लातो ताराविमाणातो दसजोयणाइं उइढं उप्पत्तिता सूरविमाणे चारं चरति नउतिं जोयणाइं उइढं उप्पत्तिता चंदविमाणे चारं चरति दसोवरिं जोयणसतं उइढं उप्पत्तिता उवरिल्ले ताराख्वे चारं चरति, सूरविमाणातो असीतिं जोयणाइं उइढं उप्पत्तिता चंदविमाणे चारं चरति जोयणसतं उइढं उप्पत्तिता उवरिल्ले ताराख्वे चारं चरति, ता चंदविमाणातो णं वीसं जोयणाइं उइढं उप्पत्तिता उवरिल्लते ताराख्वे चारं चरति, एवामेव सपुव्वावरेणं दसुत्तरजोयणसते बाहल्ले तिरियमसंखेज्जे जोतिसविसए जोतिसं चारं चरति आहिं ॥८९॥ ता अत्थि णं चंदिमसूरियाणं देवाणं हिट्ठं पि ताराख्वा अणुं पि तुल्लावि समं पि ताराख्वा अणुं पि तुल्लावि उप्पिं पि ताराख्वा अणुं पि तुल्लावि ? , ता अत्थि, ता कहं ते चंदिमसूरियाणं देवाणं हिट्ठं पि ताराख्वा अणुं पि तुल्लावि समं पि ताराख्वा अणुं पि तुल्लावि उप्पिं पि ताराख्वा अणुं पि तुल्लावि ? , ता जहा २ णं तेसिं णं देवाणं तवणियबंभचेराइं उस्सिताइं भवंति तहा २ णं तेसिं देवाणं एवं भवंति, तं०-अणुत्ते वा तुल्लत्ते वा, ता एवं खलु चंदिमसूरियाणं देवाणं हिट्ठं पि ताराख्वा अणुं पि तुल्लावि तहेव ॥९०॥ ता एगमेगस्स णं चंदस्स देवस्स केवतिया गहा परिवारो पं० केवतिया नक्खत्ता परिवारो पं० केवतिया तारा परिवारो पं० ? , ता एगमेगस्स णं चंदस्स देवस्स अट्ठासीती गहा परिवारो पं०, ता अट्ठावीसं णक्खत्ता परिवारो पं०,

‘छावट्टिसहस्साइं णव चेव सताइं पंचसयराइं । एगससीपरिवारो तारागणकोडिकोडिणं ॥३१॥ परिवारो पं० १९१। ता मंदरस्स णं पव्वतस्स केवतियं अबाधाए जोइसे चारं चरति ?, ता एक्कारस एक्कवीसे जोयणसते अबाधाए जोइसे चारं चरति, ता लोअंतातो णं केवतियं अबाधाए जोतिसे पं० ?, ता एक्कारस एक्कारे जोयणसते अबाधाए जोइसे पं० १९२। ता जंबुद्दीवे णं दीवे कतरे णक्खत्ते सव्वभंतारिल्लं चारं चरति कतरे णक्खत्ते सव्वबाहिरिल्लं चारं चरति कयरे णक्खत्ते सव्ववरिल्लं चारं चरति कयरे णक्खत्ते सव्वहिट्ठिल्लं चारं चरइ ?, अभीयी णक्खत्ते सव्वभित्तारिल्लं चारं चरति, मूले णक्खत्ते सव्वाबाहिरिल्लं चारं चरति, साती णक्खत्ते सव्ववरिल्लं चारं चरति, भरणी णक्खत्ते सव्वहेट्ठिल्लं चारं चरति ॥१३॥ ता चंदविमाणे णं किंसंठिते पं० ?, ता अद्धकविट्ठगसंठाणसंठिते सव्वफालियामए अब्भुगयमूसितपहसिते विविधमणिरयणभत्तिचित्ते तथेव जाव पडिख्वे, एवं सूरविमाणे गहविमाणे णक्खत्तविमाणे ताराविमाणेवि, ता चंदविमाणे णं केवतियं आयामविकखंभेणं केवतियं परिकखेवेणं केवतियं बाहल्लेणं पं० ?, ता छप्पणं एगट्ठिभागे जोयणस्स आयामविकखंभेणं तं तिगुणं सविसेसं परिरयेणं अट्ठावीसं एगट्ठिभागे जोयणस्स बाहल्लेणं पं०, ता सूरविमाणे णं केवतियं आयामविकखंभेणं पुच्छा, ता अडयालीसं एगट्ठिभागे जोयणस्स आयामविकखंभेणं तं तिगुणं सविसेसं परिरएणं चउव्वीसं एगट्ठिभागे जोयणस्स बाहल्लेणं पं०, ता गहविमाणे णं पुच्छा, ता अद्धजोयणं आयामविकखंभेणं तं तिगुणियं सविसेसं परिरएणं कोसं बाहल्लेणं पं०, ता णक्खत्तविमाणे णं केवतियं पुच्छा, ता कोसं आयामविकखंभेणं तं तिगुणं सविसेसं परिरतेणं अद्धकोसं बाहल्लेणं पं०, ता ताराविमाणे णं केवतियं० पुच्छा, ता अद्धकोसं आयामविकखंभेणं तं तिगुणं सविसेसं परिरएणं पंचधणुसयाइं बाहल्लेणं पं०, ता चंदविमाणं कति देवसाहस्सीओ परिवहंति ?, सोलस देवसाहस्सीओ परिवहंति, तं०-पुरच्छिमेणं सीहरूवधारीणं चत्तारि देवसाहस्सीओ परिवहंति दाहिणेणं गयरूवधारीणं चत्तारि० पच्चत्थिमेणं वसभरूवधारीणं चत्तारि देव० उत्तरेणं तुरगरूवधारीणं चत्तारि देव०, एवं सूरविमाणंपि, ता गहविमाणे णं कति देवसाहस्सीओ परिवहंति ?, ता अट्ठ देवसाहस्सीओ परिवहंति, तं०-पुरच्छिमेणं सिंहरूवधारीणं दो देवसाहस्सीओ परिवहंति एवं जाव उत्तरेणं तुरगरूवधारीणं, ता नक्खत्तविमाणे णं कति देवसाहस्सीओ परिवहंति ?, ता चत्तारि देवसाहस्सीओ परिवहंति, तं०-पुरच्छिमेणं सीहरूवधारीणं एक्का देवसाहस्सी परिवहति एवं जाव उत्तरेणं तुरगरूवधारीणं देवाणं, ता ताराविमाणे णं कति० ?, ता दो देवसाहस्सीओ परिवहंति, तं०-पुरच्छिमेणं सीहरूवधारीणं पंच देवसता परिवहंति एवं जावुत्तरेणं तुरगरूवधारीणं ॥१४॥ एतेसिं णं चंदिमसूरियगहणक्खत्तताराख्वाणं कयरे २ हिंतो सिग्घगती वा मंदगती वा ?, ता चंदेहिंतो सूरु सिग्घगती सूरुहिंतो गहा सिग्घगती गहेहिंतो णक्खत्ता सिग्घगती णक्खत्तेहिंतो तारा सिग्घगती, सव्वप्पगती चंदा सव्वसिग्घगती तारा, ता एएसिं णं चंदिमसूरियगहणणक्खत्तताराख्वाणं कयरे २ हिंतो अप्पिड्डिया वा महिड्डिया वा ?, ताराहिंतो महिड्डिया णक्खत्ता णक्खत्तेहिंतो गहा महिड्डिया गहेहिंतो सूरु महिड्डिया सूरुहिंतो चंदा महिड्डिया, सव्वप्पड्डिया तारा सव्वमहिड्डिया चंदा ॥१५॥ ता जंबुद्दीवे णं दीवे ताराख्वस्स २ य एस णं केवतियं अबाधाए अंतरे पं० ?, दुविहे अंतरे पं० तं०-वाघातिमे य णिवाघातिमे य, तत्थ णं जे से वाघातिमे से जह० दोण्णि छावट्टे जोयणसते उक्को० बारस जोयणसहस्साइं दोण्णि बाताले जोयणसते ताराख्वस्स २ य अबाधाए अंतरे पं०, तत्थ जे से निव्वाघातिमे से जह० पंच धणुसताइं उक्को० अद्धजोयणं ताराख्वस्स २ य अबाधाए अंतरे पं० ॥१६॥ ता चंदस्स णं जोतिसिंदस्स जोतिसरणो कति अग्गमहिसीओ पं० ?, ता चत्तारि अग्गमहिसीओ पं० तं०-चंदप्पभा दोसिणाभा अच्चिमाली पभंकरा, तत्थ णं एगमेगाए देवीए चत्तारि देवीसाहस्सी परियारो पं०, पभू णं तातो एगमेगा देवी अण्णाइं चत्तारि २ देवीसहस्साइं परिवारं विउव्वित्तए, एवामेव सपुव्वावरेणं सोलस देवीसहस्सा, सेत्तं तुडिए, ता पभू णं चंदे जोतिसिंदे जोतिसराया चंदवडिंसए विमाणे सभाए सुधम्मए तुडिएणं सद्धिं दिव्वाइं भोगभोगाइं भुंजमाणे विहरित्तए ?, णो इणट्टे समट्टे, ता कहं ते णो पभू जोतिसिंदे जोतिसराया चंदवडिंसए विमाणे सभाए सुधम्मए तुडिएणं सद्धिं दिव्वाइं भोगभोगाइं भुंजमाणे विहरित्तए ?, ता चंदस्स णं जोतिसिंदस्स जोतिसरणो चंदवडिंसए विमाणे सभाए सुधम्मए माणवए चेतियखंभे वइरामएसु गोलवट्टसमुग्गएसु बहवे जिणसकधाओ संणिक्रिक्खत्ताओ चिट्ठंति, ताओ णं चंदस्स जोतिसिंदस्स जोइसरणो अण्णेसिं च बहूणं जोतिसियाणं

देवाण य देवीण य अच्चणिज्जाओ वंदणिज्जाओ पूयणिज्जाओ सक्कारणिज्जाओ सम्माणणिज्जाओ कल्लाणं मंगलं देवयं चेतियं पज्जुवासणिज्जाओ एवं खलु णो पभू चंदे जोतिसिंदे जोतिसराया चंदवडिंसए विमाणे सभाए सुहम्माए तुडिएणं सद्धिं दिव्वाइं भोगभोगाइं भुंजमाणे विहरित्तए, पभू णं चंदे जोतिसिंदे जोतिसराया चंदवडिंसए विमाणे सभाए सुधम्माए चंदंसि सीहासणंसि चऊहिं सामाणियसाहस्सीहिं चउहिं अग्गमहिंसीहिं सपरिवाराहिं तीहिं परिसाहिं सत्तहिं अणिएहिं सत्तहिं अणियाहिवईहिं सोलसहिं आयरक्खदेवसाहस्सीहिं अण्णेहिं य बहूहिं जोतिसिएहिं देवेहिं देवीहिं य सद्धिं संपरिवुडे महताहतणट्टगीयवाइयतंतीतलतालतुडियघणमुइंगपडुप्पवाइतरवेणं दिव्वाइं भोगभोगाइं भुंजमाणे विहरित्तए, केवलं परियारणिइढीए, णो चेव णं मेहुणवत्तियं, ता सूरस्स णं जोइसिंदस्स जोतिसरणो कति अग्गमहिंसीओ पं० ?, ता चत्तारि अग्गमहिंसीओ पं० तं०-सूरप्पभा आतपा अच्चिमाली पभंकरा, सेसं जहा चंदस्स णवरं सूरवडेंसए विमाणे जाव णो चेव णं मेहुणवत्तिए । १७। जोतिसियाणं देवाणं केवइयं कालं ठिती पं० ?, जह० अडभागपलितोवमं उक्को० पलितोवमं वाससयसहस्समब्भहियं, ता जोतिसिणीणं देवीणं केवतियं कालं ठिती पं० ?, जह० अडभागपलितोवमं उक्को० अद्धपलिओवमं पन्नासाए वाससहस्सेहिं अब्भहियं, चंदविमाणे णं देवाणं केवतियं कालं ठिती पं० ?, जह० चउब्भागपलितोवमं उक्को० पलितोवमं वाससयसहस्समब्भहियं, ता चंदविमाणे णं देवीणं केवतियं कालं ठिती पं० ?, जह० चउब्भागपलितोवमं उक्को० अद्धपलितोवमं पण्णासाए वाससहस्सेहिं अब्भहियं, सूरविमाणे णं देवाणं केवतियं कालं ठिती पं० ?, जह० चउब्भागपलितोवमं उक्को० पलिओवमं वाससहस्समब्भहियं, ता सूरविमाणे णं देवीणं केवतियं कालं ठिती पं० ?, जह० चउब्भागपलितोवमं उक्को० अद्धपलितोवमं पंचहिं वाससएहिं अब्भहियं, ता गहविमाणे णं देवाणं केवतियं कालं ठिती पं० ?, जह० चउब्भागपलितोवमं उक्को० पलितोवमं, ता गहविमाणे णं देवीणं केवतियं कालं ठिती पं० ?, जह० चउब्भागपलितोवमं उक्को० अद्धपलितोवमं, ता णक्खत्तविमाणे णं देवाणं केवतियं कालं ठिती पं० ?, जह० चउब्भागपलितोवमं उक्को० अद्धपलिओवमं, ता णक्खत्तविमाणे णं देवीणं केवइयं कालं ठिती पं० ?, जह० अडभागपलितोवमं उक्को० चउब्भागपलितोवमं, ता ताराविमाणे णं देवाणं पुच्छा, जह० अडभागपलितोवमं उक्को० चउब्भागपलितोवमं, ता ताराविमाणे णं देवीणं पुच्छा, ता जह० अडभागपलितोवमं उक्को० साइरेगअडभागपलिओवमं । १८। ता एएसिं णं चंदिमसूरियगहणक्खत्तताराख्वाणं कतरे० ?, ता चंदा य सूरा य एते णं दोवि तुल्ला सव्वत्थोवा णक्खत्ता संखिज्जगुणा गहा संखिज्जगुणा तारा संखिज्जगुणा ☆☆☆ । १९॥ अट्टारसमं पाहुडं १८॥ ☆☆☆ ता कति णं चंदिमसूरिया सव्वलोयं ओभासंति उज्जोएंति तवेति पभासेंति आहि० ?, तत्थ खलु इमाओ दुवालस पडिवत्तीओ पं०, तत्थेगे एव०-ता एगे चंदे एगे सूरे सव्वलोयं ओभासति० एगे एव०, एगे पुण०-ता तिण्णि चंदा तिण्णि सूरा सव्वलोयं ओभासेंति० एगे एव०, एगे पुण०-ता आहुट्ठिं चंदा आहुट्ठिं सूरा सव्वलोयं ओभासेंति० एगे एव०, एगे पुण०-एतेणं अभिलावेणं णेतव्वं सत्त चंदा सत्त सूरा दस चंदा दस सूरा बारस चंदा बारस सूरा बातालीसं चंदा० बावत्तरिं चंदा० बातालीसं चंदसतं० बावत्तरं चंदसयं बावत्तरं सूरसयं बायालीसं चंदसहस्सं बातालीसं सूरसहस्सं बावत्तरं चंदसहस्सं बावत्तरं सूरसहस्सं सव्वलोयं ओभासंति० एगे एव०, वयं पुण एवं वदामो-ता अयण्णं जंबुद्दीवे जाव परिक्खेवेणं, ता जंबुद्दीवं केवतिया चंदा पभासिंसु वा पभासिंति वा पभासिस्संति वा ?, केवतिया सूरा तविंसु वा० केवतिया णक्खत्ता जोअं जोइंसु० ?, केवतिया गहा चारं चरिंसु वा० ? केवतिया तारागणकोडिकोडिओ सोभं सोभेंसुवा० ?, ता जंबुद्दीवे दो चंदा पभासेंसु वा० दो सूरिया तवइंसु वा० छप्पणं णक्खत्ता जोयं जोएंसु वा० छावत्तरं गहसतं चारं चरिंसु वा० एणं सयसहस्सं तेत्तीसं च सहस्सा णव सया पण्णासा तारागणकोडिकोडिणं सोभं सोभेंसु वा० 'दो चंदा दो सूरा णक्खत्ता खलु हवंति छप्पण्णा । छावत्तरं गहसतं जंबुद्दीवे विचारीणं ॥३२॥ एणं च सयसहस्सं तितीसं खलु भवे सहस्साइं । णव य सता पण्णासा तारागणकोडिकोडिणं ॥३३॥ ता जंबुद्दीवं णं दीवं लवणे नामं समुद्दे वट्ठे वलयाकारसंठाणसंठिते सव्वतो समंता संपरिक्खित्ताणं चिट्ठति, ता लवणे णं समुद्दे किं समचक्कवालसंठिते

विसमचक्रवालसंठिते ?, ता लवणे समचक्रवालसंठिते नो विसमचक्रवालसंठिते, ता लवणसमुद्दे केवइयं चक्रवालविक्रंभेणं केवतियं परिक्रखेवेणं आहि० ?, ता दो जोयणसतसहस्साइं चक्रवालविक्रंभेणं पण्णरस जोयणसतसहस्साइं एक्कासीयं च सहस्साइं सतं चऊतालं किंचिविसेसूणं परिक्रखेवेणं आहि०, ता लवणसमुद्देकेवतिया चंदा पभासेंसु वा० ?, एवं पुच्छा जाव केवतियाउ तारागणकोडिकोडीओ सोभेंसु वा० ?, ता लवणे णं समुद्दे चत्तारि चंदा पभासेंसु वा० चत्तारि सूरिया तवइंसु वा० बारस णक्खत्तसतं जोयं जोएंसु वा० तिणि बावण्णा महग्गहसता चारं चरिंसु वा० दो सतसहस्सा सत्तट्ठिं च सहस्सा णव य सता तारागणकोडिकोडीणं सोभिंसु वा०, 'पण्णरस सतसहस्सा एक्कासीतं सतं चऊतालं । किंचिविसेसेणूणो लवणोदधिणो परिक्रखेवो ॥३४॥ चत्तारि चेव चंदा चत्तारि य सूरिया लवणतोये । बारस णक्खत्तसयं गहाण तिण्णेव बावण्णा ॥३५॥ दोच्चेव सतसहस्सा सत्तट्ठिं खलु भवे सहस्साइं । णव य सता लवणजले तारागणकोडिकोडीणं ॥३६॥ ता लवणसमुद्दं धातईसंडे णामं दीवे वट्टे वलयाकारसंठिते तहेव जाव णो विसमचक्रवालसंठिते, धातईसंडे णं दीवे केवतियं चक्रवालविक्रंभेणं केवतियं परिक्रखेवेणं आहि० ?, ता चत्तारि जोयणसतसहस्साइं चक्रवालविक्रंभेणं ईतालीसं जोयणसतसहस्साइं दस य सहस्साइं णव य एकट्टे जोयणसते किंचिविसेसूणे परिक्रखेवेणं आहि०, धातईसंडे दीवे केवतिया चंदा पभासेंसु वा० पुच्छा, ता धातईसंडे णं दीवे बारस चंदा पभासेंसु वा० बारस सूरिया तवेंसु वा० तिणि छत्तीसा णक्खत्तसता जोअं जोएंसु वा० एगं छप्पणं महग्गहसहस्सं चारं चरिंसु वा०- 'अट्टेव सतसहस्सा तिणि सहस्साइं सत्त य सयाइं । एगससीपरिवारो तारागणकोडिकोडीओ ॥३७॥ सोभं सोभेंसु वा०, 'धातईसंडपरिओ ईताल दसुत्तरा सतसहस्सा । णव य सता एगट्ठा किंचिविसेसेण परिहीणा ॥३८॥ चउवीसं ससिरविणो (२०२) णक्खत्तसता य तिणि छत्तीसा । एगं च गहसहस्सं छप्पणं धातईसंडे ॥३९॥ अट्टेव सतसहस्सा तिणि सहस्साइं सत्त य सताइं । धायइसंडे दीवे तारागणकोडिकोडीणं ॥४०॥ ता धायईसंडं णं दीवं कालोए णामं समुद्दे वट्टे वलयागारसंठाणसंठिते जाव णो विसमचक्रवालसंठाणसंठिते, ता कालोए णं समुद्दे केवतियं चक्रवालविक्रंभेणं केवतियं परिक्रखेवेणं आहि० ?, ता कालोए णं समुद्दे अट्ट जोयणसतसहस्साइं चक्रवालविक्रंभेणं पं० एक्काणउतिं जोयणसयसहस्साइं सत्तरिं च सहस्साइं छच्च पंचुत्तरे जोयणसते किंचिविसेसाधिए परिक्रखेवेणं आहि०, ता कालोये णं समुद्दे केवतिया चंदा पभासेंसु वा० पुच्छा, ता कालोए समुद्दे बातालीसं चंदा पभासेंसु वा० बायालीसं सूरिया तवेंसु वा० एक्कारस छावत्तरा णक्खत्तसता जोयं जोइंसु वा० तिन्नि सहस्सा छच्च छन्नउया महग्गहसया चारं चरिंसु वा० अट्ठावीसं च सयसहस्साइं बारस सहस्साइं नव य सयाइं पण्णासा तारागणकोडिकोडिओ सोभं सोभेंसु वा०, 'एक्काणउई सतराईं सतसहस्साइं परिरतो तस्स । अहियासं छच्च पंचुत्तराईं कालोदधिवरस्स ॥४१॥ बातालीसं चंदा बातालीसं च दिणकरा दित्ता । कालोदधिंमि एते चरंति संबद्धलेसागा ॥४२॥ णक्खत्तसहस्सं एगमेव छावत्तरं च सतमण्णं । छच्च सया छण्णउया महग्गहा तिणि य सहस्सा ॥४३॥ अट्ठावीसं कालोदहिंमि बारस य सयसहस्साइं । णव य सया पण्णासा तारागणकोडिकोडीणं ॥४४॥ ता कालोयं णं समुद्दं पुक्खरवरे णामं दीवे वट्टे वलयाकारसंठाणसंठिते सब्वतो समंता संपरिक्रिखवित्ताणं चिट्ठति, ता पुक्खरवरे णं दीवे किं समचक्रवालसंठिए विसमचक्रवालसंठिए ?, ता समचक्रवालसंठिए नो विसमचक्रवालसंठिए, ता पुक्खरवरे णं दीवे केवइयं चक्रवालविक्रंभेणं केवइअं परिक्रखेवेणं ?, ता सोलस जोयणसयसहस्साइं चक्रवालविक्रंभेणं एगा जोयणकोडी बाणउतिं च सतसहस्साइं अउणावइं च सहस्साइं अट्टचउणउते जोअणसते परिक्रखेवेणं आहि०, ता पुक्खरवरे णं दीवे केवतिया चंदा पभासेंसु वा पुच्छा तथेव, ता चोतालं चंदसदं पभासेंसु वा० चोत्तालं सूरियाणं सतं तवइंसु वा० चत्तारि सहस्साइं बत्तीसं च नक्खत्ता जोअं जोएंसु वा० बारस सहस्साइं छच्च बावत्तरा महग्गहसता चारं चरिंसु वा, छण्णउतिसयसहस्साइं चोयालीसं सहस्साइं चत्तारि य सयाइं तारागणकोडिकोडीणं सोभं सोभेंसु वा० 'कोडी बाणउती खलु अउणाणउतिं भवे सहस्साइं । अट्टसता चउणउता य परिरओ पोक्खरवरस्स ॥४५॥ चोत्तालं चंदसतं चोत्तालं चेव सूरियाणं सतं । पोक्खरवरम्मि दीवे चरंति एते पभासंता ॥४६॥ चत्तारि सहस्साइं बत्तीसं चेव हुंति णक्खत्ता । छच्च सता बावत्तर महग्गहा बारहसहस्सा ॥४७॥ छण्णउति सयसहस्सा चोत्तालीसं खलु भवे सहस्साइं । चत्तारि तह सयाइं तारागणकोडिकोडीणं ॥४८॥ ता पुक्खरवरस्स णं

दीवस्स बहुमज्झदेसभाए माणुसुत्तरे णामं पव्वए पं० वट्टे वलयाकारसंठाणसंठिते जे णं पुक्खवरं दीवं दुधा विभयमाणे २ चिद्धति, तं०-अब्भितरपुक्खवरं च बाहिरपुक्खवरं च, ता अब्भितरपुक्खवरं णं किं समचक्कवालसंठिए विसमचक्कवालसंठिए ?, ता समचक्कवालसंठिए णो विसमचक्कवालसंठिते, ता अब्भितरपुक्खवरं णं केवतियं चक्कवालविक्रंभेणं केवतियं परिक्रवेवेणं आहि० ?, ता अट्ट जोयणसयसहस्साइं चक्कवालविक्रंभेणं एक्का जोयणकोडी बायालीसं च सयसहस्साइं तीसं च सहस्साइं दो अउणापण्णे जोयणसते परिक्रवेवेणं आहि०, ता अब्भितरपुक्खवरं णं केवतिया चंदा पभासेंसु वा० पुच्छा, बावत्तरिं चंदा पभासेंसु वा० बावत्तरिं सूरिया तवइंसु वा० दोण्णि सोला णक्खत्तसहस्सा जोअं जोएसु वा० छ महग्गहसहस्सा तिन्नि सया छत्तीसा चारं चरेंसु वा० अडतालीससतसहस्सा बावीसं च सहस्सा दोण्णि य सता तारागणकोडिकोडीणं सोभं सोभिंसु वा०, ता समयक्खेत्ते णं केवतियं आयामविक्रंभेणं केवइयं परिक्रवेवेणं आहि० ?, ता पणतालीसं जोयणसतसहस्साइं आयामविक्रंभेणं एक्का जोयणकोडी बायालीसं च सतसहस्साइं तीसं सहस्साइं दोण्णि य अउणापण्णे जोयणसते परिक्रवेवेणं आहि०, ता समयक्खेत्ते णं केवतिया चंदा पभासेंसु वा० पुच्छा तधेव, ता बत्तीसं चंदसतं पभासेंसु वा० बत्तीसं सूरियाण सतं तवइंसु वा० तिण्णि सहस्सा छच्च छण्णउता णक्खत्तसता जोयं जोएसु वा० एक्कारस सहस्सा छच्च सोलस महग्गहसता चारं चरेंसु वा० अट्टासीतिं सतसहस्साइं चत्तालीसं च सहस्सा सत्त य सया तारागणकोडीकोडीणं सोभं सोभिंसु वा० 'अट्टेव सतसहस्सा अब्भितरपुक्खवरस्स विक्रंभो । पणतालसयसहस्सा माणुसखेत्तस्स विक्रंभो ॥४९॥ कोडी बातालीसा तीसं सहसा दो सया अउणपण्णा । माणुसखेत्तपरिरओ एसेव य पुक्खवरस्स ॥५०॥ बावत्तरिं च चंदा बावत्तरिमेव दिणकरा दित्ता । पुक्खवरदीवइडे चरंति एते पभासेंता ॥५१॥ तिण्णि सता छत्तीसा छच्च सहस्सा महग्गहाणं तु । णक्खत्ताणं तु भवे सोलाइं दुवे सहस्साइं ॥५२॥ अडयालसयसहस्सा बावीसं खलु भवे सहस्साइं । दो त सया पुक्खवरं तारागणकोडिकोडीणं ॥५३॥ बत्तीसं चंदसतं बत्तीसं चेव सूरियाण सतं । सयलं माणुसलोअं चरंति एते पभासेंता ॥५४॥ एक्कारस य सहस्सा छप्पिय सोला महग्गहाणं तु । छच्च सता छण्णउता णक्खत्ता तिण्णि य सहस्सा ॥५५॥ अट्टासीइं चत्ताइं सतसहस्साइं मणुयलोअंमि । सत्त य सता अणूणा तारागणकोडिकोडीणं ॥५६॥ एसो तारापिंडो सव्वसमासेण मणुयलोअंमि । बहिता पुण ताराओ जिणेहिं भणिया असंखेज्जा ॥५७॥ एवतियं तारगं जं भणियं माणुसंमि लोअंमि । चारं कलंबुयापुप्फसंठितं जोतिसं चरति ॥५८॥ रविससिगहणक्खत्ता एवतिया आहिता मणुयलोए । जेसिं णामा गोत्तं न पागता पणवेहिंति ॥५९॥ छावट्ठिं पिडगाइं चंदादिच्चाण मणुयलोअंमि । दो चंदा दो सूरा य हूति एक्केक्कए पिडए ॥६०॥ छावट्ठिं पिडगाइं णक्खत्ताणं तु मणुयलोअंमि । छप्पणं णक्खत्ता हूति० ॥६१॥ छावट्ठिं पिडगाइं महागहाणं तु मणुयलोअंमि । छावत्तरं गहसतं होइ० ॥६२॥ चत्तारि य पंतीओ चंदाइच्चाण मणुयलोअंमि । छावट्ठिं २ च होइ एक्किक्किया पन्ती ॥६३॥ छप्पन्नं पंतीओ णक्खत्ताणं तु मणुयलोअंमि । छावट्ठिं० ॥६४॥ छावत्तरं गहाणं पंतिसयं हवति मणुयलोअंमि । छावट्ठिं० ॥६५॥ ते मेरूमणुचरंता पदाहिणावत्तमंडला सव्वे । अणवट्ठियजोगेहिं चंदा सूरा गहगणा य ॥६६॥ णक्खत्ततारागणं अवट्ठित्ता मंडला मुणेयव्वा । तेऽविय पदाहिणावत्तमेव मेरुं अणुचरंति ॥६७॥ रयणिकरदिणकराणं उद्धं च अहे व संकमो नत्थि । मंडलसंकमणं पुण सव्वभंतरबाहिरं तिरिए ॥६८॥ रयणिकरदिणकराणं णक्खत्ताणं महग्गहाणं च । चारविसेसेण भवे सुहदुक्खविधी मणुस्साणं ॥६९॥ तेसिं पविसंताणं तावक्खेत्तं तु वइढते णियंयं । तेणेव कमेण पुणो परिहायति निक्खमंताणं ॥७०॥ तेसिं कलंबुयापुप्फसंठिता हूति तावक्खेत्तपहा । अंतो य संकुडा बाहि वित्थडा चंदसूराणं ॥७१॥ केणं वइढति चंदो ? परिहाणी केण हूति चंदस्स ? । कालो वा जुण्हा वा केणऽणुभावेण चंदस्स ॥७२॥ किण्हं राहुविमाणं णिच्चं चंदेण होइ अविरहितं । चतुरंगुलमप्पत्तं हिट्ठा चंदस्स तं चरति ॥७३॥ बावट्ठिं २ दिवसे २ तु सुक्कपक्खस्स । जं परिवइढति चंदो खवेइ तं चेव कालेणं ॥७४॥ पण्णरसइभागेण य चंदं पण्णरसमेव तं वरति । पण्णरसतिभागेण य पुणोवि तं चेव वक्कमति ॥७५॥ एवं वइढति चंदो परिहाणी एव होइ चंदस्स । कालो वा जुण्हा वा एवऽणुभावेण चंदस्स ॥७६॥ अंतो मणुस्सखेत्ते हवंति चारोवगा तु उववण्णा । पंचविहा जोतिसिया चंदा सूरा गहगणा य ॥७७॥ तेण परं जे सेसा चंदादिच्चगहतारणक्खत्ता । णत्थि गती णवि चारो अवट्ठिता ते मुणेयव्वा ॥७८॥ एवं जंबुदीवे दुगुणा लवणे चउग्गुणा

हुंति । लावणगा य तिगुणिता ससिसूरा धायईसंडे ॥७९॥ दो चंदा इह दीवे चत्तारि य सायरे लवणतोए । धायइसंडे दीवे बारस चंदा य सूरा य ॥८०॥ धातइसंडप्पभितिसु उद्धिद्धा तिगुणिता भवे चंदा । आदिल्लचंदसहिता अणंतराणंतरे खेत्ते ॥८१॥ रिक्खग्गहतारग्गं दीवसमुद्दे जहिच्छसी णाउं । तस्स ससीहिं गुणितं रिक्खग्गहतारग्गं तु ॥८२॥ बहिता तु माणुसनगस्स चंदसूराणव्वट्ठिता जोण्हा । चंदा अभीयीजुत्ता सूरा पुण हुंति पुस्सेहिं ॥८३॥ चंदातो सूरस्स य सूरा चंदस्स अंतरं होइ । पण्णाससहस्साइं तु जोयणाणं अणूणाइं ॥८४॥ सूरस्स य सूरस्स य ससिणो य अंतरं होइ । बाहिं तु माणुसनगस्स जोयणाणं सतसहस्सं ॥८५॥ सूरंतरिया चंदा चंदंतरिया य दिणयरा दित्ता । चित्तंतरलेसागा सुहलेसा मंदलेसा य ॥८६॥ अट्ठासीतिं च गहा अट्ठावीसं च हुंति नक्खत्ता । एगससीपरिवारो एत्तो ताराण वोच्छामि ॥८७॥ छावट्ठि सहस्साइं णव चेव सताइं पंचसतराइं । एगससीपरिवारो तारागणकोडिकोडीणं ॥८८॥ अंतो मणुस्सखेत्ते जे चंदिमसूरियगहगणणक्त्तताराखा ते णं देवा किं उड्ढोववन्नगा कप्पोव० विमाणोव० चारोव० चारट्ठितीया गतिरतिया गतिसमावण्णगा ?, ता ते णं देवा णो उड्ढो० नो कप्पो० विमाणो० चारो० नो चारट्ठितीया गइरइया गतिसमावण्णगा उड्ढामुहकलंबुआपुप्फसंठाणसंठितेहिं जोअणसाहस्सिएहिं तावक्खेत्तेहिं साहस्सिएहिं बाहिराहि य वेउव्वियाहिं परिसाहिं महताहतनट्ठगीयवाइयतंतीतलतालतुडियघणमुइंगपडुप्पवाइयरवेणं महता उक्कट्ठिसीहणादबोलकलकलरवेणं अच्छं पव्वतरायं पदाहिणावत्तमंडलचारं मेरुं अणुपरियट्ठंति, ता तेसिं णं देवाणं जाथे इंदे चयति से कथमिदाणिं पकरेंति ?, ता चत्तारिपंच सामाणिया देवा तं ठाणं उवसंपज्जित्ताणं विहरंति जाव अण्णे इंदे उववण्णे भवति, ता इंदठाणे णं केवइएणं कालेणं विरहियं उववाएणं पं० ?, ता जह० इक्कं समयं उक्को० छम्मासे, ता बहिता णं माणुस्सखेत्तस्स जे चंदिमसूरियगहजावताराखा ते णं देवा किं उड्ढोववण्णगा कप्पो० विमाणो० चारोव० चारट्ठितीया गतिरतीया गतिसमावण्णगा ?, ता ते णं देवा णो उड्ढोव० नो कप्पो० विमाणो० णो चारोव० चारट्ठितीया नो गइरइया णो गतिसमावण्णगा पक्किट्ठगसंठाणसंठितेहिं जोयणसयसाहस्सिएहिं तावक्खेत्तेहिं सयसाहस्सियाहिं बाहिराहिं वेउव्वियाहिं परिसाहिं महताहतनट्ठगीयवाइयजावरवेणं दिव्वाइं भोगभोगाइं भुंजमाणा विहरंति, सुहलेसा मंदलेसा मंदायवलेसा चित्तंतरलेसा अण्णोऽण्णसमोगाढाहिं लेसाहिं कूडा इव ठाणठिता ते पदेसे सव्वतो समंता ओभासंति उज्जोवेंति तवेंति पभासेंति, ता तेसिं णं देवाणं जाहे इंदे चयति से कहमिदाणिं पकरंति ?, ता जाव चत्तारिपंच सामाणिया देवा तं णं ठाणं तहेव जाव छम्मासे । १००। ता पुक्खरवरं णं दीवं पुक्खरोदे णामं समुद्दे वट्ठे वलयाकारसंठाणसंठिते सव्व जाव चिट्ठति, ता पुक्खरोदे णं समुद्दे किं समचक्कवालसंठिते जाव णो विसमचक्कवालसंठिते, ता पुक्खरोदे णं समुद्दे केवतियं चक्कवालविक्खंभेणं केवइयं परिक्खेवेणं आहि०, ता संखेज्जाइं जोयणसहस्साइं आयामविक्खंभेणं संखेज्जाइं जोयणसहस्साइं परिक्खेवेणं आहि०, ता पुक्खरवरोदे णं समुद्दे केवतिया चंदा पभासेंसु वा० पुच्छा तहेव, ता पुक्खरोदे णं समुद्दे संखेज्जा चंदा पभासेंसु वा० जाव संखेज्जाओ तारागणकोडाकोडीओ सोभं सोभेंसु वा०, एतेणं अभिलावेणं वरूणवरे दीवे वरूणोदे समुद्दे खीरवरे दीवे खीरवरे समुद्दे घतवरे दीवे घतोदे समुद्दे खोतवरे दीवे खोतोदे समुद्दे णंदिस्सरवरे दीवे णंदिस्सवरे समुद्दे अरूणे दीवे अरूणोदे समुद्दे अरूणवरे दीवे अरूणवरोदे समुद्दे अरूणवरोभासे दीवे अरूणवरोभासे समुद्दे कुंडले दीवे कुंडलोदे समुद्दे कुंडलवरे दीवे कुंडलवरोदे समुद्दे कुंडलवरोभासे दीवे कुंडलवरोभासे समुद्दे १४ सव्वेसिं विक्खंभपरिक्खेवो जोतिसाइं पुक्खरोदसागरसरिसाइं । ता कुंडलवरोभासणं समुद्दं रूयए दीवे वट्ठे वलयाकारसंठाणसंठिए सव्वतो जाव चिट्ठति, ता रूयए णं दीवे किं समचक्कवाल जाव णो विसमचक्कवालसंठिते, ता रूयए णं दीवे केवइयं समचक्कवालविक्खंभेणं केवतियं परिक्खेवेणं आहि० ?, ता असंखेज्जाइं जोयणसहस्साइं चक्कवालविक्खंभेणं असंखेज्जाइं जोयणसहस्साइं परिक्खेवेणं आहि०, ता रूयगे णं दीवे केवतिया चंदा पभासेंसु वा पुच्छा, ता रूयगे णं दीवे असंखेज्जा चंदा पभासेंसु वा० जाव असंखेज्जाओ तारागणकोडिकोडीओ सोभं सोभेंसु वा०, एवं रूयगे समुद्दे रूयगवरे दीवे रूयगवरोदे समुद्दे रूयगवरोभासे दीवे रूयगवरोभासे समुद्दे, एवं तिपडोयारा णेतव्वा जाव सूरे दीवे सूरोदे समुद्दे सूरवरे दीवे सूरवरे समुद्दे सूरवरोभासे दीवे सूरवरोभासे समुद्दे, सव्वेसिं विक्खंभपरिक्खेवजोतिसाइं रूयगवरोदीवसरिसाइं, ता सूरवरोभासोदण्णं समुद्दं देवे णामं दीवे वट्ठे वलयाकारसंठाणसंठिते सव्वतो समंता संपरिक्खित्ताणं

चिद्वृत्ति जाव णो विसमचक्रवालसंठिते, ता देवे णं दीवे केवतियं चक्रवालविक्रंभेणं केवतियं परिक्रखेवेणं आहि० ?, ता असंखेज्जाइं जोयणसहस्साइं चक्रवालविक्रंभेणं असंखेज्जाइं जोयणसहस्साइं परिक्रखेवेणं आहि०, ता देवे णं दीवे केवतिया चंदा पभासेंसु वा पुच्छा, तथेव, ता देवे णं दीवे असंखेज्जा चंदा पभासेंसु वा जाव असंखेज्जाओ तारागणकोडिकोडीओ सोभेसु वा०, एवं देवोदे समुद्दे णागे दीवे णागोदे समुद्दे जक्खे दीवे जक्खोदे समुद्दे भूते दीवे भूतोदे समुद्दे सयंभूरमणे दीवे सयंभूरमणे समुद्दे, सब्बे देवदीवसरिसा ☆☆☆।१०१॥ एकूणवीसतिमं पाहुडं १९ ॥☆☆☆ ता कहं ते अणुभावे आहि० ?, तत्थ खलु इमाओ दो पडिवत्तीओ पं०, तत्थेगे एव०-ता चंदिमसूरिया णं णो जीवा अजीवा णो घणा झुसिरा णो बादरबुंधिधरा कलेवरा, नत्थि णं तेसिं उट्ठाणेति वा कम्मेति वा बलेति वा वीरिएति वा पुरिसकारपरक्कमेति वा, ते णो विज्जू लवंति णो असणिं लवंति णो थणितं लवंति, अहे य णं बादरे वाउकाए संमुच्छति ता विज्जुपि लवंति असणिंपि लवंति थणितंपि लवंति एगे एव०, एगे पुण एव०-ता चंदिमसूरिया णं जीवा णो अजीवा घणा णो झुसिरा बादरबुंधिधरा नो कलेवरा अत्थि णं तेसिं उट्ठाणेति वा० ते विज्जुपि लवंति० एगे एव०, वयं पुण एवं वदामो-ता चंदिमसूरिया णं देवा महिद्धिया जाव महाणुभागा (प्र० वा) वरवत्थधरा वरमल्लधरा वराभरणधारी अवोच्छित्तिणयट्ठताए अन्ने चयंति अण्णे उववज्जंति ।१०२। ता कहं ते राहुकम्मे आहि० ?, तत्थ खलु इमाओ दो पडिवत्तीओ पं०, तत्थेगे एव०-अत्थि णं से राहू देवे जे णं चंदं वा सूरं वा गिण्हति एगे एव०, एगे पुण०-नत्थि णं से राहू देवे जे णं चंदं वा सूरं वा गिण्हइ, तत्थ जे ते एव०-ता अत्थि णं से राहू देवे जे णं चंदं वा सूरं वा गिण्हति से एव०-ता राहू णं देवे चंदं वा सूरं वा गेण्हमाणे बुद्धंतेणं गिण्हित्ता बुद्धंतेणं मुयति बुद्धंतेणं गिण्हित्ता मुद्धंतेणं मुयइ मुद्धंतेणं गिण्हित्ता मुद्धंतेणं मुयति वामभुयन्तेणं गिण्हित्ता वामभुयंतेणं मुयति वामभुयंतेणं गिण्हित्ता दाहिणभुयंतेणं मुयति दाहिणभुयंतेणं गिण्हित्ता वामभुयंतेणं मुयति दाहिणभुयंतेणं गिण्हित्ता दाहिणभुयंतेणं मुयति, तत्थ जे ते एव०-ता नत्थि णं से राहू देवे जे णं चंदं वा सूरं वा गेण्हति ते एव०-तत्थ णं इमे पण्णरस कसिणा पोग्गला पं० तं०-सिंधाणए जडिलए खरए खत्तए अंजणे खंजणे सीतले हिमसीयले केलासे अरूणाभे परिज्जए णभसूरए कविलिए पिंगलए राहू, ता जया णं एते पण्णरस कसिणा २ पोग्गला सदा चंदस्स वा सूरस्स वा लेसाणुबद्धचारिणो भवंति तता णं माणुसलोयंमि माणुसा एवं वदंति-एवं खलु राहू चंदं वा सूरं वा गेण्हति एवं खलु०, ता जता णं एते पण्णरस कसिणा २ पोग्गला सदा चंदस्स वा सूरस्स वा णो लेसाणुबद्धचारिणो भवंति णो खलु तदा माणुसलोयंमि मणुस्सा एवं वदंति-एवं खलु राहू चंदं वा सूरं गेण्हति एगे एव०, वयं पुणा एवं वदामो-ता राहू णं देवे महिड्डीए महाणुभावे वरवत्थधरे वरमल्लधरे वराभरणधारी, राहुस्स णं देवस्स णव णामधेज्जा पं० तं०-सिंधाडए जडिलए खरए खत्तए ढड्ड (ददु) रे मगरे मच्छे कच्छभे कण्हसप्पे, ता राहुस्स णं देवस्स विमाणा पंचवण्णा पं० तं०-किण्हा नीला लोहिता हालिद्दा सुक्किल्ला, अत्थि कालए राहुविमाणे खंजणवण्णाभे पं० अत्थि नीलए राहुविमाणे लाउयवण्णाभे पं० अत्थि लोहिए राहुविमाणे मंजिद्दावण्णाभे पं० अत्थि हालिद्दए राहुविमाणे हलिद्दावण्णाभे पं० अत्थि सुक्किल्लए राहुविमाणे भासरसिवण्णाभे पं०, ता जया णं राहुदेवे आगच्छमाणे वा गच्छमाणे वा विउव्वेमाणे वा परियारेमाणे वा चंदस्स वा सूरस्स वा लेस्सं पुरच्छिमेणं आवरित्ता पच्चत्थिमेणं वीतिवतति तया णं पुरच्छिमेणं चंदे वा सूरं वा उवदंसेति पच्चत्थिमेणं राहू, जदा णं राहुदेवे आगच्छमाणे वा० चंदस्स वा सूरस्स वा लेसं दाहिणेणं आवरित्ता उत्तरेणं वीतिवतति तदा णं दाहिणेणं चंदे वा सूरं वा उवदंसेति उत्तरेणं राहू, एतेणं अभिलावेणं पच्चत्थिमेणं आवरित्ता पुरच्छिमेणं वीतिवतति उत्तरेणं आवरित्ता दाहिणेणं वीतिवतति, जया णं राहू देवे आगच्छमाणे वा० चंदस्स वा सूरस्स वा लेसं दाहिणपुरच्छिमेणं आवरित्ता उत्तरपच्चत्थिमेणं वीईवयइ तया णं दाहिणपुरच्छिमेणं चंदे वा सूरं वा उवदंसेइ उत्तरपच्चत्थिमेणं राहू, जया णं राहू देवे आगच्छमाणे वा० चंदस्स वा सूरस्स वा लेसं दाहिणपच्चत्थिमेणं आवरित्ता उत्तरपुरच्छिमेणं वीतिवतति तदा णं दाहिणपच्चत्थिमेणं चंदे वा सूरं वा उवदंसेति उत्तरपुरच्छिमेणं राहू, एतेणं अभिलावेणं उत्तरपच्चत्थिमेणं आवरेत्ता दाहिणपुरच्छिमेणं वीतिवतति उत्तरपुरच्छिमेणं आवरेत्ता दाहिणपच्चत्थिमेणं वीतिवयइ, ता जता णं राहू देवे आगच्छमाणे

वा० चंदस्स वा सूरस्स वा लेसं आवरेत्ता वीतीव० तदा णं मणुस्सलोए मणुस्सा वदंति-राहुणा चंदे वा सूरे वा गहिते, ता जया णं राहू देवे आगच्छमाणे वा० चंदस्स वा सूरस्स वा लेसं आवरेत्ता पासेणं वीतीवतति तता णं मणुस्सलोअंमि मणुस्स वदंति चंदेण वा सूरेण वा राहुस्स कुच्छी भिण्णा, ता जता णं राहू देवे आगच्छमाणे वा० चंदस्स वा सूरस्स वा लेसं आवरेत्ता पच्चोसककति तता णं मणुस्सलोए मणुस्सा एवं वदंति-राहुणा चंदे वा सूरे वा वंते राहुणा०, ता जता णं राहू देवे आगच्छमाणे वा० चंदस्स वा सूरस्स वा लेसं आवरेत्ता मज्झंमज्झेणं वीतिवतति तता णं मणुस्सलोयंसि मणुस्सा वदंति-राहुणा चंदे वा सूरे वा विइयरिए राहुणा० २, ता जता णं राहू देवे आगच्छमाणे० चंदस्स वा सूरस्स वा लेसं आवरेत्ताणं अधे सपकिखं सपडिदिसिं चिद्धति तता णं मणुस्सलोअंसि मणुस्सा वदंति-राहुणा चंदे वा सूरे वा घत्थे राहुणा० २ । कतिविधे णं राहू पं० ?, दुविहे पं० तं०-ता धुवराहू य पव्वराहू य, तत्थ णं जे से धुवराहू से णं बहूलपक्खस्स पाडिवए पण्णरसइभागेणं पण्णरसइभागं चंदस्स लेसं आवरेमाणे २ चिद्धति, तं०-पढमाए पढमं भागं जाव पन्नरसमं भागं, चरमे समए चंदे रत्ते भवति अवसेसे समए चंदे रत्ते य विरत्ते य भवइ, तमेव सुक्कपक्खे उवदंसेमाणे २ चिद्धति, तं० पढमाए पढमं भागं जाव चंदे विरत्ते य भवइ, अवसेसे समए चंदे रत्ते य विरत्ते य भवति, तत्थ णं जे ते पव्वराहू से जहण्णेणं छण्हं मासाणं, उक्कोसेणं बायालीसाए मासाणं चंदस्स अडतालीसाए संवच्छराणं सूरस्स । १०३। ता कहं ते चंदे ससी २ आहि० ?, ता चंदस्स णं जोतिसिंदस्स जोतिसरणो कंते मियंके विमाणे कंता देवा कंताओ देवीओ कंताइं आसणसयणखंभभंडमतोवगरणाइं अप्पणावि णं चंदे देवे जोतिसिंदे जोतिसराया सोमे कंते सुभे पियदंसणे सुरूवे ता एवं खलु चंदे ससी २ आहि०, ता कहं ते सूरिए आदिच्चे २ आहि० ?, ता सूरदिया समयाति वा आवलियाति वा आणापाणूति वा थोवेति वा जाव उस्सप्पिणीओसप्पिणीति वा एवं खलु सूरि आदिच्चे २ आहि० । १०४। ता चंदस्स णं जोतिसिंदस्स जोतिसरणो कति अग्गमहिंसीओ पं० ?, ता चत्तारि अग्गमहिंसीओ पं० तं०-चंदप्पभा दोसिणाभा अच्चिमाली पभंकरा जहा हेट्ठा तं चेव जाव णो चेव णं मेहुणवत्तियं, एवं सूरस्सवि भाणितव्वं, ता चंदिमसूरिया जोतिसिंदा जोतिसरायाणो केरिसे कामभोगे पच्चणुभवमाणा विहरंति ?, ता से जहाणामते केई पुरिसे पढमजोव्वणुट्ठाणबलसमत्थे पढमजोव्वणुट्ठाणबलसमत्थाए भारियाए सद्धिं अचिरवत्तवीवाहे अत्थत्थी अत्थगवेसणताए सोलसवासविप्पवसिते से णं ततो लद्धे कतकज्जे अणहसमग्गे पुणरवि पियगघरं हव्वमागते ण्हाते कतबलिकम्मे कयकोउयमंगलपायच्छित्ते सुद्धप्पावेसाइं मंगल्लाइं वत्थाइं पवरपरिहिते अप्पमहग्घाभरणांलंकियसरीरे मणुणं थालीपाकसुद्धं अट्ठारसवंजणाउलं भोंयणं भुत्ते समाणे तंसि तारिसगंसि वासघरंसि अंतो सचित्तकम्मे बाहिरतो दूमितघट्टमट्ठे विचित्तउल्लोअचिल्लियतले बहुसमसुविभत्तभूमिभाए मणिरयणपणासितंधयारे कालागुरुपवरकुंदुरुक्कतुरुक्कधूवमघमघंतगंधुद्धुयाभिरामे सुगंधवरगंधिए गंधवट्ठिभूते तंसि तारिसगंसि सयणिजंसि दुहतो उण्णते मज्झेणतगंभीरे सालिंगणवट्ठिए उभओ (पण्णत्तगंड पा०) बिब्बोयणे सुरम्मे गंगापुलिणवालुयाउद्दालसालिसए सुविरइयरयत्ताणे वियवियखोमियखोमदुगूलपट्टपडिच्छायणे रत्तंसुयसुंवडे सुरम्मे आईणगरूतबूरणवणीततूलफासे सुगंधवरकुसुमचुण्णसयणोवयारकलिते ताए तारिसाए भारियाए सद्धिं सिंगारागारचारूवेसाए संगतगतहसितभणितचिद्धितसंलावविलासणिउणजुत्तोवयारकुसलाए अणुरत्ताविरत्ताए मणोणुकूलाए एगंतरतिपसत्ते अण्णत्थ कत्थई मणं अकुव्वमाणे इट्ठे सद्धफरिसरसरूवगंधे पंचविधे माणुस्सए कामभोगे पच्चणुभवमाणे विहरिज्जा, ता से णं पुरिसे विउसमणकालसमयंसि केरिसए सातासोक्खं पच्चणुभवमाणे विहरति ?, उरालं समणाउसो !, ता तस्स णं पुरिसस्स कामभोगेहिंतो एत्तो अणंतगुणविसिद्धतराए चेव वाणमंतराणं देवाणं कामभोगा, वाणमंतराणं देवाणं कामभोगेहिंतो अणंतगुणविसिद्धतराए चेव असुरिंदवज्जियाणं भवणवासीणं देवाणं कामभोगा, असुरिंद० देवाणं० अणंतगुणविसिद्धतरा चेव असुर० इंदभूयाणं देवाणं कामभोगा, असुरकुमाराणं देवाणं कामभोगेहिंतो० गहणक्खत्तताराख्वापं कामभोगा, गहणणक्खत्तताराख्वाणं कामभोगेहिंतो अणंतगुणविसिद्धतरा चेव चंदिमसूरियाणं देवाणं कामभोगा, ता एरिसए णं चंदिमसूरिया जोइसिंदा जोइसरायाणो कामभोगे पच्चणुभवमाणा विहरंति । १०५। तत्थ खलु इमे अट्ठासीती महग्गहा पं० तं०-इंगालए वियालए लोहितंके सणिच्छरे आहुणिए पाहुणिए कणे कणए कणकणए कणविताणए १० कणगसंताणे सोमे सहिते अस्सासणो कज्जोवए

कव्व (प्र० च्छ) ए अयकरए दुंदुभए संखे संखणाभे २० संखवण्णाभे कंसे कंसणाभे कंसवण्णाभे णीले णीलोभासे रूप्पे रूप्पोभासे भासे भासरासी ३० तिले तिलपुप्फवण्णे दगे दगवण्णे काये वंधे इंदग्गी धूमकेतू हरी पिंगलए ४० बुधे सुक्के बहस्सती राहु अगत्थी माणवए कामफासे धुरे पमुहे वियडे ५० विसंधिकप्पेल्लए पइल्ले जडियालए अरूणे अग्गिल्लए काले महाकाले सोत्थिए सोवत्थिए वद्धमाणगे ६० पलंबे णिच्चालोए णिच्चुज्जोते सयंपभे ओभासे सेयंकरे खेमंकरे आभंकरे पभंकरे अरए ७० विरए असोगे वीतसोगे य (प्र० विमले) विवत्ते विवत्थे विसाले साले सुव्वते अणियट्ठी (२०३) एगजडी ८० दुजडी कर करिए रायऽग्गले पुप्फकेतू भावे केतू, संगहणी-‘इंगालए वियालए लोहितंके सणिच्छरे चेव । आहुणिए पाहुणिए कणकसणामावि पंचेव ॥८९॥ सोमे सहिते अस्सासणे य कज्जोवए य कव्वरए । अयकरए दुंदुभए संखसणामावि तिण्णेव ॥९०॥ तिन्नेव कंसणामा णीले रूप्पी य हुंति चत्तारि । भास तिल पुप्फवण्णे दगवण्णे काय वंधे य ॥९१॥ इंदग्गी धूमकेतू हरि पिंगलए बुधे य सुक्के य । बहसति राहु अगत्थी माणवए कामफासे य ॥९२॥ धुरए पमुहे वियडे विसंधिकप्पे नियडि पयले य । जडियालए य अरूणे अग्गिल काले महाकाले ॥९३॥ सोत्थिये सोवत्थिये वद्धमाणग तथा पलंबे य । णिच्चालोए णिच्चुज्जोए सयंपभे चेव ओभासे ॥९४॥ सेयंकर खेमंकर आभंकर पभंकरे य बोद्धव्वे । अरए विरए य तहा असोग तह वीतसोगे य ॥९५॥ विमले वितत विवत्थे विसाल तह साल सुव्वते चेव । अणियट्ठी एगजडी य होइ बिजडी य बोद्धव्वो ॥९६॥ कर करिए रायऽग्गल बोद्धव्वे पुप्फ भाव केतू य । अट्ठासीति गहा खलु णेयव्वा आणुपुव्वीए ॥९७॥ १०६॥ २० पाहुडं ॥ इति एस पाहुडत्था अभव्वजणहिययदुल्लहा इणमो । उक्कित्तिता भगवती जोतिसरायस्स पन्नत्ती ॥९८॥ एस गहितावि संती थद्धे गारवियमाणिपडिणीए । अबहुस्सुए ण देया तव्विवरीते भवे देया ॥९९॥ सद्धाधितिउट्ठाणुच्छाहकम्मबलविरियपुरिसकारेहिं । जो सिक्खिओवि संतो अभायणे परिकहे (प्र० किक्खवे) ज्जाहि ॥१००॥ सो पवयणकुलगणसंघबाहिरो णाणविणयपरिहीणो । अरहंतथेरगणहरमेरं किर होति वोलीणो ॥१०१॥ तम्हा धितिउट्ठाणुच्छाहकम्मबलविरियसिक्खअं णाणं । धारेयव्वं णियमा ण य अविणएसु दायव्वं ॥१०२॥ वीरवरस्स भगवतो जरमरणकिलेसदोसरहियस्स । वंदामि विणयपणतो सोक्खुप्पाए सया पाए ॥१०३॥ १०७।

इति श्रीसूर्यप्रज्ञप्त्युपागं